



BIBLIOTECA NAZ.
Vittorio Emanuele III

XX XIV

B

45

NAPOLI

XIV

45

~~IX. H. 49~~

~~X. H. 21~~









461

EXVI

L. 4.

V. 15.

PETRI DANIELIS HUETII,
Episcopi Abrincensis,
C E N S U R A
P H I L O S O P H I Æ
C A R T E S I A N Æ.

EDITIO QUARTA,
aucta & emendata.




P A R I S I I S,

Apud JOANNEM ANISSON, Typographiæ
Regiæ Præfectum, viâ Jacobæâ,
sub Lilio Florentino.

M. D C. X C I V.
C U M P R I V I L E G I O R E G I S







ANTECESSIO.

CUM Philosophiam Cartesianam ad censuram meam revocare instituissem ante annos aliquot, ea præfatus eram, quibus non contumelias modo sectæ hujus, sed & offensionem vitare me posse sperabam. Præ me enim tuleram, non sponte à me susceptum id esse scribendi argumentum, sed coactum impulsu summi viri Montauserii, cujus magna erat imprimis apud me & gravis auctoritas. Præterea in ipsius argumenti tractatione ea adhibita erat à me modestia atque moderatio, ut si à respondendo temperare sibi non posset factio illa, quantumvis superba atque procax, pari tamen jure modoque mecum acturam putarem. Verum evenit multo aliter. Nam & in Germania, & in Hollandia, & in Frisia, & plus

ANTECESSIO.

hîc etiam in Gallia, in circuiis, in scholis, in disputationibus publicis studiosorum, in prælectionibus Magistrorum, dictis, scriptis, carminibus famosis appetitus sum. Quidam etiam ex hoc grege cordati viri, veteri mecum necessitudine conjuncti, non temperarunt sibi, quin se totos ab amicitia nostra averterent, mallentque amicum ejurare, quam susceptam opinionem. Quæ quamvis ingrata erant, ferebam tamen æquo animo, quippe nullius mihi culpæ conscius. Nam cum hanc mihi scribendi materiam fumerem, in medio palmam omnibus positam esse credebam, qui tractarent Philosophiam; iniquos fore, qui licere, sibi vellent veterum sectas contemnere, mihi novam hanc repudiare fas esse nollent; atque etiam eo iniquiores, si convitiis pugnare mallent, quàm rationibus. Non

ANTECESSIO.

enim comparatæ adversum me
scriptiones illæ, quas apud exte-
ros circumferri acceperam, fla-
grante hoc bello, ad me poterant
pervenire; nec porro perventuras
sperabam. Jam itaque defunctum
me putabam hujus controversiæ
molestiâ, cùm ecce longo post
tempore Cartesianæ Philosophiæ
defensorem se fert, vir in hac pa-
læstra diu subactus, & inter suos
celebris grandi opere nuperrime
edito, quo totam doctrinæ hujus
descriptionem ac seriem comple-
xus est. Is, sive gregalium suorum
persuasu & inductu, sive suopte
ingenio, patrocinium in se recepit
sectæ hujus, Censuramque nostram
palam confutare instituit. Tole-
rassem hoc vero sine querela, si
pro eo ac debuerat, loci ac digni-
tatis nostræ rationem habuisset,
nec præter omnem urbanitatis at-
que etiam humanitatis morem,

ANTECESSIO.

ea in me jactasset, quæ magistratus potius animadversione, quàm nostra responsione digna essent. Verum hæc condonamus hominibus Philosopho, ac Cartesiano præsertim, hoc est, Physicæ Philosophiæ quam Moralis studiofiori. Quod spectat ad opus ipsum, ut nulli alii prodissent hujus selectæ fœtus, qui prodierunt quamplurimi, unde æstimari ea posset, vel ex uno hoc certo libro, si quis attente introspexerit, qui sit hominum illorum captus, quod ingenium, quæ eruditio, quæ in ratiocinando facultas, quæ sententiarum ac verborum cohærentia, facile licet cognoscere. Quod si tantum nobis abs re nostra fuisset otii, ut singula possemus persequi, res abiisset in immensum; verum exclusi temporis angustiis, & ad graviora revocati, cum recederetur opus nostrum, intactis reliquis quæ ob-

ANTECESSIO.

jecta nobis fuerant argumentis , in primo hæsimus capite , quo totius Cartesianæ molis fundamenta continentur. His enim emotis , quod factum à nobis est , nisi nostra nos fallunt , reliqua corruere necesse est. Quæ ne quis à me gratis jactari existimet , quam multa flagitia in libello hoc commiserit nuperus ille Cartesianæ disciplinæ vindex , ex pauculis illis existimare promptum est , quæ hîc damus in antecessum. Ordiamur à discrepantia sententiarum & verborum. Cùm alibi sæpe , tum præcipue in responsione ad sectionem nonam Pag. 33. primi capitis , queritur cogitationem qua aliquid mens percipit , actionem à me haberi & appellari , cùm nihil aliud sit quàm affectio. At paulo tamen superius di- Pag. 32. ferte hæc scripsit : Cùm aio , ego cogito , scio me agere ; scio enim idem esse agere & cogitare ; scio me agere Pag. 44.

ANTECESSIO.

Pag. 49. & seq. & pag. 25.

cùm cogito. Tum alio loco, *Actio*, inquit, *qua cognoscimus nos rem bonam vel malam judicasse, pertinet ad mentem.* In responsione ad sectionem undecimam ejusdem capituli, negat ratiocinationem inesse in his verbis, *Ego cogito, ergo sum*; cùm tamen hoc ipso loco verba hæc ratiocinationem appellet, eorumque conclusionem nobis lumine naturali cognitam esse dicat, & propositum fuisse Cartesio, enunciatum hoc demonstrare, *Ego sum.*

Pag. 13. 14. 15.

 Item alibi, *Optime*, inquit, *ratiocinatur Cartesius, cùm ait, Ego cogito, ergo sum*, in eoque argumento haberi fatetur præmissas, ut vocant, propositiones, & consequentiam, atque id esse enthymema, quo syllogismus continetur. Et rursus tradit Cartesium ita dis-

Pag. 25.

 rentem, *Ego cogito, ergo sum*, uti *Analyfi ad cognoscendam suam existentiam.* Quid aliud est autem

ANTECESSIO.

Analyfis , quam ratiocinationis
 quoddam genus? Alias Philosophi
 hujus noxas prodamus. *Circulum*
 vocant Dialectici, five *petitionem*
principii, vitiosam hanc ratiocina-
 tionem, qua quæsitum sumitur
 pro concesso, five ut Græci lo-
 quuntur, λαμβάνεται τὸ ἐν ἀρχῇ. Val-
 de familiarem eam esse Cartesio
 probat Censura nostra, ut mini-
 me mirum sit hoc duce in eam dis-
 cipulos ipsius impegisse. Cùm quæ-
 reretur an certum nobis sit nos ex-
 istere, quod dubium visum fuerat
 Democrito & Academicis, de-
 monstrare id conatus fuerat Car-
 tesius hoc argumento, *Ego cogito,*
ergo sum. Nos ostendebamus in-
 certum probari per incertius, nec
 quidquam ex hac ratiocinatione
 colligi. Respondet Cartesianus no-
 ster ad sectionem undecimam pri-
 mi capitis, eam non esse ratioci-
 nationem, quippe cujus conclusio

ANTECESSIO.

*Pag. 49.
50. 51.*

ex se nota sit, ea nimirum, *Ergo sum*. In quo sumit quæsitum pro concessio, nempe an certum sit Cartesio se existere. Cùm fidem luminis naturalis dubiam haberi jubeat in ipso aditu Cartesiana Philosophia, quod falli sæpe nos contingat in rebus clarissimis, Geometrasque ipsos sæpe fallat lumen naturale, in eo tamen falli nos negat novitius ille scriptor, *Quidquid cogitat est: ego cogito, ergo sum*; quippe hoc mihi cognitum esse lumine naturali, cujus fides dubia non est. Quid est autem circulus, si hoc non est? Ecce tibi joculariorem aliam hominis ejusdem ratiocinationem.

*Respons. ad
cap. 1. sect.
12. pag.
60.*

*Respons. ad
cap. 1. sect.
12. pag.
66.*

Scire non possum me esse, quin & sciam me non semper falli à Deo: scire autem non possum me non semper falli à Deo, quin sciam me esse. En cor Zenodoti: en jecur Cratetis. Strictim hæc delibamus. Nunc sectæ hujus inscitiam

ANTECESSIO.

declaremus exemplis aliquot. Cùm Cartesianam dubitationem similem esse scribit nuperus Philosophus, dubitationis Socraticæ, Platonicæ, & Carneadeæ; & quid à dubitatione Scepticorum differat, definire audet; in eo, ut & in aliis plerisque, veteris Philosophiæ plane imperitum se prodit. At aspernari se aiunt rancida hæc veterum deliria: aspernentur verò, dummodo ne fingant se scire quæ nesciunt. An & aspernantur Cartesii ipsius Philosophiam, quam defendunt? incredibile sane est & tamen verissimum, pleraque ejus capita hunc Philosophiæ Cartesianæ propagatorem ignorasse: cùm jactare nihilominus soleant Cartesiani, solos se Cartesii mentem tenere. Unicum dabimus exemplum, quod esse possit instar omnium millium. Scripseram placitum esse Cartesio, ea facere Deum posse quæ reputa-
vj

*Respons. ad
cap. 1. sect.
1. pag. 4.*

ANTECESSIO.

gnent; puta rem simul esse & non esse; totum non esse majus sua parte. Contradicit ille Scriptor, negatque id umquam vel sensisse, vel scripsisse Cartesium. At clarissime tamen & liquidissime traditum id ab eo extat in Epistola ad Morum, aliisque Epistolis, & in Responsionibus ad sextas Objectiones. Jam verò quam supinus error est, lumen cum visione confundere? factum id tamen est ab auctore nostro. Nam comparare mentem oculo, cogitationem visioni, rem cogitatam rei visæ, quod factum à me est, hoccine verò est cogitationem lumini comparare, quod factum à me asseverat istud Cartesianarum partium columen? Quam absurdum vero quod addit, tria inesse in lumine, oculum qui videat, actionem per quam oculus videat, rem visam ab oculo? Itane, mi homo? Cùm initio re-

*Cartes. Epist. Tom 1.
Resp. ad
Epist. 67.
Resp. ad
sext. Object.
sect. 6, 8.*

*Respons. ad
cap. 1. sect.
9. p. 31, 36.*

ANTECESSIO.

rum dixit Deus, *Fiat lux, & facta est lux*, an simul procreavit oculos qui lucem viderent, de quibus siluerit Moses? Quàm ineptum est quod ait, argumentum hoc, *Ego cogito, ergo sum*, simplex esse axioma; atque item propositionem hanc, *Ego sum*, axioma esse, quod non egeat demonstratione? At nos audiveramus in scholis, axioma esse propositionem quamdam universalem, ex se cognitam, cujusmodi sunt Axiomata Euclidis. An verò propositio isthæc, *Ego sum*, est universalis, quæ ad me unum pertinet? An ex se cognita est, quam in dubium revocavit Democritus, & quam tanto conatu probare instituit Cartesius? Nec me fugit Dialecticis Græcis dictum esse ἀξίωμα, plenam ac perfectam verborum sententiam, quæ necessario vera sit aut falsa. Sed hoc nihil ad ea de quibus disputat his locis nuperus

*Respons. ad
cap. 1. sect.
7. pag. 25.
& ad sect.
11. pag.
50.*

ANTECESSIO.

Philosophus , ut res ipsa loquitur ,
& verba ejus declarant. Mitto pue-
rilem hunc errorem , *Criterion*

Respons. ad
cap. 2. sect.
1. page. 76
77.

vocabulum esse Latinum. Nam
Græcæ Latinæque linguæ imperi-
tia gloriantur Cartesiani. Itaque
dum nostra Gallice reddit ille ,
vix me meaque in ipsius verbis
agnosco. Velut cum argumenti
conclusionem , quam nullam es-
se dixeram , falsam interpretatur.

Respons. ad
cap. 1. sect.
9. pag 32.

Quasi nihil differant , conclusio
nulla , & conclusio falsa. Argumen-
ti hujus , Omne animal est vivens ,
Petrus est sanctus , ergo Petrus est
vivens , conclusio nulla est ; & ta-
men falsa non est. Dixeram signi-
ficationem quamdam enuntiatio
suo affectam fuisse à Cartesio : si-
gnificationem fictam , nec natura-
lem interpretatur ille. Sciret verò
aliud esse fingere , aliud affingere ;
sciret prætereà enuntiatio conti-
neri posse significationem , non na-

Respons.
ibid.

ANTECESSIO.

turalem, sed translatam, neque tamen fictam. Cum capite sexto sententiam Cartesii de ortu mundi hujus aspectabilis exponerem, dixi materiam primi elementi continuato motu tenuiorem magis magisque fieri, *neque ullum esse molituræ hujus ac tritura modum.* Hæc ille sic interpretatus est, *nullam ipsis superesse vel molem certam vel figuram.* Nam quî legitimum cum iis habere congressum & sermonem queas, qui te non intelligant? Minuta ista sunt, præ ut graviora afferam, quæ non per inscitiam, sed data opera perperam ab eo interpolata, truncata, conficta sunt, ut per fas & nefas serviret causæ: cujusmodi illud est, quod scripseram: *Cùm fluxa sit autem & infirma hominum memoria, ad aliud lemma facile referri potest consecutio, quam ad id unde profecta est.* Ac ne quis in distinctione rerum ve-

*Censur.
Philos. Cartesii.
cap. 1.
sect. 9.*

ANTECESSIO.

terum & recentiorum cavillaretur, quod oblivioni minus obnoxia sint recentiores, quàm veteres, continuo subjeceram: *Simile quid nobis in quotidiana familiaris sermonis consuetudine usu venire solet, cum aliquantum dicendo progressi, unde ductæ sint conclusiones, in quibus hæremus, & quorsum referenda, non satis meminimus.* Ne sibi distinctionem illam, quam dixi, quantumvis inanem, eripi pateretur,

Respons. ad totum hoc comma in interpretatione sua prætermisit. Insignis & illa est dissimulatio, cùm memora-

Respons. ad bilem Thomæ locum supprimit, quo decernitur, *aliud esse actum, quo intellectus intelligit lapidem; aliud quo intellectus intelligit se intelligere lapidem.* Quippe negaverat Cartesius, aliam esse cogitationem qua cogito me esse, aliam qua cogito me id cogitare. Cùm ceteroquin Thomæ patrocinium libenter as-

cap. 1. sect. 9. pag. 31, 36, 37.
Respons. ad
cap. 1. sect. 10. p. 41.
Thom. Part. 1. quest. 87. art. 3.
ad secundum.

ANTECESSIO.

ciscat schola Cartesiana. Quid quod nequiter & dolo malo falsitatis nos insimulat, quod an virum philosophum atque probum deceat, ipse existimet. Dixi Cartesium docuisse, Deum errorum nostrorum auctorem fingi non posse, etiamsi erroribus obnoxios nos effecerit. Locum adnotavi ad oram, nempe, *Partem primam Principiorum, sectionem vigesimam nonam, & sequentes*. Quid ad hæc animadversor ille noster? *Minime*, inquit; *hæc extant in sectione hac vigesima nona*. Cur de sequentibus, quas itidem ut vigesimam nonam indicavi, files, ô bone vir, & in responsione tua, & in interpretatione verborum nostrorum? Nempe calumniæ tuæ latebram quæris, dum temere nos falsitatis accusas: quippe hæc plane scripta extant in sectione tricesima sexta Cartesii, quæ una sane est ex his quæ sequuntur

*Respons. ad
cap. 1. sect.
12. pag. 57.
22.*

ANTECESSIO.

vigesimam nonam. En tibi verba ipsa Cartesii, *Neque tamen ullo modo Deus errorum nostrorum auctor fingi potest, propterea quod nobis intellectum non dedit omniscium.* Hujusmodi vernilibus technis se tuetur caussa Cartesianorum. Ita fallaciis & falsitatibus ad veritatem grassantur. Damus hic & aliam exquisitioris notæ. Positum erat in quæstione, an istæ propositiones, *Ego cogito, ergo sum*, nobis cognitæ essent *per simplicem*, uti vocant *visionem*, an per ratiocinationem. Quæ cum deffendere se posse desperaret Philosophus iste, à quæstione hac ad aliam callide nos traducere conatus est; istam videlicet, an nostra nobis ex seipsa cognita sit *existentia*. Quæ longe utique diversa sunt. Ac primum verba nostra falsa intepretatione pervertit. Nam cum ita scripsissem: *Cartesius, ejusque affectatores, ut duo hac,*

Respons. ad
cap. 1. Sect.
11. pag. 48.
& seq.

ANTECESSIO.

Ego cogito , ergo sum , quæ facile divelli posse prospiciebant , firmitus adstringerent , dicere arsi sunt , nobis hac esse , non per ratiocinationem cognita , sed per simplicem visionem . Ita hæc ab interprete nostro depravata sunt : Cartesius , ejusque affectatores , cum duas hæc propositiones , Ego cogito , ergo sum , facile divelli posse prospicerent , dixerunt nos nostram existentiam non per ratiocinationem cognoscere , sed per simplicem visionem . Disputamus de duabus hisce propositionibus , Ego cogito ergo sum : avocat nos ille ad disputationem de nostra existentia . Mox ista subjecimus ; Si totum istud , Ego cogito , ergo sum , meram esse ratiocinationem docuero , nec per simplicem visionem nosci posse , incertum hoc esse utique probavero ; falli vero , vel fallere qui ratiocinationem negant esse ratiocinationem . Quæ insincera hac interpretatio -

ANTECESSIO.

ne adulteravit: *Si duas hasce propositiones, Ego cogito, ergo sum, meam esse ratiocinationem docuero, nec eam qua his continetur veritatem, per simplicem visionem nosci posse, incertum hoc esse & dubium simul probavero.* Quærebam ego, an duæ istæ propositiones nobis per simplicem visionem sint cognitæ: quærit ille in sua interpretatione, non de propositionibus ipsis, sed de veritate quæ iis continetur, de nostra nimirum *existentia*. Pergit deinde in eadem ludificatione: nam cum ista addidissem: *Nescire se profectur Cartesius in aditu Philosophiæ suæ, an sit. Ut autem ad rei hujus ignota notitiam perveniat, querit aliquid, quod sibi sine ulla dubitatione cognitum sit. Id esse vult, Ego cogito.* Quæ postrema ita interpolavit: *Querit existentiam rei de qua dubitare non possit.* Monueram postmodum Lectorem, liquido appa-

ANTECESSIO.

rere in secunda Cartesii Meditatione, progressionem mentis per cognitionem cogitationis suæ, ad perceptionem rei prius incognitæ, nempe se esse; ac proinde ratiocinationem esse istud, *Ego cogito, ergo sum*. Hæc una litura ipse induxit. Rebus ita demum ad struendam fraudem paratis, quasi id ageretur inter nos, an nostra *existentia*, non autem argumentum illud, *Ego cogito, ergo sum*, per simplicem visionem, non per ratiocinationem sit cognita, exultat deinde in quæstionis hujus tractatione, minimeque ad ipsam pertinere ostendit, quæ in eam à nobis neutiquam allata sunt, sed in quæstionem de hoc argumento, *Ego cogito, ergo sum*. Plura afferre possem hujusmodi, sed hæc profecto sunt satis; unde intelligi possit, quid veri ex Cartesiana Philosophia, quid fani, quid sinceri sit expectandum.

ANTECESSIO.

Frons speciosa, fateor, magnifici
aditus, splendida promissa. Opini-
onum emendatio, medicina er-
rorum, veritatis adeptio. Figmen-
ta in recessu, somnia, aut si quid
somnia inanius est: summa libe-
ralium disciplinarum imperitia, at-
que imprimis veteris Philosophiæ,
ob idque affectata ejus despectio;
quam si cognoscerent, quantum
eos puderet suæ! Tricæ in dispu-
tando, fallaciæ, offuciæ, omnia ad
pompan & ostentationem compo-
sita; nec esse, sed videri. Ad hunc
nostrum adversarium quod atti-
net, si isthac animadversione non
resipiscat, de illo certe jam finem
faciam dicendi mihi: cumque spe-
randum non sit ut dediscat senex,
quæ tot annos didicit & docuit,
superest ut ipsum demum

*Discipularum inter jubeam plorare
cathedras.*





I N D E X

PARTIUM LIBRI HUIUS.

PRÆFATIO

- | | | |
|------|--|-----|
| I. | <i>Exordium.</i> | I |
| II. | <i>Libri argumentum.</i> | vj |
| III. | <i>Idem tenebitur ordo disputationis,
quem secutus est Cartesius, quo-
adejus fieri poterit.</i> | vij |
-

CAPUT PRIMUM.

Expenditur Cartesii sententia de
dubitatione, & de hac argu-
mentatione, *Ego cogito, ergo
sum.* 8

- | | | |
|-----|---|----|
| I. | <i>Philosophia Cartesiana fundamen-
tum est dubitatio.</i> | 9 |
| II. | <i>Cur in dubitatione fundamentum
Philosophia sua posuerit Carte-
sius.</i> | 11 |

I N D E X.

- III. *Dubitandi propositum ante deferit Cartesius, quam teneat.* 13
- IV. *Primam veritatis notitiam in eo statuit, Ego cogito, ergo sum.* 14
- V. *In quo ponit ut concessum id quod queritur.* 15
- VI. *Ex hoc enuntiato, Ego cogito, non certo colligi potest istud, Ergo sum.* 20
- VII. *Notio hac, Ego cogito, Ergo sum, non est omnium prima.* 23
- VIII. *Sibi contradicit Cartesius, iis quae lumine naturali nobis nota sunt, fidem aliquando tribuens, aliquando detrahens.* 27
- IX. *Enuntiato hoc, Ego cogito, aliud significatur quam quod vult Cartesius; ac proinde ducta ex eo conclusio, Ergo sum, nulla est.* 30
- X. *Cum quis cogitat de re aliqua, non eadem est idea rei hujus de qua cogitat, ac idea ipsius cogitationis.* 47
- XI. *Falsum est, istud, Ego cogito, ergo sum, nobis cognitum esse per simplicem visionem, non per ratiocina-*
tiocina-

I N D E X.

- 34
- tiocinationem.*
- XII. *Ex hoc dubitandi argumento, quod à Cartesio propositum est, nescire nos annon ita comparati simus à Deo, vel à malo aliquo Genio, ut semper fallamur, refellitur istud, Ego cogito, ergo sum.* 61
- XIII. *An verum sit, Deum nos fallere non posse in iis rebus, quas cognoscimus per simplicem visionem.* 73
- XIV. *Cartesius in exorsu Philosophiæ Academicos & Scepticos affectatus, statim errat, ut eos describit.* 77
- XV. *Fatetur Cartesius nullam nos habere veritatis normam, nisi constet nos ita à Deo non esse factos, ut semper fallamur.* 81

CAPUT SECUNDUM.

Expenditur Cartesii sententia de Criterio.

- I. *Perversam Criterii quarendi viam insistit Cartesius.* 84

I N D E X.

- | | | |
|-------|---|-----|
| II. | In eo quarendo parum sibi constat. | 89 |
| III. | Et in eo quoque assignando. | 94 |
| IV. | Distinguit claram & distinctam Perceptionem à Lumine naturali, & à Perspicuitate generaliter sumpta, & à Notitia rei ex re ipsa hausta. | 95 |
| V. | Lumen naturale Cartesii non est certum Criterium. | 96 |
| VI. | Neque clara ejus & distincta Perceptio. | 98 |
| VII. | Quid sit idea, juxta Cartesium. | 98 |
| VIII. | Refelluntur argumenta, quibus probare conatus est Cartesius claram & distinctam Perceptionem esse certum Criterium. | 101 |
| IX. | Argumentis oppugnatur hoc Criterium. Primum argumentum. | 102 |
| X. | Secundum argumentum. | 104 |
| XI. | Tertium argumentum. | 105 |
| XII. | Quartum argumentum. | 106 |
| XIII. | Quintum argumentum. | 107 |
| XIV. | Neque Perspicuitas, neque Notitia rerum à rebus ipsis hausta, sunt certa Criteria. | 108 |

INDEX.

- XV. *Refelluntur praecepta veri cognoscendi à Cartesio tradita.* 109
 - XVI. *Inanis est, quam ad percipiendum verum adhiberi volunt Cartesiani, Attentio.* 111
 - XVII. *Cartesius dubitans in exorsu Philosophia sua, confidens in progressu.* 113
 - XVIII. *Quam ejus confidentiam Cartesiani superarunt.* 116
-

CAPUT TERTIUM.

Expenditur Cartesii sententia de mente humana.

- I. *Certissima dogmata de mente humana, deque Dei existentia, incertis rationibus confirmare conatus est Cartesius.* 117
- II. *Etsi ob veritatis asserenda studium laudandus est.* 119
- III. *Exponitur Cartesii sententia de mente humana.* 119
- IV. *Qua & refellitur.* 121
- V. *Etiam si diversa haberi possint ideae rei cogitantis, & rei corporeae, non hinc tamen efficitur res es-*

INDEX.

- se diversas.* 124
- VI. *Falsum est, prius, certius, & clarius cognosci mentem, quam corpus.* 126
- VII. *Falsum est, totam hominis naturam in eo positam esse, quod cogitat.* 130
- VIII. *Falsum est, animum sentire res externas, non corpus.* 131
- IX. *Falsum est, esse aliquid in intellectu, quod non fuerit in sensu.* 135
- X. *Falsum est, in Conario precipuam esse sedem animi.* 140
-

CAPUT QUARTUM.

Expenditur Cartesii sententia de existentia Dei.

- I. *Exponitur Cartesii sententia de existentia Dei.* 147
- II. *Exploratur Cartesii opinio de idea rei infinite & summe perfecta, quæ in nobis est.* 149
- III. *Idea rei infinite & summe perfecta, quæ in nobis est, finita est & imperfecta.* 151

INDEX.

- IV. *Falsum est finitum cognosci ex infinito, non hoc ex illo.* 154
- V. *Idea rei infinita & summe perfecta, qua in nobis est, neque clara est, neque distincta.* 159
- VI. *Idea rei infinita & summe perfecta, qua in nobis est, aliunde proficisci potest, quam à re infinita & summe perfecta.* 162
- VII. *Realitas objectiva, qua est in idea rei infinita & summe perfecta, tota est à mente nostra.* 164
- VIII. *Ex idea rei infinita & summe perfecta qua in nobis est, non necessario sequitur rem illam infinitam & summe perfectam extramentem nostram extare.* 166
- IX. *Ex idea rei infinita & summe perfecta, qua in me & aliis est, colligi non potest existentia Dei; ac proinde nec ex illa, qua in Cartesio est.* 174
- X. *Per vitiosum ratiocinationis circulum existentiam Dei probat Cartesius.* 177
- XI. *Expugnatis argumentis, quibus*
é iiij

INDEX.

existentiam Dei demonstrare
conatus est Cartesius, ruit, ip-
so fatente, omnis ejus Philoso-
phia, & fenestra erroribus a-
perta est.

179

CAPUT QUINTUM.

Expenditur Cartesii sententia de
corpore & vacuo.

- I. Exponitur Cartesii sententia de corpore & vacuo, 180
- II. Et refellitur. 184
- III. Inmaximos errores Cartesium im-
pegit ignoratio duplicis exten-
sionis; quarum alia, qua cor-
porum est, positiva est; alia,
qua nihili est, est negativa. 188
- IV. Jocularis error Cartesii de corpo-
rum duritie. 190
- V. Parum candide agit Cartesius, cum
mundum esse ait indefinitum. 192



I N D E X.

CAPUT SEXTUM.

Expenditur Cartesii sententia de
ortu mundi hujus aspectabilis.

- I. *Exponitur Cartesii sententia de or-
tu trium elementorum, ex qui-
bus mundum hunc aspectabilem
conflatum esse docuit.* 194
 - II. *Et refellitur.* 196
-

CAPUT SEPTIMUM.

Expenditur Cartesii sententia de
caussa gravitatis corporum
terrestrium.

- I. *Exponitur Cartesii sententia de
caussa gravitatis corporum ter-
restrium,* 201
 - II. *Et refellitur.* 202
-

CAPUT OCTAVUM.

Expenditur generatim Cartesiana
Philosophia.

- I. *Laus Cartesiana Philosophiae.* 205

I N D E X.

II.	<i>Cur tantum aetati huic placuit.</i>	206
III.	<i>Notantur Cartesiana Philosophiae labes. 208. 1. Inconstans est. 208. 2. Figmentis nititur. 209. 3. Ef- fectibus causas non necessarias, causis effectus non necesarios assignat. 209. 4. Officit Fidei. 214. 5. Vitiosa utitur ratione philosophandi.</i>	225
IV.	<i>Cartesii virtutes.</i>	227
V.	<i>Censorium iudicium de Cartesii scriptionibus.</i>	229
VI.	<i>Cartesii vitia.</i>	230
VII.	<i>Insigne hoc Cartesii vitium, quod novitatis nimium fuit studio- sus; ac propterea simulate affe- ctavit inscitiam, quam ejus as- secta vere retinuerunt.</i>	237
VIII.	<i>Et si nihil fere attulit novi.</i>	244
IX.	<i>Laus Aristotelis.</i>	263
X.	<i>Vulgares sunt Cartesiana Mora- lis regula.</i>	264
	<i>Epilogus.</i>	266



CENSURA




C E N S U R A
P H I L O S O P H I Æ
C A R T E S I A N Æ.

Ad Illustrissimum
& Excellentissimum Ducem
C A R O L U M S A M M A U R Æ U M
M O N T A U S E R I U M,
Franciæ Parem.

P R Æ F A T I O.

I. *Exordium.* II. *Libri argumentum.*
III. *Idem tenebitur ordo disputationis,*
quem secutus est Cartesius, quoadejus
fieri poterit.

I.  UÆSIVISTI ex me sæ- *Exordium.*
penumero ILLUSTRISSI-
ME DUX, quid sentirem de
Cartesiana Philosophia, quæ
ita placuit huic ætati, hominumque c-
A

tiam acutissimorum animos novitate sua ita cepit, ut præ ea pene jam obsoleverint reliquæ Philosophorum disciplinæ. Cumque intellexisses parum omnino mihi eam probari, rogasti idemtidem argumenta sententiæ hujus, quæ ego pro re nata, sæpe breviter, fusius nonnumquam, candide semper exposui. Tunc vero præcipue actum memini id esse inter nos, cum pro insigni sua pietate & sapientia Rex Christianissimus, vel scribendo, vel docendo propagari vetuit doctrinam hanc, ut pote lubricam ac noxiam; tuque mirareris audaciam factionis hujus, quæ velut per coitionem pugnaret adversus interdictum, nec a labe sua in vulgus spargenda abstineret. Tum enim aliquid nactus otii, idem contendebas acrius, meque res strictim delibantem ita lacescebas, vel contradicendo, vel interpellando, vel quæstiones ex quæstionibus serendo, ut causam hanc, particulatim quidem, sed pene totam tamen extorseris. Multa assentiebare tu quidem, at hæc præcipue quæ attuleram, neminem majori apparatu & pompa à dubitatione Philosophiam suam exorsum esse, quam Car-

tesium; neminem tam confidenter, tamque affirmate & indubitanter de rebus obscurissimis & incertissimis, sibi que plane ignotis asseverasse, sæpe levissima ratione reddita, aliquando & nulla: cumque Fidei, quæ à Deo proficiscitur, submittere deceat Philosophiam, quæ mentis humanæ fœtus est, hunc contra exegisse fidem ad Philosophiæ suæ præcepta: quod & plurimis notationibus sanequam argutis confirmabas; mihi que valde auctor eras ad ea colligenda argumenta quæ proposueram, scriptisque tradenda. Ego tergiversari primum, & vehementius deinde instanti tibi multa opponere; tot paratos adversarios, viros solertes, perpugnaces, vehementi partium illarum studio incensos; cuiusmodi fere amor est novitatis; impositum nobis recens onus, natasque ex eo assiduas sollicitudines, occupationes infinitas, gravioribus studiis distractum animum, qui nec facile posset ad hæc leviora revocari; quæ mihi quondam aliam agentem vitam, aliam personam sustinenti, non indecora fortasse visa sint, dum tempus tulit; nunc sacris addicto parum conveniant. Tu pertendebas con-

tra vel ob id ipsum rem suscipiendam :
ecquem enim magis decere tutelam sanctæ Religionis, earumque doctrinarum oppugnationem, quibus illius violatur integritas, quam hominem pii sacrique ordinis ? præstitam hanc olim Fidei Christianæ operam à sanctis Ecclesiæ Patribus adversus profanos Philosophos, quorum auctoritas in rebus ad salutem æternam pertinentibus vel levissima erat, vel plane nulla; multo id præstandum magis adversus hominem Christianum, cujus disciplina Christi placitis contraria inomenti est & exempli gravissimam perniciem in posterum trahentis: adversariorum vero vel vim vel multitudinem, ei qui veritatem tueatur, parum esse extimescendam. Alia ad hæc plurima cum adjecisses, pervicisti tandem, manusque dedi : quis enim omnium hominum est cujus consiliis ac prudentiæ plus tribuam ? qui auctoritate plus valere debeat apud me ? Nec enim mihi ex prædicatione tantum hominum cognita sunt eximia in te, vel à natura, vel à studio, vel à fortuna collata ornamenta; magnus supra vulgus hominum dignitatis splendor, ani-

mus supra dignitatem, parta ingens ex bellicis laudibus gloria, experrectus vigor ingenii, exquisita disciplinarum omnium scientia, rara in hoc fastigio comitas & humanitas, profusa in omnes liberalitas, quæque virtutum omnium tuarum apex est sincera in Deum constansque pietas. Hæc mihi, inquam, non ex fama, ut cæteris, sed ex intima admissione, multorumque annorum usu perspecta, sæpe à me admirationem, amorem, si ita pateris, numquamnon expresserunt. Præsertim cum maxima tua in me extent beneficia. Me enim hominem provincialem, & adhuc juvenem, nec quicquam de te meritum, patrocínio tuo complexus es, exornasti commendatione, benevolentia pene provocasti. Quorum memoria ut animo infixæ penitus hæret, insidetque meo, ita omnibus hominibus proditam, & in futurum tempus hic consignatam esse cupio: ut quam in me beneficus fuisti & benignus, tam me erga te gratum esse clarissimo monumento testatum sit. Nunc ea quæ apud te disputata sunt olim, quæque in hunc conclusi librum, æquo animo recognosce. Horum si te,

uti tum existimatorem & judicem, sic nunc defensorem habuero, parum equidem moratus aliorum judicia, in tuo favore facillime acquiescam.

*Libri argu-
menti 1679.*

II. Age igitur, quando ita vis; Cartesianæ Philosophiæ rimemur fundamenta, vitia persequamur; non omnia quidem, sed præcipua & capitalia: quibus exploratis & detectis, laborantis ædificiî ruinam cavebimus. Dura sane provincia, atque etiam invidiosa. Fuit enim Cartesius auctor naturæ verique neque meo judicio sordidus, quæ laus fuit Pythagoræ; & suo, affectatorumque, locupletissimus & certissimus: priscis certe illis naturæ interpretibus æmulus, si non par quidem, at aliquibus certe, quorum magna existimatio est, non multo inferior. Is veteris Philosophiæ labes acute perspexit: quas cum non facile reparari posse crederet, novæ conditor esse maluit, quam veteris emendator. Multa ejus extant subtiliter cogitata, pervestigata sagaciter, solerter inventa. Quod si huic suæ hæserunt noxæ, homo fuit; & ea scrutatus est, quorum notitiam longe ab hominum mentibus certo Dei consilio remotam esse non sa-

tis intellexit. Et hæserunt sane plurimæ, dum præceptis animus, nimiumque amator ac mirator sui, culpas in aliis acute deprehensas, turpiter in se concepit: foris oculus, cæcus domi.

III. Instituta adversum hæc disputationis non alius mihi tenendus videtur ordo, quàm quem ipse secutus est: quippe cum consertam doctrinæ seriem, ex se aptam, sibi que connexam texere studuerit, & quædam jecerit fundamenta, quibus universa Philosophiæ suæ moles niteretur, scrutanda præcipue ea sunt, & ad perpendiculum & normam exigenda: ut si parum iis consentire deprehensa sint: à ruinoso & caduco ædificio, uti mox dictum est, recedamus.

Idem tenebitur ordo disputationis, quem secutus est Cartesius, quoad idus fieri poterit.



CAPUT PRIMUM.

Expenditur Cartesii sententia de dubitatione, & de hac argumentatione, *Ego cogito, ergo sum.*

I. *Philosophia Cartesiana fundamentum est dubitatio.* II. *Cur in dubitatione Philosophia sua fundamentum posuerit Cartesius.* III. *Dubitandi propositum ante deserit Cartesius, quam teneat.* IV. *Primam veritatis notitiam in eo statuit, Ego cogito, ergo sum.* V. *In quo ponit ut concessum id quod queritur.* VI. *Ex hoc enuntiato, Ego cogito, non certo colligi potest istud, Ergo sum.* VII. *Notio hac, Ego cogito, Ergo sum, non est omnium prima.* VIII. *Sibi contradixit Cartesius, iis qua lumine naturali nobis nota sunt, fidem aliquando tribuens, aliquando detrahens.* IX. *Enuntiato hoc, Ego cogito, aliud significatur quam quod vult Cartesius; ac proinde ducta ex eo conclusio, Ergo sum, nulla est.* X. *Cum quis cogitat de re aliqua, non eadem est*

idea rei hujus de qua cogitat, ac idea ipsius cogitationis. XI. *Falsum est istud, Ego cogito, ergo sum, nobis cognitum esse per simplicem visionem, non per ratiocinationem.* XII. *Ex hoc dubitandi argumento, quod à Cartesio propositum est, nescire nos annon ita comparati simus à Deo, vel à malo aliquo Genio, ut semper fallamur, refellitur istud, Ego cogito, ergo sum.* XIII. *An verum sit, Deum nos fallere non posse in iis rebus, quas cognoscimus per simplicem visionem.* XIV. *Cartesius in exorsu Philosophia Academicos & Scepticos affectatus, statim errat, ut eos deserit.* XV. *Fatetur Cartesius nullam nos habere veritatis normam, nisi constet nos ita à Deo non esse factos, ut semper fallamur.*

I. **P**hilosophiæ totius suæ fundamentum Cartesius in dubitatione constituit. Fundamentum dico eo sensu, quo Vitruvius fundamenta appellat exinanita fossionibus & exhausta loca, ad excipiendas solidas substructiones. Nec vero leviter aut oscitanter dubitare nos jubet, sed ita ut universa pro incertis, ac ne incertis quidem, sed omnino pro

*Philosophiæ
Cartesiana
fundamentum
est dubitatio.*

*Vitruv. lib.
3. cap. 3.*

falsis habeamus, non modo quæcunque antehac incerta aut verisimilia, sed & quæ certissima nobis esse visa sunt; ne exceptis quidem illis principiis, quæ per se & lumine naturali nota esse dicuntur: cujusmodi sunt ea, Bina binis addita efficere quatuor, Totum esse majus sua parte, & Quæ uni alicui æqualia sunt, inter se esse æqualia; ac proinde lege hac quoque comprehensis Geometrarum, quæ his notionibus nituntur, Theorematis. Corpora quæ videmus, quæ tractamus, mundum universum nobis circumfusum, pro figmentis animi habenda esse sancit; ac nos ipsi quoque an simus, pro incerto putandum. Quam adeo late patentem dubitationem omnia omnino comprehendere manifestum est; adeo ut nihil prorsus certi sibi reliquum faciat animus, in quo possit consistere. Quæ cum infitiri audent nuperi sectæ hujus patroni, vel produnt magistri sui causam, vel doctrinam ignorant. Quam sæpe enim, quam clare sancitum ab eo est, semel erui oportere à fundamentis & everri pristinas omnes opiniones, quantumlibet verisimiles, & pro falsis habere quæcunque certissi-

ma fuerant visa? Deinde cum revocari jubet in dubium, quidquid videbatur verissimum; dubia autem omnia pro falsis habere; annon verissima pro falsis haberi jubet?

I I. Causas præcepti hujus istas affert Cartesius, quod sensus fallaces esse sæpe experiamur; quod plurima secundum quietem sentire videamur, quæ nusquam sunt; nec quæ nobis in somnis apparent, internoscere possimus ab iis quæ vigilantes sentimus; quod obscura sit & lubrica humana ratio; quod nesciamus denique an tales nos fingere voluerit Deus, ut semper falleremur, etiam in iis quæ nobis viderentur esse notissima. Animadvertendum diligenter & circumspiciendum; ista quid velint, quo pertineant; ne postquam nos, seque adeo ipsum intra has angustias conclusit Cartesius, atque his inscitæ tenebris circumsepserit, nobis incautis & inscientibus erepere ipse conetur, & in apertum scientiæ lumen evadere. Dubitandum est, inquit, de omnibus, nulla omnino excepta re, ut vitentur errores, & ad veritatem perveniatur; quia sensus & ratio sæpe nos fallunt; hoc est

Cur in dubitatione fundamentum Philosophiæ suæ posuerit Cartesius.

(ne quis in vocabulorum usu vitiliterget) falso judicamus de iis quæ sensuum ope percepimus; & ratiocinandi facultate quæ in nobis est male utimur; nec scimus, an tales nos Deus creaverit, ut semper fallamur. Ex hoc effato aditum sibi facit ad Philosophiam: hinc Meditationes suas, hinc Principia Philosophiæ exorsus est: hæc inculcat passim, hæc ingerit. Veram autem esse ac seriam dubitationem hanc, non fictitiam ac jocularem; ex rerum ipsarum arcessitam natura, non ex dubitandi tantum argumentis petitam, nec animi gratia adhibitam, ipsemet declarat Cartesius, seque non leviter & inconsiderate dubitare ait, sed serio, validisque & meditationis rationibus ad dubitandum esse adductum, & per multos annos in hac dubitatione permanfisse. Nec aliam porro quam veram ac seriam dubitationem postulant argumenta dubitandi ab eo proposita; velut visorum similitudo, quæ dormientium & vigilantium mentibus obversantur; ac plane consimilem dubitationis Scepticorum quæ vera & seria dubitatio fuit; hoc tantum discrepantem, inquit Cartesius, Scepticæ

*Cart. Medit.
1. Resp. ad
5. Object.*

Cart. De Method. §. 1.

doctrinæ valde inficius, quod dubitationis Scepticæ unicus esset finis dubitatio, quæ & ad ipsa etiam vitæ munia pertineret; suæ vero finis esset indagatio veritatis. Quamobrem ne præstantissima quidem ingenia dubitationem tollere posse affirmat, quæ oritur ex visis dormientium & vigilantium, nisi Deum esse agnoscant. Quod de fictitia dubitatione dictum ab homine sano nemo autumat. Ergo cum dubitationem suam *metaphysicam* & *hyperbolicam* appellat Cartesius, non fictitiam intellexit aut falsam, quod putant aut putare fingunt ejus assèclæ, in vocabulorum illorum ambiguitate latebram pertinaciæ pro more suo quærentes, sed quæ contineretur intra Metaphysicæ fines, nec ad vitæ usum adhiberetur: cum cæteroquin dubitatio fictitia, dubitatio non sit, uti fatentur ipsi, nec usui esse possit ad inquisitionem veritatis; sed opportuna tantum ad contradicendum; adeo ut ex usu & commodo disputantium dubitatio sit, aut non sit.

Cart. de Meth.
§. 4.

Cart. Medit. 3.
¶ 6. Resp. ad
3. ¶ 7. 653.

III. In quibus id primum reprehensione dignum est, quod qui ad percipiendam veritatem dubitare de omnibus in-

Dubitandi
propositum
ante deserit
Cartesius,

quam teneat.

stituerat; ut melius dubitaret, res non modo pro incertis, sed omnino pro falsis habendas esse decrevit. Quod ejus proposito palam adversatur. Nam qui rem habet pro falsa, non plus de ea dubitat, quam qui habet pro vera: assentitur enim, credit, & affirmat esse falsam. Qui autem assentitur, credit, & affirmat, non dubitat; sed qui assensum retinet, & incertum habet an res vera sit, vel falsa. Nec Cartesium juvant, qui res ipsum *hypothetice* tantum falsas habuisse volunt: nam cum & *hypothetice* de iisdem dubitasse eum contendunt, sequitur res easdem *hypothetice* falsas simul & dubias ipsum: hoc est (ut omnis vocabulorum removeatur ambiguitas) res easdem simul posuisse falsas & dubias, & manifestam repugnantiam in iisdem rebus admisisse. Nam quod falsum ponimus, de eo simul dubitare non possumus falsumne sit an verum.

Primam veritatis notitiam in eo statuit. Ego cogito, ergo sum.

IV. Mox deinde aliquam veritatis scintillam anxie quærens, hanc se reperisse primam putat; etiamsi semper fallatur, etiamsi dormiat semper & somniet, etiamsi à Deo ad perpetuam inscitiam & errores damnatus sit ab ipso ortu,

quoniam tamen de iis omnibus cogitat, se esse necessario: quippe *repugnare* (verba ejus hæc ipsa sunt) *ut putemus, id quod cogitat, eo ipso tempore quo cogitat, non existere*: primum hoc itaque, firmum, stabile, ac solidum veritatis omnis initium, & totius Philosophiæ fundamentum hoc esse, Ego cogito, ergo sum. Nunc hæc cujusmodi sint, videamus.

Princip Philosoph. Part. 1. §. 2.

V. Aio primum à Cartesio poni ut concessum, id quod quæritur: quærit enim an sit, & merito; nam qui dubitare vult de omnibus, dubitare quoque debet an sit, & de eo dubitare se professus est Democritus. Tum ut probet esse se, Ego cogito, inquit, sum igitur. Quid est vero illud, Ego? nempe res aliqua quæ est. Quærit autem an sit: & sumit se esse. Sumit igitur quæsitum pro concesso. Quid hoc est deinde, Ego cogito? hoc scilicet, Ego sum cogitans. Unde concinnatur hoc argumentum, Ego sum cogitans, ergo sum. Quod argumentum recidit in Chrysippeum illud, Si lucet, lucet: lucet autem: lucet igitur. Si sum, sum: sum autem; sum igitur. In quo sumo

In quo ponitur ut concessum, id quod quæritur.

me esse, ut probem me esse, & admitto vitiosum illum in argumentando circulum. Respondent Cartesiani illud *Ego*, non esse rem quæ sit, sed rem quæ cogitet; vel etiamsi sit, non adhiberi tamen à Cartesio, ut quæ sit, sed tantum ut quæ cogitet. At hæc quam infirma sint, cognoscitur ex natura enuntiatorum omnium, in quibus geminum esse terminum Dialectici docent; minorem, quem *Subiectum* appellant; majorem quem *Prædicatum*, sive *Attributum*; qui nisi diversi sint, vanam fore propositionem. Quorsum enim quis dicat, *Petrus est Petrus*? Nunc si hanc Cartesii propositionem *Ego cogito* explicemus, prohibet isthæc, *Ego sum cogitans*, in qua si illud *Ego* sit res tantum quæ cogitet, non res quæ sit, vanum erit illud enuntiatum, quippe cujus geminus terminus idem plane sit, nempe *Res cogitans est res cogitans*; nec inde sequeretur quæ sit conclusio, *Ergo sum*. Quod si pertendant Cartesiani propositionem hanc *Ego cogito*, non ita esse explicandam, *Res cogitans est res cogitans*, dicant necesse est hanc esse enuntiati hujus sententiam, *Ego cogitans sum cogitans*; in quo ite-

rum prodit illud *Ego*, quo plane continetur notio rei quæ sit. In hoc præterea enuntiato, *Ego sum cogitans*, vocula ista *sum*, quæ copula est utriusque termini, furtim hic indicat rem quæ sit: cuicunque enim adjungatur rei, notionem ei tribuit *existentiæ*. Cum igitur priores illæ duæ voculæ, *Ego sum*, notionem *existentiæ* adjunctam habeant, frustra ad eam assequendam tertia illa *cogitans* adjicitur; quæ *medius terminus* erit, si in syllogismini formam quadremus argumentum, *Quod est cogitans, est: Ego sum cogitans: Ergo sum*. Quippe si inde removeamus vocem *cogitans*, ut pote supervacuam, supererit hæc ratiocinatio, *Quod est, est: Atqui sum: Ergo sum*: quæ plane gemina est Chrysippæ hujus, *Si lucet, lucet: Lucet autem: Lucet igitur*. Præterea cum ait se cogitare, non modo sumit se esse, sed esse se rem agentem; in quo sumit tanquam certa & confessâ, & rem quæ sit, & actionem rei hujus. Scimus autem extitisse viros acutos & doctos, qui Cartesio in argumenti hujus inventionem glorianti responderint olim, nihilo certius esse illud, *Ego cogito*, ac cætera omnia, quæ

ab eo pro falsis habita sunt. Et recte sane: nam qui dubitat an sit, dubitare potest an cogitet. Atque id non alio præsidio defendere potuit Cartesius, quam quod sibi ipse eripuerat; lumine videlicet naturali, cui omnem omnino fidem detrahi iusserat. Hinc expedire se putant Cartesiani, cum dicunt res nobis per cogitationem esse cognitæ; cogitationem per seipsam. Quod longe secus est: nam cogitationem, perinde ut res cæteras, etiam quas cognoscimus lumine naturali, non aliter cognoscimus, quam cum mentem in eam retorquemus; hoc est, cum de ea cogitamus per novam cogitationem. Aliud enim est, de Sole cogitare; aliud, cogitare se de Sole cogitare. Prioris istius cogitationis Sol terminus est, posterioris prior illa cogitatio. Non autem ex priore elicitur isthæ conclusio, *Ergo sum*, sed ex posteriore. Atque hæc deinde uberius tractabuntur. Jam magistri sui præceptum illud, Ad cognoscendum verum detrahendam esse fidem lumini naturali, cum sic interpretantur, tantisper detrahendam ei fidem, dum expendantur denuo res per id cognitæ; ac ne hæc quidem, sed incertæ

tantum & dubiæ, benigne sane nunc nobiscum agitur, cum tantus illo dubitationum Cartesianarum apparatus, tam exquisitæ meditationes, tam severa illa lex, qua omnia habere jubemur pro falsis, ad id tantum redit, ut rebus incertis ne credamus temere; quod jam ante & à vilibus magistellis, & ab ipsis quoque nutricibus didiceramus. Quinetiam argumenti illius fundamentum hoc est, Qui cogitat, est: atque id præmitti debuit, ut argumentum legitimam hanc formam obtineret, Qui cogitat, est: ego cogito: sum igitur. En iterum promissum deserit Cartesius, fidemque fallit, & pro vero sumit id quod non minus dubium est ac reliqua quæ habenda duxit pro falsis. Adeo immemor est magnifici illius & generalis sui propositi, omnia habendi pro falsis. In quo proposito si perseverasset constanter, uti decebat Philosophum, quando occurrit istud ad ejus animum, Ego cogito, id quoque cum reliquis omnibus pro falso habuisset. Sin eximendum illud erat ex generali illa lege omnia habendi pro falsis, temeraria fuit & incauta illa lex; cui antequam submitteret animum, ju-

dicare debuerat nihilne esset ex ea excipiendum.

*Ex hoc enun-
tiato, Ego co-
gito, non certo
colligi potest
istud, Ergo
sum.*

VI. Excussimus antecedens hoc enun-
tiatum, Ego cogito; videamus porro
quid ex eo colligat Cartesius. Ergo sum,
inquit. Quid si negaverimus hoc ex illo
concludi, unde ejus comprobandi ar-
gumenta depromet? Nempe ex regulis
Dialecticæ: atqui omnia pro falsis ha-
beri jussit, ac idcirco regulas quoque
Dialecticæ. Initio quidem, inquiunt
Adversarii, falsas habere se finxit cum
cæteris omnibus, sed veras demum com-
perit, postquam à se expensæ sunt. Pri-
mum quæ scitis, ô boni viri, expensas ab
eo fuisse? Ego contra sentio, parum om-
nino de iis cogitasse; passim enim Dia-
lecticæ satis rudem se prodit. Expende-
rit vero & certas compererit; expensæ
quoque fuerunt ab Epicuro, & repudia-
tæ. Utri tandem habenda fides? Quid
clarius hoc argumento, *Lucet, igitur dies
est?* de connexionem tamen geminæ hujus
propositionis quanta contentio fuit
Chrysippum inter, Philonem & Diodo-
tum? Præterea non sibi soli philosopha-
batur Cartesius, sed mihi quoque & om-
nibus iis, in quorum manus scriptiones

ejus venturæ essent; nec id obscure præ se tulit. Quamobrem nec sibi soli expendere debuit regulas Dialecticæ, sed mihi quoque, cæterisque veritatis studiosis. Nec enim, opinor, postulatis à nobis, ut quæcunque expensa fuisse dicetis à Cartesio, iis illico animum subjiciamus. Quid si dicamus, etiamsi verum esse detur, cum esse qui cogitat, tamen esse quoque posse verum, cum non esse qui cogitat? Cartesii quippe sententia est, efficere Deum posse, ut contraria & repugnantia enuntiata, vera simul esse possint. Unde sequitur fieri posse, ut qui cogitat, sit & non sit. Quod si tam verum sit, cum qui cogitat, non esse, quam esse, videat Cartesius ecquid certi argumentatione sua possit efficere, ex qua tam contraria effici possunt. Instabit rursus, ac repugnare dicet, id quod cogitat non esse cum cogitat. At nos quoque pari jure dicemus, repugnare id quod est, non esse cum est. Cum igitur hæc stare simul posse docuerit Cartesius, etiamsi repugnent; stare hæc quoque possunt, cogitare aliquem & non esse. Hanc doctoris sui sententiam abnormem licet & deliram, agnovere

vetustiores Cartesiani; & deseruere quidam, plures defendere: recentiores velut falsò ipsi affictam ab eo abjudicare. Nempe puduit eos ineptiæ hujus: in re aperta veritati repugnare non puduit; cum Cartesium id sensisse negarunt, quod compluribus locis clarissime traditum ab eo est. Velut cum ad Morum scribit, quidquid sibi videtur posse fieri, Deum facere posse; nec negare se tamen, quin ea quoque Deus facere possit, quæ sibi repugnare videntur. Sciscit passim in Epistolis, Deum essentia rerum creatarum, itidem ut *existentia*, auctorem esse; enuntiata æternæ veritatis, cujusmodi illud est, *Totum est majus sua parte*, non esse necessarias, habita Dei ratione; res idcirco esse veras aut possibiles, quod ita Deo visum sit; efficere denique Deum posse, ut res secum pugnantes simul extent. Quæ cum os eorum opprimant, qui hæc à Cartesio fuisse proditanegare ausi sunt, eo confugerunt tandem ut dicerent, id si ab eo propositum est, ex eo esse genere figmentorum, quæ extra metas rationis abeunt. At quandoquidem hæc & serio, & crebro dicta sunt ab eo, & argumentis ro-

*Cart. Epist.
Tom. 1. Epist.
67. 110. 111.
115. Tom. 2.
Epist. 15, 16,
104. Tom. 3.
Epist. 68.
Resp. ad 6.
Object.*

borata, cum adversus acutissimos viros doctrinam suam defenderet; non ut figmenta, sed ut meditata dogmata, & ex intimo Philosophiæ suæ penu depromta protulisse judicamus. Fatetur is quidem animo percipi hæc non posse: quod alterum ejus flagitium est: cum unum hoc sit ex primariis hujus doctrinæ principiis, ea tantum pro veris esse admitenda, quorum clara est in nobis & distincta idea; hoc est quæ clare & distincte percipimus.

VII. Huc accedit, quod propositioni huic (sic enim appellatur à Cartesio) Ego cogito, ergo sum, quam omnium primam esse putat, aliæ plurimæ præverti debuerunt: nec eæ solum quas ipse vidit, velut hæc, Quidquid cogitat, est; sed ista quoque quæ anterior est & simplicior, Quidquid agit, est. Nec id quidem scire possumus, quin prius noverimus quid sit agere, quid esse. Ut noscamus autem quid sit agere, noscendum est, quid sit agens, quæ caussa, qui modus, qui finis agendi. Rursum ut noscamus quid sit esse, noscendum est quid sit id quod est, quæ caussa cur sit, quomodo sit, quo fine sit. Præterea re-

*Notio hæc,
Ego cogito,
ergo sum, non
est omnium
prima.*

gulas Dialecticæ perspectas eum habere
 necesse sit, quisquis ex his sumtionibus,
 Qui cogitat, est; Ego cogito, colligi cer-
 to putat conclusionem istam, Ergo sum.
 Respondet Cartesius, quæcunque ante-
 cedunt notioni huic, Ego cogito, ergo
 sum, lumine naturali esse cognita: at
 ego contra hæc longe ignotissima esse
 pertendo. At aliter se expediunt Car-
 tesiani: præcise enim negant proposi-
 tionem hanc, Quidquid cogitat est, his
 præverti debere, Ego cogito, Ergo sum;
 auctoritatem dictatoris sui palam asper-
 nantes, qui cum cætera revocaret in du-
 bium, id unum admitteret, Ego cogito,
 Ergo sum, subjecit rationem hanc, velut
 opinionis suæ fundamentum, pugnare
 hæc inter se, id quod cogitat, eo ipso
 tempore quo cogitat, non esse. Post-
 modum etiam scribit conceptis verbis,
 se non negare, quin antequam sciamus
 nos cogitare, ac proinde esse, scire de-
 beamus, fieri non posse, ut quod cogitat
 non sit. Hoc autem nituntur argumento
 Cartesiani, ex propositionibus singula-
 ribus educi propositiones universales;
 ideoque ex his propositionibus, Ego
 cogito, Ergo sum, prodire istam, Quid-
 quid

*Cartes. Princ.
 Part. 1. §. 7.*

*Cartes. Princ.
 Part. 1. §. 10.*

quid cogitat est. Fatemur nos atque sic cognosci ea quæ cognoscuntur per inductionem : velut illud, Omnis homo est animal, quia nullus unquam visus fuit homo, qui non esset animal : secus ea, quæ ex seipsis, & lumine naturali cognoscuntur; quale hoc est; Totum est majus sua parte. Hæc in Scholis cognosci dicuntur à *priori*, ista à *posteriori*. Cognoscitur autem illud ex seipso & lumine naturali, Quidquid cogitat est, ipso auctore Cartesio. Nec proinde ex istis prodiit, Ego cogito, Ergo sum. Cum utuntur autem exemplo trianguli, cujus ideam generalem ex singularibus triangulorum ideis natam volunt; doctrinæ quam profitentur, vel immemores sunt, vel inconsulti. Nam inter innatas in nobis ideas, ponit Cartesius ideam trianguli. Instant vero, &, Mens, inquit, ut noscat omne id esse quod cogitat, cogitet necesse est; cogitare autem non potest, quin noscat se cogitare; nec noscere potest se cogitare, quin noscat se esse : ante igitur noscit se cogitare, seque esse, quam noscat omne id esse quod cogitat. Nos vero concedimus mentem ante cogitare, quam cogitet. se

Cartes. Princ.
Part. I. § 10.

Cartes. Epist.
Tom. I. Epist.
297.

cogitare ; ante cogitare se cogitare, quam ex eo quod cogitat concludat se esse; ante concludere se esse ex eo quod cogitat, quam cogitaverit omne id esse quod cogitat; at non antequam id sciverit. Sciebat quippe omne id esse quod cogitat, antequam cogitaret se idcirco esse quod cogitaret, at de eo non cogitabat. Ergo effatum hoc, Quidquid cogitat est, hac ratiocinatione prius erat notitia, posterius cogitatione. Nam cum veritas quæritur per Analysin, uti hic factum est à Cartesio, mens utitur notionibus quæ penes se extant, tanquam gradibus jam paratis, quibus ad veritatem perveniat. Cum ex notitia propositionis hujus Ego cogito, ascendere volo ad notitiam illius, Ergo sum, utor notatione hac mihi jam parata per lumen naturale, Quidquid cogitat est, tanquam gradu. Cum in tertia sua Meditatione *existentiam* Dei investigaret Cartesius per Analysin, sic tanquam gradu usus est notione quæ in mente sua jam ante extabat, rei cujusdam æternæ, infinitæ, omnipotentis ; item altera hac, quam in mente sua per lumen naturale impressam fuisse ait, Tantum in causa tota &c

efficiente inesse debere, quantum in causæ hujus effectu. Quod nisi jam ante parati essent illi gradus, frustra mens ad superiora niteretur.

VIII. Miramini porro inconstantiam Cartesii. Dubitandum esse statuit de rebus omnibus, etiam de iis quæ nobis per se lumine naturali nota sunt; ne exceptis quidem Theorematis Mathematicis; nec iis quoque principiis, quibus illa nituntur; velut isto, Totum est majus sua parte. Mox tamen multa passim admitti jubet, idcirco tantum quod lumine naturali nota sint. Certissimum & sine ulla dubitatione fatendum esse definit, se esse, quia cogitat; hoc uno argumento, *quod repugnet id quod cogitat, tum cum cogitat, non esse*. Quid aliud vero est *repugnare*, quam adversari lumini naturali, & falsitatem manifestam ac per se notam implicare? Ergo quæ adversantur lumini naturali, & quorum falsitas per se nobis nota est, sine ulla dubitatione repudiari jubet Cartesius, ut falsa; quæ vero consentiunt lumini naturali, & quorum veritas per se nobis nota est, sine ulla dubitatione admitti, ut vera. **Quæro autem, annon**

Sibi contradicit Cartesius, iis quæ lumine naturali nobis nota sunt, fidem aliquando tribuens, aliquando detrahens.

B. ij

tam lumini naturali contentiat, tamque per se nobis notum sit, Totum esse majus sua parte, quam eum qui cogitat esse? Cur ergo credam eum qui cogitat esse, idcirco quod lumine naturali id mihi notum sit; non credam totum esse majus sua parte, quod mihi lumine naturali æque notum est? Quid vero est sibi contradicere, in seque incurrere, si hoc non est? Hic hæreret sane Cartesius: nam quid in re tam aperta caussari possit homo pudens? Non ita Cartesiani, gens procax, & ad quidvis defendendum projecta. Dubitandum sibi esse statuebat Cartesius, inquiunt, de rebus lumine naturali cognitis, antequam eas expendisset; postquam vero sunt à se exploratæ, de iisdem desit dubitare. Hic ergo adhiberi volunt pervulgatam in Scholis distinctionem. Cartesium fatentur dubitasse & non dubitasse de iisdem rebus *in sensu diviso*; dubitasse nempe, antequam eas expendisset; non dubitasse, postquam à se expensæ sunt. Negant dubitasse & non dubitasse de iis rebus *in sensu composito*, eodem nempe tempore: pugnancia hæc esse, non illa. Primum, quí scitis, ô boni viri, hæc nus-

quam à Cartesio fuisse expensa, cum ea tanquam falsa repudiavit; expensa deinde ab eo fuisse, cum ea admisit tanquam vera. Quî scitis satis hæc ab eo expensa fuisse? Exponderit vero; an inquisitio isthæc Cartesii, norma est Philosophiæ? Expendit axiomata Geometrica, & vera esse comperit: expenderunt alii, item docti, & tanquam dubia rejecerunt. Vellut pronuntiatum illud, quo nititur Geometria, Quæ sunt æqualia rei alicui, inter se æqualia sunt, exploravit Cartesius, & verum esse deprehendit: exploravit Carneades, vir Cartesio nulla re inferior, in multis vel potius omnibus longe superior, & incertum esse deprehendit. Adde Cartesium hanc habuisse causam, cur dubitaret de rebus lumine naturali cognitis, quam tollere non potuit quantumvis attenta ejus inquisitio. Causa hæc erat, quod ignoraret, annon ea esset natura mentis humanæ, ut falleretur in iis etiam rebus, quæ videntur esse certissimæ. Quantumlibet ergo veras & lumini naturali consentaneas res ipsi ostenderit sua inquisitio, constabat adhuc illa dubitationis causa, annon mens humana pro sua conditione, quæ

mutari non potest, falleretur in iis rebus.
Cart. Medit. 3. Docuit præterea conceptis verbis Cartesius, nullam in se inesse facultatem ad deprehendum verum, cui tantum habeat fidei ac lumini naturali. Postquam igitur lumini huic detraxit fidem, nihil in eo superfuit amplius, cujus ope ad veri notitiam perveniret; non ars, non studium, non inquisitio, futilia ad assequendum verum præ lumine naturali præsidia. Denique cum passim tradat, non ante se deprehendisse, certam esse fidem luminis naturalis, nec fallere id nos posse, quam postquam agnovit Deum esse, nec eum esse fallacem; quidquid ex ejus inquisitione verum ei visum est, priusquam cognovisset Deum esse, pro incerto habere debuit. Non dum autem cognoverat esse Deum, cum prima hæc Philosophiæ suæ poneret fundamenta, & fidem luminis naturalis exploraret, ut ex ejus Meditationibus licet intelligere. Vana est ergo hæc Cartesianorum responsio.

*Enuntiatio hæc,
 Ego cogito,
 aliud significatur, quam*

IX. Aio rursus in hoc lemmate, Ego cogito, inesse ambiguitatem, atque aliud significari, quam quod intelligi

vult Cartesius ; ideoque nullam esse
 consecutionem hanc , Ergo sum, ut po-
 re ductam ex significatione, quam enun-
 tiato suo affingit Cartesius , non quæ
 eo re ipsa continetur. Tribus rebus con-
 stat omnis cogitatio ; mente cogitante,
 re menti cogitanti objecta, mentis cogi-
 tantis actione in rem objectam. Actio-
 nem dico ; etsi non me fugit cogitatio-
 nis nomen extendere Cartesium ad om-
 nes motus, quibus mens, vel movetur
 per se, vel aliunde afficitur. Sed quan-
 tum pertinet ad hanc disputationem,
 perinde est : nam cum afficitur, tria iti-
 dem necessaria sunt ; mens affecta, res
 mentem afficiens, affectio ipsa. Neque
 causa est, cur hic vitiligent Cartesia-
 ni, quod spectetur hic à me cogitatio,
 quatenus actio est, non quatenus affe-
 ctio : quippe, inquiunt, decrevit Carte-
 sius cogitationem esse actionem, non af-
 fectionem ; quod unum hic quæritur.
 Nempe mera hæc tergiversatio est ; nec
 enim id quæritur in præsentia ; sed an
 tribus rebus constet omnis cogitatio.
 Quærat tamen, ut volunt, an cogita-
 tio sit actio vel affectio. Cartesius, in-
 quiunt, cogitationem decrevit esse affe-

*quod vult
 Cartesius ; ac
 proinde ducta
 ex eo conclusio
 nulla est.*

*Cartes. Prin-
 cip. Part. 1.
 cap. 9.*

ctionem, non actionem. Quasi regula veri sit opinio Cartesii. Quam multi, quam præclari Philosophi cogitationem senserunt esse actionem? Quotus quisque Dialecticorum est, qui de mentis operationibus non differat? operationes vero quid aliud sunt quam actiones? Verum quid multa? Gentis hujus mores agnoscite; qui dum Cartesium defendunt, sententiam ejus vel dissimulant, quod perversitatis est; vel ignorant, quod socordix. Sic enim ille:

*Cartes. Resp.
ad Gassend.*

Cogitatio, tum pro re cogitante, tum pro istius rei actione accipi potest. Nego autem rem cogitantem alio præter se ipsam objecto indigere, ad suam actionem exercendam. Deinde: Cogitationis vox indiscriminatim pro omni animæ operatione accipitur. Et in Principiis duos esse tradit cogitandi modos, operationem intellectus, & operationem voluntatis. Quibus consentanea reperies in libris Cartesianorum. Quamobrem cogitationem, vel ut actionem spectare, vel ut affectionem, jus nobis fasque est. Commodior autem nobis erit in præsentia cogitationis notio, quatenus actio est. Igitur ut cogitem de Sole, necesse est

*Cartes. Princip.
Part. 1.
§. 32.*

mentem meam esse quæ cogitet, actionem mentis meæ qua cogitet, rem menti meæ objectam, nempe Solem, de quo mens cogitet. Cum ait igitur Cartesius, Ego cogito, quænam res menti ejus objecta est de qua cogitet? nempe ejus cogitatio. Cogitatio autem illa, non hæc ipsa cogitatio est, qua mens ejus nunc cogitat: nam si id esset, eadem esset actio, ac finis seu terminus in quem actio dirigitur; & actio illa in se ipsam retorqueretur; quod perabsurdum est, & adversarium lumini naturali, ad quod tam sæpe provocat Cartesius. Nisi alio fortasse utatur lumine naturali, ac reliquum vulgus hominum. Igitur cogitatio qua nunc cogito, alia est ac cogitatio de qua cogito: & enuntiatum hoc, Ego cogito, si evolvas, latere hoc in eo deprehendes, Ego cogito de cogitatione mea, quatenus cogitatio est; cujus non alia significatio est, quam istius, Ego cogito me cogitare. Ac ne ista quidem locutio vitio caret, aliter enim accipienda est ac dicitur, & tantumdem valet, ac si dicerem, Ego cogito me cogitasse: nam ut oculi, sic humana mens unicam tantum rem eodem tempore

directe potest intueri. Itaque ut cogitem me cogitare, duplex adhibenda est cogitatio, quarum alia reflecti debet in aliam, posterior in priorem, præsens in præteritam; ita ut prior menti obiecta sit in quam mens intendatur, posterior per quam mens intendatur in priorem; sive, ut paucis complectar, prior cogitatio erit finis sive terminus posterioris; posterior erit actio mentis, qua mens dirigatur in priorem. Repugnat enim utrumque effici per unicam actionem: quippe res una & eadem in se ageret, quod nemo homo vel primis Philosophiæ rudimentis imbutus dixerit. Quidni vero, inquit, mens de cogitatione sua cogitet una eademque cogitatione; cum Angelus, juxta Thomam, per suam formam, quæ est sua substantia, seipsum intelligat? At responsionem subministrat ipse Thomas, plurimum nempe mentem Angelicam differre ab humana; quippe *intellectum Angelicum non esse suum intelligere, sed primum objectum sui intelligere esse ejus essentiam; at intellectum humanum nec esse suum intelligere, nec sui intelligere esse objectum primum ipsam ejus essentiam.*

Thom. P. 1. q.

56. a. 1. &

q. 87. a. 3.

sed aliquid extrinsecum, scilicet naturam materialis rei. Statuit itaque mentem humanam de rebus plurimis, sub una & eadem idea comprehensis, cogitare posse, per modum unius, hoc est per unam speciem intelligibilem; non vero de rebus plurimis, comprehensis sub variis ideis, per modum multorum, hoc est per plures species intelligibiles; & quacunque intellectus per multas species intelligit, non simul intelligere. Ac concludit demum fieri non posse, ut idem intellectus simul perficiatur diversis speciebus intelligibilibus, ad intelligendum diversa in actu; sicut nec unum corpus potest simul diversis figuris figurari; & alium esse actum quo intellectus intelligit lapidem; & alium esse actum, quo intelligit se intelligere lapidem. Idem alibi docet id quod primo cognoscitur ab intellectu humano esse objectum extrinsecum; & secundario cognosci ipsum actum quo cognoscitur objectum; & per actum cognosci ipsum intellectum. Quæ si referuntur ad quæstionem propositam, videbimus Cartesium primo actu cogitare de Sole sibi objecto; secundo actu cogitare de hac cogitatione Solis; tertio

Thom. P. 1.
q. 12. a. 10. &
q. 85. a. 4.

Thom. P. 1.
q. 87. a. 3.

*Aristot. De
anim. l. 2. c.
4. & Topic.
l. 2. c. 4.*

actu de mente sua quæ cogitet. Atque hæc fulcit Thomas auctoritate Aristotelis, quæ parum valet apud Cartesianos. Hujus scitum est, *Objecta præcognosci actibus, & actus potentiis*; item, plurimum interesse scientiam inter & cogitationem; scire multa nos posse, de una tantum re nos posse cogitare. Contradicit Cartesius cum sua Schola, statuitque cogitationem *non alio præter seipsam objecto indigere*; fieri id per eam, quam vocant, *mentis abstractionem*; abstracta scilicet mente & deflecta à re cogitata, nempe Sole, ad suam cogitationem; quippe quæ ex cognitione suæ cogitationis educat cognitionem *existentiæ* suæ, non ex cognitione Solis; nec enim dici, Sol existit, Ergo sum; sed, Ego cogito, Ergo sum: divulgata igitur cogitatione à re cogitata, à Sole nimirum, solam permanere cogitationem, sine ulla re objectâ; quod perinde est, ut si dicant destrui & interire cogitationem hanc. Nam cum agnoscant positam esse naturam cogitationis in applicatione rei cogitantis ad rem cogitatam, sublata re cogitata, perire cogitationem necesse est. Quæ si pereat, retorqueri in seip-

fam, & reflecti non poterit. Urgent tamen adversarii, progressuras in immensum cogitationes, si ad cogitandum de prima cogitatione necessario requiritur altera cogitatio; & tertia ad cogitandum de secunda, atque ita in infinitum. Sed hæc ex Thoma petita à Thoma ipso diluuntur: fatetur enim cogitationes progressuras in infinitum, & mentem humanam infinitam esse, nempe *in potentia*, non *in actu*. Certum igitur omnino est, secundæ cogitationi Cartesii rem aliquam esse objectam, cogitationem scilicet præteritam; quæ cum antea esset cogitatio, fit nunc res cogitata. Unde colligitur mancum esse & imperfectum hoc Cartesii enunriatum, Ego cogito; atque hunc ejus esse intellectum, Ego cogito me cogitare; seu potius, si emendate & accurate loqui velit, Ego cogito me cogitasse. Qui cogitat autem se cogitasse, memoria uti debet, ut meminerit se cogitasse. Ubicunque autem adhibetur memoria, illic inesse posse errorem ipsi fatentur adversarii: siquidem memoria, ut sciscitabat Lacydes, opinio est; fallax est porro omnis opinio; nihilo enim certior

Thom. P. 1.
q. 87. a. 3. Q.
q. 86. a. 1.

sum me cogitasse, quam me ambulasse, me dormisse, me edisse. Hæc autem plane incerta sunt : incertum igitur me cogitasse. Quapropter nulla est, quæ inde cogitur conclusio, Ergo sum. Dicit fortasse Cartesius, etiamsi incertum sit me cogitasse, certum tamen esse me nunc cogitare me cogitasse ; conclusionem autem duci, non ex eo quod cogitaverim, sed ex eo quod nunc cogitem me cogitasse ; hoc est non ex cogitatione præterita, sed ex cogitatione præsentis. Nos vero negabimus, conclusionem hanc, Ergo sum, duci ex cogitatione ipsa quæ præsens est, & qua cogito me cogitasse ; sed ex cogitatione præterita, qua cogitabam de Sole. Cum enim cogitarem de Sole, mens per alteram cogitationem reflexa est in primam istam, ex eaque eduxit conclusionem hanc, Ergo sum. Nam si educeretur ex secunda cogitatione, educeretur utique per tertiam ; neque solum esset dicendum, Ego cogito, nec, Ego cogito me cogitasse ; sed, Ego cogito me cogitasse me cogitasse. Et secunda illa cogitatio perinde incerta foret ut prima : ac proinde &educta ex hac conclusio. Demus

tamen certum esse me cogitasse ; at tum certe mea me fallere potest memoria, cum aio, Ergo sum : nam cum de conclusione hac cogito, cogitare desii de enuntiato antecedente, Ego cogito ; nec ex hoc illud pendere aliter scire possum, quam ope memoriæ. Quid ad hæc Cartesiana Schola ? Fate-mur, inquit, opus hic esse memoria ; at memoriam negamus semper esse fallacem : fallax esse potest, cum vetera recordamur ; secus, cum recentia ; tum enim fallere nos non potest. En vero ante austera illa & rigida Philosophia, nunc mansuefacta, & ad vulgares opiniones accommodata : nam quæ res omnes primo habebat pro falsis, rediit statim in gratiam cum lumine naturali, & mox cum memoria ipsa & opinionibus ; qui fons est errorum omnium. Atque id quidem in ipso aditu, & nondum positis fundamentis. Hæremus enim adhuc in lemmate hujus argumenti, Ego cogito, Ergo sum ; quod initium est atque caput Cartesianæ Philosophiæ. Cæterum hic appello, non universos solum Philosophos, sed omne genus hominum, quorum nullus non

sæpe expertus est, repentinum aliquem sonum, fremitum muscæ volantis, inopinum quidpiam oculis objectum, adeo cogitationes omnes præsentēs & animo hærentes excutere, earumque ita obliterare vestigia, ut earum plane immemores hæreamus in medio sermone hiantes, nec interruptam orationem contexere possimus. Puderet certe Cartesium distinctionis hujus, qui in secunda Meditatione, cum veritatis rimaretur aditus, credendum sibi esse statuit, *nihil unquam extitisse eorum, quæ mendax memoria repræsentat*, nullo veterum & recentium discrimine. Et in quinta Meditatione, aliisque locis, dubitare se non posse ait, quin tres anguli trianguli sint æquales duobus rectis, quamdiu in animo habet demonstrationem qua id probatur; sed *statim atque* de eo cogitare desiit, quamvis eam à se clarissime perceptam recordetur, dubitare se tamen posse an vera sit, nisi Dei minime fallacis notitiam habuerit, per quem certus fiat veracem esse quam retinet perceptionis hujus memoriam. Nondum autem pervenimus ad disputationem de *existentia* Dei. Nondum

igitur, juxta Cartesii placita, fides ulla habenda est memoriæ; non solum cum vetera recordamur, sed etiam cum recentissima, *statim atque mentis aciem ab iis defleximus*. Cum fluxa sit autem & infirma hominum memoria, ad aliud lemma facile referri potest consecutio, quam ad id unde profecta est. Simile quid nobis in quotidiana familiaris sermonis consuetudine usuvenire solet, cum aliquantum dicendo progressi, unde ductæ sint consecutiones in quibus hæremus, & quorsum referendæ, non satis meminimus. Connexio itaque gemini hujus enuntiati, Ego cogito, & Ergo sum, incerta est & fallax; ac nulla proinde argumentatio. Huc accedit, quod cum hoc argumentum, Ego cogito, ergo sum, nitatur hoc pronuntiato, Quidquid cogitat, eo tempore quo cogitat est, sequitur me cum hoc colligo, Ergo sum, ex isto, Ego cogito, nihil aliud velle quam me esse eo tempore quo cogito. Atqui jam desit cogitatio illa, cum dico, Ergo sum: & aliud est tempus enuntiati antecedentis, Ego cogito, & aliud enuntiati consequentis, Ergo sum. Vel igitur id sibi

vult ista argumentatio, Ego cogito, ergo
ero; vel istud, Ego cogitavi, ergo sum:
& pronuntiatum hoc, Quidquid cogi-
tat, eo tempore quo cogitat est, unde
Cartesius pendere vult argumentatio-
nem suam, nihil ad eam pertinet; at-
que ut ad eam utile sit, sic immutan-
dum est, Quidquid cogitat, eo etiam
tempore quo non cogitat, est. Quæ om-
nia ita emendata & immutata, uti esse
debent, falsissima, ipso fatente Cartesio,
& ineptissima sunt. Ac telum hoc caute
se vitasse putant Cartesiani, cum dicunt
consequens esse in antecedente; & in
illo, Ego cogito, inesse istud, Ergo sum,
nullam ergo habendam rationem tem-
poris, quippe quocunque tempore sub-
jungatur, Ergo sum, tamen verum id
fuisse cum dixi, Ego cogito. Acuti ho-
mines! Nam idcirco quod consequens
illud, Ergo sum, est in illo anteceden-
te, Ego cogito, efficitur eo temporis
momento quo dico, Ego cogito, verum
esse, Ergo sum; nec tamen efficitur alio
tempore verum esse, Ergo sum. Quem-
admodum enim nulla erat hæc conclu-
sio, Ergo sum, antequam dictum sit,
Ego cogito; ita nulla est hæc conclusio,

Ergo sum, postquam dictum est, Ego cogito. Itaque attendenda hic est, non natura rerum, sed progressio animi in cognoscenda *existentia* sui. Aliter enim se habent in natura membra argumenti hujus, Ego cogito, Ergo sum; sumtio nempe & consequens; aliter in mente Philosophi. In natura enim sunt simul, neque ullum interest discrimen temporis; in mente Philosophi, non item. Nam postquam is de eo cogitavit, Ego cogito, cognitione cogitationis suæ jam parta utitur tanquam gradu, ut ad cognitionem *existentia* suæ, nondum sibi partam progrediatur: & hoc gradu nixus pervenit demum ad illam cogitationem, Ergo sum. Quæ duæ cogitationes tempore sunt ita discretæ, ut post priorem editam cogitationem, nondum edita altera interire possit Philosophus. Clarissime hæc ostendunt Meditationes Cartesii, quarum series ita ab eo exponitur, non uti res ab eo meditatæ extant in natura, sed uti in ejus animo aliæ ex aliis natæ sunt; vel, ut ejus verbis utar, *non in ordine ad ipsam rei veritatem, sed duntaxat in ordine ad suam perceptionem.* At provenerunt nuperi

Præf. Medit.

Cartesiani, qui se ex his angustiis alia tentarunt expedire ratione. Hoc enim enuntiatur, Ego cogito, & illud, Ego sum, etiamsi diversis temporibus utrumque profertur, eodem tamen tempore extare aiunt in mente Philosophi; prius in intelligentia, quæ res percipit; posterius in voluntate, quæ iudicia de iis facit & affirmat. Longum esset, at non valde fortasse operosum, ostendere aliquando intelligentiam agere, aliquando affici voluntatem, secus ac decrevit Cartesius: nunc satis est, ex ipsis Cartesianæ doctrinæ principiis demonstrare sumptionem hanc, Ego cogito, non minus extare in voluntate, quam consequens illud, Ergo sum: & consequens istud, Ergo sum, non minus extare in intelligentia, quam sumptionem hanc, Ego cogito: & quamvis hoc extaret in voluntate tantum, ista in intelligentia, non hinc sequi utrumque extare simul in mente Philosophi. Nam si evolvatur enuntiati hujus, Ego cogito, significatio, idem erit ac, Ego sum cogitans: in quo cum reperiantur *subjectum* & *prædicatum*, uti loquuntur Dialectici, & copula utrius-

que, negari non potest hanc propositionem esse iudicium seu affirmationem. Quæ cum ex voluntate sola proficiantur, ut pertendunt Cartesiani, plane dicendum est enuntiatur hoc, Ego cogito, perinde extare in voluntate, ut consequens, Ergo sum. Hoc ipsum vero consequens, Ego sum, hoc est, Ego sum existens, cum conflatum sit ex his ideis, Ego, & existens, quæ perinde sunt in intelligentia, ut ideæ illæ, Ego, & cogitans, quibus constat sumptio isthæc, Ego cogito, eodem modo est in intelligentia utraque propositio. Tamen si autem sumptio hæc, Ego cogito, extaret solum in intelligentia, & consequens, Ergo sum, in voluntate, non hinc tamen efficeretur eodem tempore extare utrumque in mente Philosophi. Nam antequam hoc iudicium, Ergo sum, voluntas facere possit, necesse est intelligentiam ei exhibuisse ideas, quæ his propositionibus continentur, Ego sum cogitans, Ego sum existens; tum convenientiam idearum illarum, nempe ideæ Ego, cum idea, cogitans; item ideæ, Ego, cum idea, existens. Et quoniam argumentum hoc, Ego sum cogitans, Ergo

sum existens, nititur enuntiato illo, Quidquid est cogitans est existens, necesse quoque est, ut convenientiam idearum illarum, cogitans, &, existens, voluntati repræsentaverit intelligentia. Ex trium illarum idearum convenientia, oriuntur tria voluntatis judicia, Quidquid est cogitans est existens, Ego sum cogitans, Igitur sum existens. Et cum compertam nondum haberet convenientiam ideæ, Ego, cum idea, existens, recurrit ad tertiam, nempe, cogitans; quam comparat primo cum idea, existens; & deprehensa utriusque convenientia, prodit prior sumtio, Quidquid est cogitans est existens: confert deinde ideam, Ego, cum idea, cogitans; & postquam eas novit congruere, nascitur altera sumtio, Ego sum cogitans. Ex quibus demum efflorescit quæsitæ conclusio. Antequam igitur judicia hæc faceret voluntas, ideæ illæ tres extabant in intelligentia Philosophi. Ex his deinde per vices judicia fecit voluntas; nam primo ignorabat an esset, cum sciret se cogitare, & quidquid cogitat existere: quibus antecedentibus notionibus, quasi gradibus, usus est Philo-

sophus, ut ad illam ascenderet, Ergo sum. Quæ cum ita se habeant, manifestum utrique est, simul ista in mente Philosophi non extitisse, ac futile esse hoc Cartesianorum commentum.

X. His opponunt præterea Cartesiani, quod & in eorum, Cartesiique adeo ipsius libris legitur; cum quis cogitat, eo ipso tempore quo cogitat, conscium esse suæ cogitationis, eamque sentire ac cognoscere; ut cum cogitat diem esse, non solum cogitare diem esse, sed & hanc ipsam cogitationem cognoscere; ita ut notitia cogitationis hujus eadem sit ac cogitatio ipsa, quæ secum sui conscientiam & perceptionem in animo imprimat, & idea cogitationis hujus non alia sit ab ipsa cogitatione. Sed hæc quam inania sint facile intelligitur. Latebram primum quærunt in confusione hac idearum toto genere discrepantium. Nam cum cogito diem esse, mens mea est principium cogitationis hujus; cogitatio est actio mentis; dies est finis cogitationis. At cum cogito me cogitare diem esse, mutatur finis cogitationis; tunc enim finis cogitationis non idem est qui erat, nem-

Cum quis cogitat de re aliqua, non eadem est idea rei hujus de qua cogitat, ac idea ipsius cogitationis.

pe, Dies est; sed alius plane, nempe, Cogito diem esse. Mutato autem fine seu termino, mutari actionem necesse est. Scitum quippe est Scholæ, *Actum habere speciem ab objecto*. Igitur posterior hæc cogitatio diversa penitus est à priorē, & perperam confunduntur. Nam qui dicunt cogitationem diei non differre à cognitione cogitationis diei, cum & iidem dicant cognosci diem per cogitationem diei; cognosci vero cogitationem diei per seipsam, pugnantia loquuntur. Diversæ enim sunt notiones rerum, cum res circa quas versantur hæ notiones, & illarum acquirendarum viæ diversæ sunt. Aliud est autem dies, aliud cogitatio diei; habetur notio diei per ideam diei, illa per seipsam, ut volunt Cartesiani. Diversæ sunt igitur notiones istæ. Huc adde posse me cogitare de die, nec cogitare de cogitatione diei: ineptum est autem dicere hæc esse unum & idem, quorum unum potest esse sine alio. Adde etiam, quoniam in enuntiato hoc, Ego cogito, post comparisonem *subjecti* Ego, cum *predicato*, Cogito, & post convenientiam utriusque agnitam, unum alteri tributum

tributum est, fieri id per *judicium*, quæ est secunda mentis operatio. Fieri autem non potest comparatio hæc, neque ulla hic agnosci convenientia, quam idearum. Nam cum idea habeatur *subjecti* illius *Ego*, si *predicati cogito* idea non haberetur, comparare non posset Philosophus id cujus in se extat idea, cum eo cujus nullam habet ideam; nec proinde affirmare se cogitare. Sin vero ex seipsa nota ei esset hæc cogitatio, quidquid in ea cognoscit, ei quoque ex se notum esset: cognoscit autem in ea suam *existentiam*: sua ergo ei ex se ipsa nota esset *existentia*. Pari ergo jure dicere possit, Ego sum, Ergo cogito, ut dicit, Ego cogito, Ergo sum; neque magis dubitare debuit de *existentia* sua, quam de cogitatione sua. Quinetiam quemadmodum dixit Cartesius, Ego cogito, Ergo sum, dicere quoque possum, *Cartesius cogitat, Ergo est*. Par est enim argumenti utriusque vis, par veritas. Atqui ex cogitatione Cartesii colligere non possum eum esse, quin cogitationis hujus Cartesianæ idea in me sit. Igitur ex sua cogitatione colligere itidem non potest Cartesius se esse,

quin suæ quoque cogitationis idea in se sit. Nam quamvis cogitatio hæc sit Cartesii, mea vero non sit, eodem tamen modo spectatur ab utroque nostrum, eodem modo usurpatur; nec aliam induit naturam, cum à me in argumentum adhibetur, aliam cum ab eo. Cum enim nihil nisi per ideam sentiri, nosci, percipi possit, sentire non possum me cogitare de die, -nisi per ideam cogitationis hujus. Ideam autem cogitationis, & ideam diei, qui eandem dicere auit, pari is jure dicat diem & cogitationem idem esse. Cartesius ipse audiatur ferens adversum se sententiam in libro de Methodo: *Est, inquit, alia actio mentis per quam aliquid bonum vel malum esse judicamus, & alia per quam nos ita judicasse agnoscimus, atque una sapissime sine alia reperitur. Quod si judicium de bono & malo reperiri potest, sine cognitione hujus judicii; cogitatio quoque quæ habetur de Sole, reperiri potest sine cognitione cogitationis hujus. Audia-* tur & Scholæ Princeps Thomas: *Alius est actus, inquit, quo intellectus intelligit lapidem; & alius est actus quo in-*

*Thom. Summ.
Part. 1. quest.
27. art. 3. ad 2.*

telligit se intelligere lapidem. At hæc fregisse se putant Cartesiani, cum aiunt noscere se diem per ideam diei; ac cogitationem diei noscere se per seipsam, non per ideam; res quippe quæ extra mentem nostram sunt, non aliter nosci quam per ideas; quæ vero sunt in mente nostra, velut cogitationes, nosci per seipsas sine ideis. Quæ quam vana sint, animadvertite. Noscimus mentem nostram, intelligentiam nostram, voluntatem nostram; & noscimus quidem ope idearum: hæc enim comparamus inter se, distinguimus, definimus; quæ sine affirmatione aut negatione fieri non possunt. Affirmatio autem & negatio non aliter fit quam ideam cum idea comparando, earumque deprehensa convenientia aut discrepantia. Quinetiam ideas sæpe nostras per ideas cognoscimus. Cum tria idearum genera distinxit Cartesius, naturalium, factitiarum, & adventitiarum, novit eas utique per earum ideas. Ideæ autem universales fiunt ex singularibus; ut & singulares nonnumquam ex universalibus. *Contendo ego*, inquit Cartesius, *esse in nobis ideas, non eorum tantum-*

*Cartes. Epist.
Tom. 2. Epist.
53.*

52 *Censura Philosophia*

*modo omnium, quæ sunt in nostra intelligentia; sed & eorum quæ sunt in nostra voluntate; nec enim velle quicquam possumus, quin nos id velle sciamus; nec id possumus scire quam per ideam. At quæ his subjicit, valde absurda sunt, nempe ideam hanc eandem esse ac ipsam actionem. Nam qui vult legere, hanc mentis suæ actionem cognoscit per ideam; cujus ideæ causâ est ipsa actio: ideam autem actionis cum actione confundere, causâ cum effectu confundere est. Alibi ideam mentis nostræ & ideam cogitationis ponit in numero idearum, quæ in nobis innatæ sunt: & ideam definit, *Quidquid potest esse in mente nostra.* Cui consequens est cogitationem Solis idea sua non carere, per quam cognoscitur, cum cognitio hæc sit in mente nostra. Sic & Thomas, cujus auctoritati multum videtur tribuere Cartesiana factio: *Intellectus nostrer intelligit seipsum per speciem intelligibilem* Concedamus id tamen; nam & aliis quoque Philosophis visum est cogitationem omnem adjunctum habere & comitem sensum quemdam & perceptionem sui: ut cum volo ambu-*

*Cartes. Medit.
3. Epist. Tom.
2. Ep. 34.*

*Thom. Part. 1.
q. 14, a. 2.*

lare, non solum volo ambulare, sed volo & probō hanc voluntatem ambulandi. Quemadmodum cum oculis domum intueor, duplex fit visio, altera directā qua domum video; altera obliqua, qua vicinas arbores: ita cum cogito diem esse, duplicem aiunt esse cogitationem; directam alteram, quæ est diei; alteram obliquam sive adjunctam & comitantem, quæ est cogitationis diei. Carneades quoque cum de Criterio disserteret, dicebat ex re aspectabili hominis oculis objecta existere phantasiā, quæ & sui & rei aspectabilis notionem in animo signaret; & lucis utebatur exemplo, quæ & seipsam & alias res aspectabiles efficeret. Verum nihil inde, quod causæ suæ proffit, colligent Cartesiani. Ut enim ex cognitione cogitationis meæ exprimam antecedens istud enuntiātum, Ego cogito, unde ducere possim hanc conclusionem, Ergo sum, non satis est ut cognitio illa sit obliqua & adjuncta, ac proinde imperfecta; sed necesse omnino est ut sit directā & perfectā: non satis est si sentiam me cogitare, sed necesse est ut cogitem me cogitare. Nisi enim

attento animo & accurate perlustretur & percipiatur enuntiati cujuslibet natura, significatio, & intellectus; certo sciri haudquaquam potest latere in eo conclusionem, quæ inde eruenda est. Quamobrem reflecti debet animus & defigi in priorem hanc suam cogitationem. Prior autem illa cogitatio, erat mentis cogitantis actio in rem sibi objectam de qua cogitabat; ea vero res objecta, finis erat, ut dixi, cogitationis: nunc autem actio illa fit finis novæ cogitationis, & mens in eam agit nova actione. Ruit itaque omnis hæc exceptio.

Falsum est istud, Ego cogito, ergo sum, nobis cognitum esse per simplicem visionem, non per ratiocinationem.

XI. At Cartesius, ejusque affectatores, ut duo hæc, Ego cogito, ergo sum, quæ facile divelli posse prospiciebant, firmitus adstringerent, & in unum conglutinent, negare ausi sunt nobis hæc esse per ratiocinationem cognita, sed per simplicem, ut vocant, visionem. Quippe fatentur ratiocinationem omnem errori esse obnoxiam, cum memoria opus habeamus, cujus ope principiorum & sumtionum recordemur, unde conclusiones ducimus; memoria autem fallax sit & infida. Igitur si to-

tum istud, *Ego cogito, ergo sum*, meram esse ratiocinationem docuero, nec per simplicem visionem nosci posse; incertum hoc esse & dubium utique probavero; falli vero, vel fallere qui ratiocinationem negant esse ratiocinationem. Quæro ergo quid sit ratiocinatio, sive argumentatio: annon actio mentis humanæ per quam ex principiis cognitis educitur conclusio, rem notam faciens quæ antea erat incognita? Sive malimus uti verbis Thomæ Aquinatis, *Processio de uno intellectu ad aliud, ad veritatem intelligibilem cognoscendam*. Annon autem in gemini hujus enuntiati complexione totum hoc reperitur? Nescire enim se profiteretur Cartesius in aditu Philosophiæ suæ, an sit. Ut autem ad rei hujus ignotæ notitiam perveniat, quærit aliquid quod sibi sine ulla dubitatione cognitum sit. Id esse vult, *Ego cogito*; atque id ponit ut principium exploratissimum. Ponit & illud, ut lumine naturali notissimum, *Quidquid cogitat, est*. Tum ex gemino hoc principio sibi cognito, *Quidquid cogitat, est; atqui ego cogito*, notitiam assecutum se ait

Thom. Summ.
Part. 1.
Quæst. 79.
art. 1.

rei quam ignorabat, nempe, *Ergo sum*. In qua conclusione *prædicatum*, ut vocant, adjungitur *subiecto*; nempe hoc *Sum*, illi *Ego*, per connexionem medii termini *Cogito*, qui præmissis sumtionibus intextus est. Quæ si quis perfectum conflare syllogismum negaverit, rudis ille sit Dialecticæ totius. Legatur secunda Cartesii Meditatio, manifesto apparebit progressio mentis per cognitionem cogitationis suæ, ad perceptionem rei prius incognitæ, nempe se esse. Ad id autem quod aiunt Cartesiani, cum quæreret Cartesius an existeret, de eo quidem ipsum non dubitasse, sed finxisse se dubitare, etsi hoc jam ipsis effugium præclusum est, dicemus tamen non hic disputari inter nos quid de *existentia* sua senserit Cartesius; sed annon quærendam & probandam suscepit suam *existentiam*; atque hoc suscepto, annon per argumentationem & ratiocinationem probare eam sategerit. Atqui hæc in prima sua & secunda Meditatione, & in suis Philosophiæ Principiis clarissime disputavit, magnoque molimine suam exquisivit *existentiam*, quam ex eo collegit demum quod

cogitaret. Insolens porro est & ineptum quod addunt, pertinere ad naturam syllogismi, conclusionem ex se notam non esse; cum nota autem nobis ex se sit *existentia* nostra, argumentum illud Cartesii, quo eam probare instituit, argumentum non esse. Itane vero? si nota nobis ex se est nostra *existentia*, cur de sua dubitavit Democritus, cur Academici de sua? Nota enim sit ex se conclusio, necne, oriatur modo ex vi propositionum, quas *premissas* vocant, legitimum erit argumentum. Quid ex se notius, quam Axiomata Geometrarum? ea tamen demonstrare tentavit Apollonius Pergæus: nec id fecisset sane, si in eo ludere se operam putasset. Nihil enim tam ex se notum est, quod non alicui Philosopho dubium & ignotum esse possit. Annon per se notum est, æqualia esse inter se, quæ alteri æqualia sunt? falsum id tamen, ac proinde ignotum Carneadi fuit, & demonstratione eguit. At quod in eorumdem libris legitur, propositionem hanc, *Ego sum*, atque argumentum etiam illud, *Ego cogito, Ergo sum*, esse axiomata, ridiculum est & omnibus cachin-

nis dignum; summamque prodit sectæ
 hujus imperitiam. Axiomata enim ap-
 pellari vulgo solent effata quædam uni-
 versalia, immutabilis & æternæ verita-
 tis; qualia sunt illa Geometrarum. Pro-
 positiones autem istæ cum singulares
 sint, & circa *individua* versentur, mu-
 tabiles sunt & incertæ, nihiloque ma-
 gis Axiomata dici possunt, quam quæ-
 vis alia propositio. Jam vero dum ex
 his nodis extricare se conatur Carte-
 sius, in alios se laqueos induit; negat
 enim, eum qui dixerit, *Ego cogito*,
Ergo sum, *existentiam* suam ex sua co-
 gitatione per ratiocinationem deduce-
 re, sed tanquam rem ex se notam sim-
 plici mentis intuitu agnoscere; quippe
 si *existentiam* suam ex sua cogitatione
 per ratiocinationem colligeret, jam
 ante notam habere debuisset propositio-
 nem istam, *Quidquid cogitat est*; cum
 potius concludat Philosophus id omne
 existere quod cogitat, ex eo quod in se
 experiatur, non posse se cogitare, nisi
 existat; hanc enim esse mentis nostræ
 naturam, ut universales propositiones
 constet ex singularibus. Quorum sive
 pœnitens Cartesius, sive oblitus, con-

Cartes. Resp.
 ad secund.
 Object.

Cart. Princip.
 Part. 1. §. 10.

traria omnia in libris Principiorum attulit; nempe antequam quis sciat, idcirco se esse quod cogitet, huic esse sciendum, fieri non posse, quin id omne sit quod cogitet; proptereaque certum hoc esse, *Ego cogito, Ergo sum*,

quod repugnet ut putemus id quod cogitat, eo ipso tempore quo cogitat, non

Cart. Princ. Part. 1. §. 7.

existere. Non igitur universale illud,

Quidquid cogitat est, ex singulari hoc efflorescit, *Ego cogito, Ergo sum*, neque illo posterius est; sed è contrario

hoc singulare tanquam fundamento nititur hoc universali. Traditum præterea ab eo est in Epistolis, innatas in nobis esse ideas, quæ æterna illa & immutabilia nobis effata repræsentant. Cujusmodi cum sit illud, *Quidquid cogitat est*, id cognoscimus ex natura nostra, non ex aliis notionibus derivatum habemus. Quæ cum ita sint, inconsiderate agunt Cartesiani, qui ideo quod enuntiatur hoc, *Quidquid cogitat est*, ex natura nostra cognoscimus & per simplicem visionem, reliquas quoque hujus argumenti partes, *Ego cogito, Ergo sum*, eodem modo nobis esse cognitæ volunt. Major enim pro-

Cartes. Epist. Tom. 1. Epist. 54.

positio isthæc, *Quidquid cogitat est*,
effatum est immutabilis & æternæ veri-
tatis. Minor autem propositio, *Ego
cogito*, temporalis est, mutabilis & in-
certa. Ac proinde & ipsa conclusio.
Quæ ergo res tam discrepantis naturæ,
tam diversæ, uno mentis & simplici in-
tuitu spectari possint? Huc adde absur-
dum illud; si utrumque hoc, *Ego co-
gito*, &, *Ergo sum*, per simplicem vi-
sionem cognoscuntur, hoc est per uni-
cam mentis actionem; cognoscuntur
simul, eodemque modo, & eodem
tempore; ita ut cognitio unius non
pendeat ex cognitione alterius. Quæ si
ita sint, non magis, nec prius cognosci-
tur, *Ego cogito*, quam, *Ergo sum*; ac
proinde ex hoc pronuntiato, *Ergo sum*,
tam recte colligi potest istud, *Ergo co-
gito*; quam ex hoc, *Ego cogito*, colli-
git illud Cartesius, *Ergo sum*. Quod si
istud vero, *Ergo sum*, pendet ex hoc,
Ego cogito, atque inde educitur; ante
in hoc intendenda mens est, quam in
illud, ut ex cognito incognitum edu-
catur. Unde sequitur cognitionem pro-
nuntianti hujus, *Ergo sum*, posteriorem
esse cognitione illius, *Ego cogito*. Ta-

metſi enim hæc temporibus discreta non ſunt ſuapte natura, ſed exiſtant ſimul; at discreta certe ſunt in mente Philoſophi, ut jam adnotavimus. Primum enim ſciebat id omne eſſe quod cogitat; agnoſcit deinde ſe cogitare; ac denique ſe eſſe. Nec proinde unica eſt cognitio ſimplexve viſio utriuſque.

XII. Scrutemur ſtirpes omnes argumenti hujus, & eruamus. Dixi Cartesium aliam quoque habuiſſe cauſſam, cur à dubitatione initium philoſophandi ſumeret; nempe quod ignoremus annon ita ſimus facti à Deo, ut ſemper fallamur, etiam in iis rebus quæ nobis videntur eſſe notiſſimæ; quo in numero ponit, non Theoremata ſolum Geometrarum, ſed eorundem quoque principia. Nec jam ipſi movemus litem, quod figmentum ponit auribus Chriſtianis inuſitatum, Deum nos poſſe ſemper fallere, cum ſciamus Deum bonum eſſe, perfectum, veracem, veritatem ipſam, noſque ab ortu facere lucis ſuæ participes. Quippe id agnovit variis locis Cartesius ipſe, ſcripſitque Deum eſſe *ſumme veracem & datorem omnis luminis*; ac propterea plane re-

Ex hoc dubitandi argumento, quod à Cartesio propoſitum eſt, Neſcire nos annon ita comparati ſimus à Deo, vel à malo aliquo Genio ut ſemper fallamur, reſellitur iſtud, Ego cogito, ergo ſum.

Cartes. Princ. Part. 1. c. 29. Cartes. Medit. 1. & 2.

pugnare, ut nos fallat, sive ut proprie & positive sit causâ errorum. Alibi quoque non Deum, sed malum aliquem Genium valde potentem fingere mavult, animis nostris insidiantem, perpetuoque nobis offundentem tenebras & errores. Sed utivis causâ hanc assignet, meminerimus nos philosophari, & ipsum veritatis studium sive Philosophiam cujuscunque rei quantumvis absonæ fingendæ dare licentiam. Ex hac ergo lege adeo patente & generali, ita nos esse comparatos ut semper fallamur, cum nihil omnino exceptum sit, & nihil mihi sit adeo notum, quod non hujusmodi admonitio mihi falsitatis suspectum reddat; quidquid deinceps ad credendum mihi proponet Cartesius, id merito rejiciam, si priore ejus ac generali præcepto stare velim. En vero idem dubitandi auctor, repente mutatus ab illo cunctatore Cartesio, ac velut jam factus certior non ita se conditum à Deo, vel à malo aliquo Genio delusum, ut semper fallatur, affirmate & asseveranter pronuntiat se cogitare, ac ideo se esse, unico hoc persuasus argumento, quod repugnet id

quod cogitat, eo ipso tempore quo cogitat, non esse; proptereaque notionem hanc, *Ego cogito, Ergo sum*, omnium esse primam atque certissimam. Tum qui de omnibus omnino rebus dubitare decreverat, perfracto semel hoc repagulo, quod ipse objecerat sibi, jam quæcumque animo perspicue videre sibi videtur, quæcumque lumine naturali nota sibi esse fingit, verissima esse constanter affirmat & statuit. Quomodo vero qui nescire se ait, annon ita sit compositus à Deo, ut semper fallatur, scire potest se non falli, cum putat se esse, se cogitare; cum aliqua inter se pugnare existimat; cum animo se perspicue videre arbitratur quippiam; cum lumine naturali videtur ei aliquid notissimum? Unde id rescire potuit, quod mox ignorabat? Quanam exceptione dissolvit hoc argumentum, quod mox tantum apud eum valebat; quodque tanti est, ut eximii quidam viri de gregge Cartesianorum ingenue confessi sint, nulla ratione convinci eos posse, quicumque obstinate contenderint, hanc esse naturam hominis, ut semper fallatur? Quod si ex hac inscitiz humanæ

lege ea eximi jubet Cartesius, quæ lumine naturali cognita sunt, & Philosopho cuidam dicenti falsum esse posse hoc enuntiatur, *Ego cogito*, nihil aliud habuit quod responderet, ut dixi supra, quam id esse lumine naturali cognitum, admittat necesse est principia omnia Arithmeticæ & Geometriæ; velut ista, Duo tribus addita efficere quinque, &, Si æqualibus æqualia addas, quæ inde exurgent, fore æqualia, de quibus tamen dubitare statuerat. Hæc porro si cum cæteris Mathematicorum principiis admiseris, admittes quoque ducta ex iis Theoremata, ac totam proinde Geometriam. At fatetur Cartesius, & negari certe non potest, sæpe in eo peccari. Jam ergo erroribus fenestra aperta est, & vanescit omnis ille dubitandi apparatus, in ipso Philosophiæ ingressu ab eo instructus. Præterea si ea est natura hominis, ut in rebus clarissimis fallatur, cum lumen naturale sit hujus ipsius naturæ facultas, quantumvis perspicuas nobis & manifestas res faciat, legi huic naturæ nihilominus erit obnoxium, qua fit ut in rebus clarissimis homo fallatur: nec Cartesii ratio-

cinationes quantumvis acutæ naturam ejus fallacem & insidiosam mutabunt. Videat nunc quo se vertat Cartesius: nam si dicere pergit nescire se annon ita se habeat, ut semper fallatur, agnoscat falli se posse in eo, *Ego cogito, ergo sum*; ac proinde primum hoc non esse & certissimum Philosophiæ fundamentum; vel si id admitti jubeat cum reliquis, quæ lumine naturali cognita sunt, jam nihil esse ab erroribus tutum. Concurrent Cartesiani omnes & capita conferant, numquam inde se expedient; atque hoc everriculum est argutiarum omnium Cartesii, quæ ab hoc aditu in ejus Philosophiam irreperunt. Equidem cum tertiam ejus Meditationem legerem, mirari satis non poteram repugnantiam & dissensionem ratiocinationum. Quotiescunque, inquit, occurrit ad animum infinita Dei potentia, fieri cogor perfacile illi esse efficere ut fallar, etiam in iis quæ mihi videntur esse certissima. Mox subjicit, Quotiescunque attendo ad eas res, quæ mihi videntur esse certissimæ, tum erumpo in has voces, Fallat me Deus quantum potest, numquam tamen efficiet ut fallar,

cum credo me esse quia cogito, & duobus addita esse quinque; & cum fidem adjungo similibus pronuntiatis, quæ non possunt sine manifesta repugnantia non esse vera. Annon vides, Cartesi,annon sentis manifestam horum ipsorum quæ dicis repugnantiam? quæ perinde sunt, ut si diceres, Nihil est in quo errare non possim; Multa sunt in quibus errare non possum: item, Nescioannon fallar in rebus valde perspicuis; Scio me non falli in rebus valde perspicuis. At hic quoque recurrunt Cartesiani ad solennem suam responsionem; non dubitasse quidem Cartesium, sed tantisper finxisse se dubitare,annon ejus esset naturæ, ut semper falleretur, quoad expendisset propositas sibi causas de eo dubitandi; quibus expensis si infirmas & invalidas reperisset, uti factum est, constitutum sibi fuisse jam amplius de eo non dubitare: dubitasse itaque eum & non dubitasse de re eadem *in sensu diviso*; nimirum dubitasse antequam removisset causas dubitandi, & veritatem perspexisset; non dubitasse, postquam sibi perspecta veritas est, & sublata causa dubitandi: negant vero dubitasse

se eum & non dubitasse de re eadem *in sensu composito*, simul nempe & eodem tempore. Ego vero Cartesium aio etiam *in sensu composito* dubitasse & non dubitasse de re eadem, & pugnancia animo finxisse. Nam quo tempore dubitavit; annon ejus esset naturæ ut semper falleretur, si hoc ipso tempore decrevit de eo aliquando non dubitare; necesse est de eo simul eum dubitasse & non dubitasse. Dubitavit enim annon ejus esset naturæ, ut semper falleretur, cum de eo sibi dubitandum esse agnovit propter argumenta ab eo proposita in aditu Philosophiæ: simul etiam non dubitavit annon ejus esset naturæ ut semper falleretur, cum decrevit de eo non amplius dubitare post expensa hæc argumenta. Nam qui desinit dubitare an ejus sit naturæ ut semper fallatur, jam certus est se esse, vel non esse ejus naturæ, ut semper fallatur: qui vero dubitat an ejus sit naturæ ut semper fallatur, certus non est se ejus esse, vel non esse naturæ ut semper fallatur. Uno igitur & eodem tempore certus fuit Cartesius, & certus non fuit se ejus esse naturæ ut semper falleretur, hoc est, de eo dubi-

tatavit & non dubitavit. Quæ manifesto sibi adversantur. Quemadmodum si quis fingat naturam humanam ratione præditam non esse, ut id fingendo occasionem sibi præbeat, rationes comminiscendi, quibus eam ratione præditam esse probet; is profecto pugnancia sibi finget, sibi que ipsi contradicet: simul enim ponet naturam humanam ratione præditam non esse, talem eam esse fingens; & ratione præditam esse, rationes afferre statuens, quibus eam ratione præditam esse demonstraret. Aio denique frustra dici a Cartesianis, hanc habuisse rationem Cartesium, quam volunt, cur dubitandi legem proponeret. Nam cum argumenta afferret, cur a dubitatione suam ordiretur Philosophiam, multa quidem & gravia proposuit; neutiquam vero istud quod proferunt, ut sibi causa esset ea ipsa explorandi. Minime quoque ad tempus dubitare se dixit; sed ea e contrario proposuit argumenta dubitandi, quæ nulla unquam ratione elui possint. Quoniam autem meminit nondum sublatum esse propositum à se superius dubitandi argumentum, id nunc facere aggreditur. A Deo, inquit,

ita factus esse non possum ut semper fallar; nam id si esset, Deus esset deceptor; nullam autem habeo causam cur existimem Deum esse deceptorem; contra vero, cum sit summe bonus & summe perfectus, fallere me non potest. Si mecum Christiana religione imbuto agis, Cartesi, habebis utique non repugnantem, fateborque Deum summe veracem & perfectum nolle me semper fallere. Verum pugnamus hic ratione, non Fide; ex Philosophiæ principiis, non Theologiæ. Finge te itaque agere cum prisco aliquo Philosopho: sic ille tecum disputabit. Si nescis, Cartesi, annon semper fallaris, nescis quoque annon fallaris, cum ais, Si ita à Deo factus essem ut semper fallerer, Deus esset deceptor: & in eo sane falleris, nam is est deceptor, cujus dictis facta abludunt, & aliud præstat ac pollicitus est; Deus autem homini pollicitus non est, fore eum ita à natura comparatum, ut in rebus perspicuis numquam fallatur. Jam ergo qui de perspicuis dubitare te velle dixeras, ne dubitas quidem de falsis, Addet præterea is, quem fingimus, Philosophus, nescire te annon fallaris cum

ais, Deus quod sit summe bonus me non potest fallere; nec te scire, inquam, certo quid sit Deus, quid possit, quid velit: deinde aliud esse nos fallere, & *proprie ac positive esse causam errorum*; aliud vero, sinere nos falli: quemadmodum aliud est hominem occidere; aliud impendenti morti, de qua tamen sæpius monueris, non eripere. Addet etiam, ut Deus fallax dici non potest, quod tales nos effecerit, ut aliquando fallamur; nihilo magis fallacem dici posse, etiam si tales nos effecisset, ut semper falleremur: imo vero, cum crebro nos prolabi in errores sciamus, si pii esse volumus, imbecillitatem nostram expertos demississime de nobis debere sentire; quantumque Deo, qui summe ac semper verax est, inferiores simus subjectissime agnoscere; & ab inscitia nostra ad laudem Dei, non ad querelas & criminationes excitari; atque ita ad ejus gloriam conditos esse nos arbitrari. Docuisti ipse tu, inquiet, Cartesi, Deum errorum nostrorum auctorem fingi non posse, etiamsi intellectum nostrum intra certos sciendi & cognoscendi limites concluderit, nosque erroribus obnoxios

Cartes. *Princip. Part. 1.*
§. 29, & *sequent. Medit.*
4.

effecerit; imo gratias illi habendas esse de bonis quæ nobis largitus est; minime exoptulandum; quod non quæcumque largiri poterat, largitus sit; liberam quippe ejus esse in nos potestatem. Cur Deus autem verax & beneficus habebitur, si tales nos effecerit, ut sæpe fallamur? deceptor contra, si semper fallamur? Annon tales nos fingere potuit, ut numquam falleremur? at quamvis id omne nobis non tribuerit, quod poterat tribuere, fateris tamen nullo nos id jure queri posse; quo jure vero fallaciæ eum argues, si omnino id nobis denegavit, quod denegare potuit? Annon tam libera fuit ejus potestas, ut omnem, quam ut aliquam nobis veritatis notitiam eriperet? Quam inane præterea est quod ais, te causam non habere, cur ita te factum à Deo existimes, ut semper fallaris! annon falleris aliquando? qui vero ita factus est, ut aliquando fallatur, annon suspicari potest se ita esse factum, ut semper fallatur? annon fateris ipse, Cartesi, tam fieri posse ut semper, quam ut aliquando fallamur? fallimur autem sæpissime. Annon sciscis ipse, imprudentem esse qui

*Cartes. Prin-
cip. Part. 1.
§. 4. & 5.*

nimis iis confidat, quæ nos vel semel deceperunt? quam sæpe autem fallit nos nostra ratio? Sic tecum ager, inquam Philosophus ille. Subjungit deinde Cartesius, ne quidem adhuc se satis scire, an Deus sit aliquis; nedum an ab eo falli possit; ac propterea hæc sibi postmodum disquirenda proponit. Quænam vero hæc est in argumentando perversitas? Ignorare se primum dixit, annon à Deo ita sit conditus, ut semper fallatur; ac propterea sibi de omnibus esse dubitandum; tum quasi exploratum habeat, se à Deo ita non esse conditum ut semper fallatur, sumit quæsitum pro concessio, & multa esse docet de quibus non liceat dubitare; ac iis deinde sine dubitatione admissis demonstrare conatur Deum esse; ac demum talem se à Deo non esse creatum, ut semper fallatur. Nonne proposito primum hoc dubitandi argumento, quod nesciat annon ita à Deo sit factus ut semper fallatur, tollere illud debuit, antequam ulterius progredieretur? & demonstrato hoc, se à Deo non esse ita factum, ut fallatur in rebus lumine naturali cognitis, probare deinde cogni-
tum

tum sibi esse lumine naturali, se cogitare; ac demum sibi cognitum esse lumine eodem, se esse quia cogiter? Contra vero vitiosum illum admisit ratiocinationis circulum, Incertum est lumen naturale, cum ignorem annon ejus sim naturæ ut semper fallar: Non fallor cum dico, *Ego cogito, Ergo sum*, cum certum sit lumen naturale.

XIII. Hinc extricare se posse putarunt recentiores quidam Cartesianæ doctrinæ patroni, cum dicerent Deum, etiamsi fingatur fallax, non tamen fallere nos posse in iis rebus quas cognoscimus per simplicem, ut vocant, visionem, non per ratiocinationem: cujusmodi est illud, Bina binis adjuncta efficere quatuor; & cujusmodi illud quoque esse volunt, Me esse, quia cogito. Primum, cur sentiant falli nos non posse in iis quæ cognoscimus per simplicem visionem, rationem afferunt nullam. Imperiosi homines, qui hic & alias sæpe opinionationes suas edunt tanquam responsa e tripode, & pronis animis accipi volunt: præposterius etiam, qui eam tueri se posse putant Philosophiam, cujus fundamentum dubitationes sint, fig-

An verum sit, Deum nos fallere non posse in iis rebus quas cognoscimus per simplicem visionem.

menta fastigium. Pyrrhones in aditu, in exitu meri Pythagoræ. Nam qui omnia iusserunt haberi pro falsis, cur effatum hoc pro vero admitti sine argumento postulare audent? Pari supercilio, nullo allato argumento definiunt cognosci enuntiatum istud, *Ego cogito, ergo sum*, per simplicem visionem, non per ratiocinationem; quod falsissimum esse demonstravimus. At recentiores nonnulli Cartesiani, prioribus illis succenturiati, opinionem illam fulcire conati sunt hoc argumento, si ea quæ sibi per simplicem visionem cognita sunt, falsa esse possent, futurum ut nihilum esset causa archetypa suarum idearum: quod fieri omnino non posse autumant. Qua locutione captiosa & obscura id tantum sibi volunt, ideas suas sine causa archetypa esse non posse. Quod an consentiat cum decretis Cartesii, videamus. Tria is ponit idearum genera, earum quæ in nobis innatæ sunt, adventitiarum, & factitiarum; eas autem quæ in nobis sunt innatæ, a rebus externis proficisci negat. Id si sit, harum certe idearum causa nulla archetypa est. Nam si causa illa dicatur esse in Deo, causæ

quoque archetypæ falsarum idearum in Deo esse dicentur; cum efficere Deus possit, ex sententia Cartesii, ut res falsæ veræ sint. Rerum certe multarum ideas nascentibus nobis inferere potuit Deus, quæ nusquam extiterunt; nec propterea fallax esset; quippe si res illas judicaremus extare, ipsi nos falleremus. Præterea quænam dicetur esse causa archetypa puncti Geometrici? Cum dubitaret Democritus, atque ipse etiam Cartesius, an extaret aliquid, tùm in se utique agnoverunt multarum rerum ideas, quarum nullam extare fingebant causam archetypam. Nec impune interim ferre Cartesianos sinamus, quod cognoscere se aiunt per simplicem visionem, bis bina esse quatuor; quæ propositio est; sive, uti vocant, *judicium*, quod fit per secundam mentis operationem; in qua cum *prædicatum* adjungatur *subiecto*, ut ea cognoscatur, tria in ea cognoscenda sunt, *prædicatum* nempe, & *subiectum*, & utriusque connexio. Quod autem multiplex est, cognosci non potest per simplicem visionem. Verum qui idem de tertia mentis operatione, sive ratiocinatione asse-

verare ausi sunt, mirum si hoc & de secunda senserunt? Nec id temere: argumentationem hanc, *Ego cogito, Ergo sum*, ex tertio ordine operationum mentis revocant ad secundum, ne memoriæ lapsibus obnoxia sit; nunc ex secundo ordine detrudunt in primum, ut eam *judiciorum* sive opinionum erroribus subducent. Quod aiunt deinde fingi non posse à Deo hujusmodi hominem qui veritatem nullo modo agnoscat; etsi hoc ego homo Christianus fateor perlibenter, at quo tandem pacto consentire id potest pervulgato huic Cartesianæ Philosophiæ decreto, Efficere Deum posse, ut duo & duo non sint quatuor, & ut repugnantia effata simul vera esse possint? Fingamus enim Deum id effecisse quod efficere posse aiunt, & bis bina non efficere quatuor; tum certe fallar cum cognoscam, sive per simplicem visionem, sive quocunque alio modo, duo duobus addita esse quatuor. Fingamus quoque Deum effecisse, ut qui cogitat non sit, vel ut non cogitet cum cogitat, fallar profecto cum dicam, *Ego cogito, ergo sum*. Efficere igitur Deus potest, ut fallar in iis quæ

cognosco per simplicem visionem, quandoquidem efficere potest ut falsa sint, quæ per simplicem visionem vera esse cognosco. Denique quomodo hæc consentiunt & isti Philosophiæ ejusdem præcepto, quo jubemur habere pro falsis principia omnia Geometriæ, ac propterea & istud, Totum est majus sua parte? Cum enim pronuntiatum istud, Duo duobus addita efficiunt quatuor, pendeat ex universali hoc effato, Totum est æquale omnibus suis partibus simul sumtis; atque id porro conjunctum sit & copulatum alteri huic, Totum est majus sua parte; quonam argumento falsum habebō postremum hoc; prius vero ita certum esse credam, ut in eo ne à Deo quidem falli possim? Videtis inconstantiam & dissensionem fastidiosæ illius Philosophiæ, quæ certam se jactat reperisse viam veritatis.

XIV. Ergo cum scribit Cartesius in Methodo se Philosophiam primum capessentem, & à dubitationibus exordium esse censentem, dubitandum non esse decrevisse more Scepticorum, *qui dubitant, inquit, ut dubitent, & præter incertitudinem nihil querunt,*

Cartesius in exorsu Philosophiæ Academicæ & Scepticos affectatus, statim errat, ut eos deseris.

sed dubitationes suas repressisse & fixisse in certissima principii hujus notitia, *Ego cogito, ergo sum* : cum, inquam, hæc scribit, in eo errare incipit, quo incipit discrepare à Scepticis. Hi enim & ille viderunt esse dubitandum ; at dubitare ille tum desuit, cum erat maxime dubitandum ; in hoc videlicet principio, quod non minus incertum est ac reliqua omnia quibus adductus erat ad dubitandum ; hi dubitare pergunt in eodem illo principio, de quo vel maxime dubitandum esse vident : haudquaquam certe dubitantes ut dubitent ; quod minime insimulasset Cartesius, si rationes eorum diligentius perspexisset ; sed ideo dubitantes, quod nihil ipsis satis liquido, satisve certo percipi posse videatur. Scirent vero Cartesiani ultimum Scepticæ Philosophiæ finem non esse dubitationem, sed animi tranquillitatem in iis quæ pendent ex opinione, constantiam in iis quæ vitari non possunt : dubitationem vero, hoc est *ἐμπόδιον*, finem quoque esse, sed proximum ; unde oritur tranquillitas animi & constantia, in quibus conquiescebant, sic tanquam in fine ul-

timo : in ἐπιχρῖ vero tantisper hærebant, quoad quæsitæ tranquillitatis & constantiæ compotes essent. Scirent etiam frustra Scepticis objici a Cartesio, eos ἐπιχρῖ sua tanquam compede constrictos, pericula ac mortem ipsam non vitasse. Reipsa factum id ab iis censuit vulgus, quod ex eorum doctrina consequi adversarii causabantur, & ex Antigoni Carystii fide proditum hoc est a Diogene Laërtio, in opere tumultuario atque rudi, neque postremis curis perpolitio, in quod sine delectu congestum est, quidquid vel exceperit ex rumoribus vulgi, vel in veterum scriptis obvium habuit. Tantum autem ab hac insania abfuerunt Sceptici, ut potius ex sectæ suæ instituto deberent obsequi legibus, moribusque receptis, & communi vitæ usui. Quæ clarissime explicata sunt a Sexto Empirico. Scirent præterea Cartesiani, non solam hanc nec præcipuam habuisse Scepticos assensionis retinendæ causam, quam afferunt ac derident; nempe quod aliquando reperiri possint rationes dissentienti, iis rationibus contrariæ quæ nunc ad assentiendum nos impellunt. Longe plures habuerunt

Sceptici causas dubitandi, ex quibus prodierunt decem modi ἐποχῆς, quos commenti sunt vetustiores; tum quinque alii deinde sunt excogitati; & alii postmodum duo; & octo demum, quibus recentiores usi sunt adversus Dogmaticos. Scirent quoque vel hanc ipsam ἐποχῆς causam, quam ludibrio habent, probam esse atque rectam. Annon enim magistra ætate, experientia, studio, meditatione sapientiores fiunt homines, emendatis infantia opinionibus, erroribus depositis? Scirent etiam longe aliud esse, fontem ultimum dubitationis habere dubitationem ipsam, quod Scepticis tribuit Cartesius; aliud dubitare, ne novis repertis rationibus temerariæ assensionis aliquando nos pœniteat. Scirent denique falli se vehementer, cum putant negare non posse Scepticos, evidens esse hoc argumentum, *Ego cogito, Ergo sum*; cum e contrario unum hoc sit e præcipuis Scepticæ doctrinæ capitibus, nihil esse evidens. Vel inde ergo intelligat superba illa gens Cartesianorum, contemnere solita veterum doctrinam, unam suam mirari, & sua inscitia gloriari, quam

sint præposteræ & imprudentes, cum ea scire videri volunt, quæ nesciunt; sibi-que multo esse conducibilius remittere aliquid de hoc fastu, & ad antiquæ Philosophiæ studia demittere animum, quam ex turpi ignorantia dedecus sibi consciscere.

XV. Quorum doctrinam convellere dum nititur Cartesius, valide sane confirmat hoc argumento quod excussimus, nescire nos annon ita a Deo facti simus, ut semper fallamur. Huic enim argumento cum unicam illam habuerit contradictionem quam opponeret, si ita essemus à Deo facti ut semper falleremur, Deum fore deceptorem; nec eam reliquæ ejus doctrinæ consentaneam esse ostenderimus, manifestum est nihil Scepticorum & Academicorum sectæ conducibilius afferri potuisse. Fatentur enim Cartesiani omnes, ipseque adeo Cartesius, nisi constet nos ita à Deo non esse factos, ut semper fallamur, scire nos non posse an certa sint Theoremata Geometrarum, an ulla extet materia rerum, resve ullæ materia concretæ, & an mundus iste aspectabilis revera extet, uti extare videtur, &

Fatetur Cartesius nullam nos habere veritatis normam, nisi constet nos ita à Deo non esse factos, ut semper fallamur.

nullam denique nos habere normam veritatis; ac ne somnia quidem à rebus veris internosci posse: quæ mere Sceptica sunt. Nam quod aiunt Cartesium dubitationem simulasse, Scepticos revera dubitasse, postremum hoc fate-mur, prius illud nullo argumento ap-probant. Qua enim nota discerni possit simulata illa dubitatio Cartesii a vera dubitatione Scepticorum? Philosophantur Sceptici itidem ut Cartesius, veritatem anquirunt utrique, utrique errores vitant, vitari eos per dubitatio-nem utrique censent, ideoque dubita-tionem utrique profitentur. Verum cum urgentur utrique ab adversariis, Carte-sius in manifesta inconstantia & opinio-num discrepantia deprehensus, susce-ptam ejurat dubitationem, & postquam ejus commodis ad Philosophiam suam abusus est, simulationem simulat, ne sinceræ dubitationis noxas præstare co-gatur; quod Philosophico candore in-dignum est. At egregie contra sibi opn-stant Sceptici; dubitationem suam per dubitationem defendunt, nec discedunt a suis principiis; cum iisdem artibus ac Cartesiani, simulatione eadem, ac pari

jure causam suam tueri possent. Ex his porro exoritur alia disputatio de norma, quam ad veritatem explorandam adhiberi jussit Cartesius. Quæ veritatis explorandæ norma si exploretur ipsa ad normam judicii, prava & tortuosa esse deprehenderetur. Atque id sane ut faciamus postulat ordo institutæ disputationis.

CAPUT SECUNDUM.

Expenditur Cartesii sententia de Criterio.

I. *Perversum Criterii quarendi viam insistit Cartesius.* II. *In eo quarendo parum sibi constat.* III. *& in eo quoque assignando.* IV. *Distinguit claram & distinctam Perceptionem à Lumine naturali, & à Perspicuitate generaliter sumta, & à Notitia rei ex re ipsa hausta.* V. *Lumen naturale Cartesii non est certum Criterium.* VI. *Neque clara ejus & distincta perceptio.* VII. *Quid sit idea, juxta Cartesium.* VIII. *Refelluntur argumenta, quibus probare conatus est Cartesius, claram & distinctam Per-*

84 *Censura Philosophia*

ceptionem esse certum Criterium. IX. Argumentis oppugnatur hoc Criterium. Primum argumentum. X. Secundum argumentum. XI. Tertium argumentum. XII. Quartum argumentum. XIII. Quintum argumentum. XIV. Neque Perspicuitas, neque Notitia rerum à rebus ipsis hausta, sunt certa Criteria. XV. Refelluntur praecepta veri cognoscendi à Cartesio tradita. XVI. Inanis est, quam ad percipiendum verum adhiberi volunt Cartesiani, Attentio. XVII. Cartesius dubitans in exorsu Philosophiae suae, confidens in progressu. XVIII. Quam ejus confidentiam Cartesiani superarunt.

*Perversam
Criteris qua-
rendi viam
insistit Carte-
sius.*

I. **A**NTEQUAM suam de Criterio, sive de norma veritatis sententiam proponeret Cartesius, nonnulla praemissa sunt ab eo, quæ sunt hujusmodi, ut iis instructi & praemuniti nullum deinceps Criterium possimus admittere. Primum enim nos monuit de omnibus omnino rebus esse dubitandum; quod in magna opinionum pravitate versemur ab ipso ortu, & errorem fuxerimus cum lacte nutricis;

quod sæpe nos à sensibus & ratione nostra falli experiamur; & quod nesciamus an ita fortasse nos finxerit Deus, ut semper fallamur, etiam in rebus notissimis. Deinde postquam nos in magnam de rebus omnibus dubitationem adduxit, ac pro falsis etiam habere eas nos voluit, multa statim nos jubet admittere, tanquam nulli dubitationi obnoxia, & ex hac generali dubitandi lege excepta; vel quasi ex crassissimis inscitiae tenebris derepente in clarissimam evaserimus lucem veritatis. Talia sunt ista, Nos cogitare; Ex eo quod cogitemus, sequi nos esse; Mentem à corpore esse distinctam; Mentem nostram nobis esse notiozem quam corpus; Deum esse; Deum fore fallacem si semper fallamur, aliaque plurima hujusmodi. Atque his demum positis, concludit non posse nos semper falli; imo numquam falsum pro vero à nobis admissum iri, si iis tantum assentiamur quæ clare & distincte percipiemus. Is philosophandi ordo quam sit perversus, manifestum est: nam si quæcunque sub sensus & rationem cadunt, falsitatis suspecta nobis esse debent, antequam iis assentiamur, elucen-

da primum hæc est suspicio falsitatis, quod fieri minime potest nisi adhibita veritatis norma. Quî enim certior fiam de rei veritate, nisi scivero prius quid sit veritas, quæ sit nota veritatis, quis character, quod criterium, quo inter nosci possit a falsitate? Omni igitur assensioni præverti debuit inquisitio normæ hujus. Ut enim quisquis ædificium extruere parat, regulam prius adornat & perpendicularum: ita antequam nobile hoc Philosophiæ, quæ tota in veritate percipienda versatur, ædificium moliare, comparanda tibi primum est norma veritatis, ad quam exigas quidquid in hanc structuram admittes. Contra vero Cartesius, postquam ad veritatis normam revocanda esse omnia docuit, quærere hanc normam tantisper differt, multaque interim sine ea admittit, in quibus eam demum reperiri putat. Atque ita ad ædificii sui legem normam parat, non ad normæ legem ædificium. Respondent Cartesiani, ipsam normam veritatis, argumentum nempe istud, *Ego cogito, Ergo sum*, esse veritatem; proptereaque admittere debuisse Cartesium veritatem hanc, qua

veritatis continetur norma, antequam norma hac uteretur; falli igitur qui putant aliud esse normam veritatis ac ipsam veritatem, cum nihil aliud sit norma isthæc, quam veritas ipsa ex se nota. Quo nihil absurdius dici potest. In omni enim enuntiato manifeste veritatis necessario insunt, enuntiatum ipsum, veritas enuntiati, & character seu nota veritatis. Quæ tria omnino distincta sunt. Nam cum in enuntiato falsitas inesse possit ut veritas, & unum idemque enuntiantum aliquando verum sit, aliquando falsum, manifestum est falsitatem & veritatem ab enuntiato distinctam esse, ut qualitates a *subiecto*. Character item veritatis aliud est ac veritas ipsa, eoque discernitur a falsitate, ut nota rei aliud est ac res notata. Tria hæc tamen confundunt Cartesiani. Demus enim verum esse hoc argumentum, *Ego cogito, Ergo sum*, in quo tria enuntiata continentur, & veritatem ejus per se notam esse; aliud certe est veritas hujus argumenti ac argumentum ipsum; veritas autem argumenti hujus, undecunque tandem cognita sit, cognita certe esse debet per characterem suum five

criterium, hoc est per certas notas quibus internoscatur a falsitate. Nam cum quærat inter nos character ille veritatis, pro eo perperam subjiciunt nobis Cartésiani veritatem ipsam; imo pro veritate enuntiatur ipsum in quo veritas reperitur. Quo jure autem tribuetur id huic enuntiato, sive argumento, *Ego cogito, Ergo sum*; non isti enuntiato, *Totum est majus sua parte*, cæterisque enuntiatis, quorum veritas per se cognita est? Cur potius veritas enuntiati hujus, *Ego cogito, Ergo sum*, norma erit veritatis enuntiati istius, *Totum est majus sua parte*; quam ex veritate postremi hujus æstimabitur veritas prioris illius? Imo vero, cum nihil habeant commune enuntiata hæc duo, quomodo alterius veritas ex veritate alterius spectari poterit? Deinde, si veritas omnis, sive per se nota sit, sive per aliud, character hoc veritatis insignita esse debet, quo a falsitate internoscatur, hic vero character veritas ipse est, profecto secunda hæc veritas suum quoque ipsa characterem veritatis gerit, hoc est veritatem: atque ita res abibit in infinitum. Minime sane peccatum in eo est

à Cartesio ; nam cum investigaret criterium veritatis in Libro de Methodo, diserte docet se perspecta veritate enuntiati hujus, *Ego cogito, Ergo sum*, quævisse in quo posita esset veritas illa ; cumque agnovisset non ex alia nota a se deprehensam eam esse, quam ex insigni ejus perspicuitate, *credidisse se pro regula generali sumere posse, omne id quod valde dilucide & distincte concipiebat, verum esse*. Non enuntiatum, non veritatem enuntiati criterium esse vult & normam veritatis, sed perspicuitatem.

Cartes. de
Method. §. 4.

II. Tam parum vero sibi constat, ut in eodem libro Principiorum, in eadem libri parte, in quo hunc philosophandi ordinem instituerat, aliisque præterea locis, diversas plane veritatis indagandæ leges ferat. Depositis enim primum anteceptis opinionibus, ad notationes nobis insitas attendere nos jubet, easque duntaxat pro veris admittere, quas clare & distincte percipimus ; quo facto, statim agnitum iri ait, nos esse, ut pote qui cogitamus ; tum esse Deum, & nos ab illo pendere ; & ex hac Dei cognitione, cæterarum rerum, qua-

In eo quæren-
do parum sibi
constat : Car-
tes. Princip.
Part. 1. §. 79.
De Method.
§. 2.

rum Deus caussa est, duci notitiam. Quæ legibus supra traditis quam congruant, cognoscite. Sic argumentatus fuerat Cartesius in aditu operis, Ego cogito, ergo sum: Ideam Dei menti impressam habeo, ergo Deus est: Deus non potest me fallere, ergo quæ clare & distincte percipio vera sunt. Nunc invertit argumentationem, & sic disputat, Quæ clare & distincte percipio vera sunt, Clare & distincte percipio me cogitare, & eum qui cogitat necessario esse, ergo sum, Clare & distincte percipio me ideam Dei menti impressam habere, ergo Deus est. Ex eo quod clara & distincta perceptio vera sit, colligit se esse, atque item Deum: mox tamen ex eo quod sit, atque item ex eo quod sit Deus, collegerat claram & distinctam perceptionem veram esse. In quo disputat per modum *ἐκ μύλων*, sive circumloquii. Ut si dicat, Petrus est homo, Ergo Petrus est animal rationale, cum prius dixerit, Petrus est animal rationale, Ergo Petrus est homo. Ad ea persaceta est Cartesianorum responsio; nullum hic inesse circumloquii, sed geminum solummodo argumentandi modum; priorem

quem vocant Analyfin; posteriorem, Synthesin. Quæ confidenter dicta animos puerorum permovere possunt; non eorum, quibus perspecta sit Analyseos & Syntheseos ratio. Analyfin appellant Philosophi, progressum animi a veritate singulari cognita ad universalem incognitam: Synthesin, progressum animi a veritate universali cognita ad singularem incognitam. Priore usus est Cartesius, cum a cognitione cogitationis suæ ascendit ad cognitionem suæ *existentiæ*, ab hac ad illam distinctionis animi & corporis; inde ad Dei *existentiam*; quo ultimo gradu nixus eo tandem pervenit ut cognosceret quidquid clare & distincte à se percipitur, id esse verum. Viderimus nunc an per Synthesin ordinem hunc invertat an pervertat. Statuit ante omnia id esse verum quod clare & distincte a nobis percipitur; quo posito, futurum ut cognoscamus nos esse, quia cogitamus; tum deinde Deum esse. At cum Synthesis a veritate universali cognita descendat ad singularem incognitam, propositio isthæc, *Quidquid clare & distincte a nobis percipitur, verum est*, debet esse veritas uni-

versalis cognita: ista vero, *Deus est*, debet esse singularis incognita. Contra verò scribit in Libro de Methodo:

Cart. de Method. §. 4.

Hoc ipsum quod pro regula assumsi, nempe illa omnia quæ clare & distincte concipimus, vera esse, non aliam ob causam sunt certa, quam quia Deus existit. Et in quinta Meditatione: Plane video omnis scientiæ certitudinem & veritatem ab una veri Dei cognitione pendere, adeo ut priusquam illam nossent, nihil de ulla alia re perfecte scire potuerim. Cum ergo ex agnitione Dei veritatem enuntiati hujus pendere velit, Quidquid clare & distincte percipitur, verum est, nullaque cognitio cognitioni huic præverti possit, notioem esse Deum quam propositionem hanc necesse est. Non ergo a veritate universalis nota ad singularem incognitam descendit, quod ratio Syntheseos postulabat, nec proinde Synthesi usus est. Res exemplis clarior fiet. Qui rustico monstrat viam, qua ex ipsius pago Lutetiam itur, idem propemodum facit ac qui utitur Analyti, ex singulari cognito hominem deducens ad universale incognitum. Qui homini Parisino monstrat

viam, qua Lutetiâ itur ad hanc pagum, idem facit ac qui uritur Synthesi, qua ex universali cognito itur ad singulare incognitum. Utraque ratione via hæc monstrari potest; quippe sive itione, sive reditione eadem calcanda est via; tamque commode Lutetiâ ad pagum iri potest, quam ex pago Luteriam. At si magnarum aliquarum ædium loca omnia quispiam alteri monstrare velit, ex atrio primum in œcum deducet hominem, ex œco in cubiculum, ex cubiculo in secretius conclave: minime vero ex intimo hoc conclavi primum in cubiculum; inde in œcum, ex œco in atrium; quippe prius adeundum est atrium, cæteraque ordine loca, quam veniatur ad intimum conclave. Nugantur etiam Cartesiani, cum hic normam veritatis, sive Criterium, confundi putant cum Analyfi & Synthesi, quæ viæ sunt veritatis cognoscendæ. Quæritur enim, an non ratiocinationis circulum admiserit Cartesius, cum investigaret normam veritatis: quod ab eo peccatum esse pettendimus; sive Analysin adhibuerit, sive, ut volunt, Synthesin. In quo sane nulla est Analyseos & Syn-

theseos cum norma veritatis confusio.

*Et in eo quo-
que assignanda.*

III. Nunc exploratis viis, quibus ad Criterium ire instituit, si investigemus ejus sententiam super ipso Criterio, ex cujus cognitione pender omnis Philosophia, rem itidem inconstanter ab eo disputatam reperiemus, obscure etiam & confuse; non ea firmitate & accurate, quam rei dignitas postulabat. Postquam enim in tradendis Philosophiæ principiis demonstrasse sibi visus est, nos ita non esse comparatos, ut semper fallamur, inde colligit certum esse, numquam nos falsum pro vero admissuros, si iis tantum assentiatur, quæ clare & distincte percipiemus: tum deinde in reliquo opere, aliisque scriptionibus, claram illam & distinctam perceptionem adhibet, velut certissimam ac unicam veritatis normam: ex qua etiam Dei potentiam existimat. Attamen antequam ex Dei notitia normam hanc constavisset, multa admittenda esse censuerat; idcirco quod lumine naturali, & perspicue, & per se nota essent. En alia igitur Cartesii Criteriæ, Lumen naturale, Perspicuitas, & Notitia rei ex ipsa re hausta. Sed & aliis præterea ac

*Cartesius
Princip. Part.
1. §. 43.*

diversis pro tempore utitur Criteriis,
quæ nunc prætereo.

IV. Hinc manifestum est censuisse
Cartesium Perceptionem hanc claram
& distinctam, aliud quid esse ac Lumen
naturale : nam ex hoc Lumine naturali
multa colligit, antequam decreverit &
probaverit pro veris ea esse habenda,
quæ clare & distincte percipimus. Sed
& ea aperte distinguit, cum docet Lu-
men naturale nullam attingere quæ
non sit vera, quatenus ab hoc Lumine
atingitur; hoc est, quatenus clare ac
distincte percipitur. Ex quibus effici-
tur, Lumen naturale id esse quod rem
objectam attingit; Perceptionem vero
claram & distinctam esse actionem, qua
res à Lumine naturali attingitur. Quasi
Lumen naturale sit Criterium per quod;
clara vero & distincta Perceptio, Cri-
terium secundum quod. At Cartesii as-
sectæ quidam, sive Dictatoris sui men-
tem non viderint, sive visam non pro-
barint, & deferere ausi sint, Lumen na-
turale à clara & distincta Perceptione
non distinxerunt. Perspicuitatem autem
proponere videtur tanquam generale
quippiam, quod in rebus omnibus quas

*Distinguit
claram & dis-
tinctam Per-
ceptionem à
Lumine natu-
rali, & à Per-
spicuitate ge-
neraliter sum-
ta, & à Noti-
tia rei ex re
ipsa hausta.
Cartesius
Princip.
Part. I. §. 30.*

cognoscimus inesse debeat, ut pro veris haberi mereantur; sive per Lumen naturale cognoscantur à nobis, sive per claram & distinctam Perceptionem, sive per ratiocinationem, sive per sensus, sive alio quocunque modo. Notitia vero rerum à rebus ipsis hausta, quam pro regula veritatis habet Cartesius, est ipsa hæc Perspicuitas, rebus iis tantum inhærens, quas Lumine naturali cognoscimus, quatenus eas cognoscimus. Sic Cartesii mentem commode interpretari nos posse putamus, in re obscura, nec satis explicata conjecturis & suspicionibus utentes. Attentio vero, quam adeo necessariam esse ad percipiendum verum totis libris prædicant Cartesiani, est affectio animi, rem illam unam quam cognoscere vult, sepositis cæteris, acriter intuentis.

Lumen naturale Cartesii non est certum Criterium: Cart. Princip. Part. 1. §. 30.

V. Nunc ista sigillatim expendamus. Lumen naturale definit Cartesius, *Facultatem cognoscendi à Deo nobis datam*: unde sequitur, ea nobis esse cognita Lumine naturali, quæcunque cognoscimus per facultatem cognoscendi à Deo nobis datam. Quidquid autem cognoscimus, id cognoscimus per facultatem

tatem cognoscendi à Deo nobis datam. Quidquid igitur cognoscimus, id cognoscimus Lumine naturali. Quod valde absurdum est. Deinde qua nota distinguam Lumen illud naturale, a lumine non naturali? five Lumen directum naturæ, à lumine obliquo vel reflexo artis? aut Lumen illud purum naturæ, à lumine impuro erroris? An quod primo mentis intuitu omnes homines vident & fatentur esse verum, id Lumine naturali cognitum esse dicent? Quî sciam vero primo mentis intuitu id videre homines? quî sciam id videre & fateri omnes homines? an aliquid tanto consensu ab hominibus receptum est ad hanc diem, ut à nullo repudiatum sit? quid homini notius est quam se esse? quam se esse hominem? at dubitabat Democritus an esset; dubitabat Socrates an esset homo: quid exploratius est, quam totum esse majus sua parte, quam reliqua principia Geometrarum? at ea tamen multi revocarunt in dubium, & Cartesius ipse pro falsis habere ea nos iussit. Demus tamen facile discerni ab omni alia cognitione cognitionem per Lumen naturæ haustam;

*Cartesius
Princip.
Part. 1. §. 5.
¶ 13.*

quonam argumento scire possum vera esse quæ Lumine naturali cognoscimus? Deus, inquit, esset deceptor. At pergit hebeti hoc telo pugnare, quod jam toties retudimus. Denique cum scitum sit Cartesii, Deum efficere posse, ut bis bina non sint quatuor, si fingamus Deum id effecisse quod potest efficere, fallax erit Lumen naturale quo cognosco bis bina esse quatuor. Certum igitur Criterium hoc esse non potest, quod potest esse falsum.

*Neque clam
ejus & distin-
cta Perceptio.*

V I. Fide detracta Lumini huic naturali, fide quoque caret clara & distincta Perceptio: nam Perceptioni huic fidem conciliat Cartesius ex multis pronuntiatis, quæ Lumine naturali nota esse vult; imo ex Lumine ipso naturali. Ait enim *omnium animis à natura impres-* sum esse, ut quoties aliquid clare percipimus, ei sponte assentiamur, & nullo modo possimus dubitare quin sit verum. Cum igitur fallere nos possit Lumen naturale, fallere utique nos potest clara & distincta Perceptio. Sed propius tamen inspiciamus istud Criterium.

*Cartesius
Princip.
Part. I. § 43.
44 De Meth.
§. 4.*

*Quid sit Idea
juxta Carte-
sium.*

V I I. Rem nos clare & distincte tum percipere vult Cartesius, cum claram

eius & distinctam ideam in animo habemus. Ideæ nomen etsi sæpissime usurpat, quid eo tamen significetur, licet a multis rogatus, nunquam aperte explicavit: ut non satis claram & distinctam ideæ ideam visus sit habuisse. Ideas Stoici appellabant *εἰρησώματα*, sive mentis nostræ perceptiones. Platoniorum ideas nunc quidem prætermitto. At vulgus Philosophorum primam tantum mentis perceptionem, quæ *Apprehensio* dicitur in Scholis, Ideæ nomine afficit. Hanc significationem nonnumquam retinet Cartesius, & ideam vult esse actionem mentis, quâ ad rerum imagines se applicat, sive modum quemdam cogitandi; nonnunquam vero Ideam ait esse imaginem rei ipsius, non in phantasia, sed in animo signatam, atque huic proprie nomen Ideæ convenire. Ideas autem illas, sive imagines rerum, trifariam partitur; ut aliæ sint adventitiæ, qualis est Idea Solis, quæ Sole conspecto in mentem admissa est; aliæ factitiæ, qualis est Idea Sirenis, Centauri, Chimææ; aliæ innatæ, sive naturales, qualis est Idea Dei, mens, cogitationis, veritatis, trianguli,

numeri, aliarumque rerum hujusmodi. At alibi non imagines solum rerum singularum, sed comparationem quoque imaginum illarum, quæ secunda mentis operatio est, & Judicium vulgo nominatur, Ideam vocat. Nonnunquam etiam idem ait se vocabulum tribuere iis omnibus quæ in mente habere possumus; ac proinde & ratiocinationi, quæ tertia mentis actio est. Ideam autem claram vocat, quæ menti attentæ præsens est & aperta: ut ea clare videre nos dicimus, quæ præsto sunt oculo recta intuenti, eumque valide & aperte movent; distinctam vero, quæ ab omni alia re ita sejuncta est, ut nihil in se contineat aliud, quam quod clare in ea percipitur. Cum igitur Idearum nomine significari velit Cartesius, non imagines solum rerum menti impressas, imaginumve illarum perceptionem, quâ constat prima mentis operatio; sed comparationem quoque imaginum illarum, quâ constat secunda; atque etiam collationem comparationum illarum, sive ratiocinationem, quâ tertia; eo tandem redit ejus sententia, ut normam veritatis esse velit quamcunque

operationem mentis, atque imagines etiam rerum menti impressas; modo iis adjuncta sit perspicuitas, sejunctæ vero sint ideæ aliarum rerum omnium ab ideâ rei quæ in mente est. Atque hanc normam tam certam, tam fidam esse ait, ut quidquid ipsi consentiat, falsum esse omnino non possit, ac plane repugnet id non esse verum.

VIII. Hæc quibus argumentis approbet, si quæras, idem illud reperies, quo & Lumini naturali fidem facere conatus est; nempe a Deo esse perspicuitatem & nitorem Ideæ adjunctum; quæ si fallerent, Deum fore fallacem. Cujus argumenti futilitatem toties jam convictam iterum demonstrare super-
 • vacaneum est. Huic deinde subjungit istud, eam esse naturæ legem omnium animis impressam, ut sponte assentiamur iis quæ clare percipimus, & nullo modo dubitemus quin ea vera sint. Ita fidem facit claræ & distinctæ Perceptioni per Lumen naturale, incerto videlicet per incertum. Rursus in dissertatione de Methodo, postquam gradus recensuit, per quos ad argumenti hujus, *Ego cogito, ergo sum*; notitiam

*Refelluntur
 argumenta,
 quibus proba-
 re conatus est
 Cartesius, cla-
 ram & distin-
 ctam Percep-
 tionem esse
 certum Crite-
 rium.*

pervenit, addit observasse se deinde non aliam ob causam id verum sibi videri, quam quod sibi verum clarissime videatur; ac proinde hinc certam illam & constantem ac generalem conlasse se regulam, verum id esse quidquid dilucide & distincte à se percipitur. Nos vero inde conflare possumus regulam hanc alteram, longe ista certiolem, Non temere iis esse assentiendum quæ clare nobis & distincte videmur percipere; cum argumentum istud, *Ego cogito, ergo sum*, quod vir acutus Cartesius clare & distincte percepisse sibi visus est, inane tamen & incertum esse probaverimus.

*Argumentis
oppugnatur
hoc Criterium.
Primum ar-
gumentum.*

I X. Nunc vero quam multa absurda ex Criterio hoc sequantur, perfacile est ostendere. Constat primum ex ideis veris, alias aliis mihi videri clariores & magis distinctas; ac proinde ideas aliquas, etiamsi veræ sint, aliquid habere obscuritatis & confusionis. Deest enim ipsis ea claritas ac nitor, qua claritas ac nitor ipsarum à claritate & nitore aliarum idearum superatur. Ubi autem deest claritas ac nitor, illic inesse obscuritatem & confusionem necesse est. Constat quoque ex ideis falsis esse

aliquas, quæ nonnihil habeant perspicuitatis & nitoris. Constat denique ex ideis nonnullis, quæ æquali claritate & nitore quibusdam hominibus præditæ videntur, esse aliquas quæ non æqualiter à cæteris hominibus percipiuntur, sed alias ab aliis clarius & distinctius: quemadmodum alius alio clarius videt: quæ Cartesii comparatio est. Neque hoc ipse infitiabitur Cartesius, cum doceat ne Axiomata quidem, quæ Communes notiones appellantur, æque ab omnibus percipi. Quoniam igitur claritas ac nitor cum falsitate; obscuritas contra & confusio cum veritate reperiri possunt, sequitur claritatem ac nitorem esse non posse normam veritatis. Quod si dicas, non omnem claritatem ac nitorem, sed nitorem eum qui sit illustris & splendidus, esse veritatis normam, quæro quemnam claritatis ac nitoris gradum obtinere debeat idea, ut assensione digna haberi possit. Nam si summum gradum dicas, multæ idæ veræ non habebuntur pro veris; nempe eæ in quibus aliquid inesse diximus obscuritatis & nitoris. Deinde cum nihil adeo verum sit, ut ab omnibus verum

*Cartesius
Princip.
Part. I. §. 45.
p. 50.*

habeatur, nulla idea est adeo clara & distincta, ut non in ea obscuritatis quippiam & confusionis aliquibus inesse videatur: quapropter nulla idea summum habebit perspicuitatis & nitoris gradum, unde nec ulli assensus erit adjungendus. Quod si in idea inesse non potest tantum perspicuitatis ac nitoris, quin aliquid ad id adjici possit; tantum certe decedere non potest dubitationis, quin ejus supersit pars aliqua: prout enim crescunt perspicuitas ac nitor, ita decrescit dubitatio; ac vicissim crescit dubitatio pro modo obscuritatis. Quamdiu autem supererit vel tantillum dubitationis, tamdiu in incerto erit veritas illa, tam certo nobis tamque affirmative ostentata & promissa.

Secundum argumentum.

X. Præterea si idearum perspicuitas ac nitor certa veritatis norma est, quodcunque verum visum est Cartesio, id clare & distincte ab eo perceptum esse debuit. Quædam autem pro veris habuit, quæ non satis à se percepta esse confessus est, velut particularum materiæ divisionem; nonnulla, quæ pro falsis ab eo subinde agnita sunt; non pauca, quæ ab ejus gregalibus in per-

spicua item & distincta Perceptione Criterium ponentibus; plura etiam quæ ab aliis reprehensa & convicta sunt. Cartesiani quoque dissident inter se, & eadem utentes veritatis norma contrarias & pugnantes sententias tuentur. Vel igitur aliqua clare & distincte percipiunt, quæ falsa sunt; unde sequitur claram & distinctam Perceptionem non esse certum veritatis Criterium; vel normam hanc ad omnes opiniones suas explorandas non adhibent, nec eam proinde habent pro certo & necessario Criterio; quare nec eorum doctrina admittenda est, ut pote ad certam aliquam normam veritatis accurate non exacta: imo vero, nec satis scimus, an hæc ipsa eorum de Criterio sententia clare & distincte ab iis percepta sit.

XI. Traditum quoque est a Cartesio in Meditationibus, in quibus totius Philosophiæ suæ arcem constituit, se ita esse factum à natura, ut quamdiu clare ac distincte aliquid percipit esse verum, non possit non credere id esse verum; & continuo tamen subjicit, posse se credere ita se à natura esse factum, ut interdum in iis fallatur quæ

Tertium argumentum.

clare & distincte percipit. At manifesto pugnant hæc inter se. Nam si ita est factus à natura, ut non possit non assentiri iis quæ clare & distincte percipit; quomodo potest credere se ita à natura esse factum, ut interdum in iis fallatur quæ clare ac distincte percipit? id enim si credit, causam habebit cur de iis dubitet quæ clare & distincte percipit. Quod si de iis dubitet, desinet utique iis assentiri. Sin desinere potest iis assentiri, non ita factus est à natura, ut non possit iis non assentiri. Huc adde, quod si ita à natura factus est, ut cum clare ac distincte percipit aliquid esse verum, non possit non credere id esse verum; cum initio Philosophiæ suæ pro falso habere instituit quidquid sibi videbatur verissimum, rem supra naturæ suæ vires aggressus est: nam quod verissimum, ei videbatur, id clare & distincte percipiebat; si quidem clara & distincta Perceptio est norma veritatis. Quomodo autem pro falsis habere potuit, quæ non poterat non habere pro veris?

XII. Valet hic quoque allatum jam supra à nobis argumentum: nempe cum

doceat Cartesius multoque asseverantius ipse assere, Deum efficere posse, ut vera sint quæ clarissima Perceptione nobis videntur esse falsa; puta, ut res eadem simul sit & non sit; ut duo duobus addita non sint quatuor, ut totum non sit majus sua parte; fieri quoque potest, ut clara & distincta Perceptio non sit norma veritatis. Minime autem habenda est norma veritatis, quæ potest non esse norma veritatis. Igitur clara & distincta Perceptio non habenda est norma veritatis.

XIII. Denique si quæram à Cartesio, unde certo scit bis bina esse quatuor, respondebit id se certo scire verum esse, quia id clare & distincte percipit. At quæram iterum, unde certo scit, verum id esse, quod clare & distincte percipit: respondeat necesse est, certo se scire verum id esse quod clare & distincte percipit, quia id clare & distincte percipit. Instabo rursus, & quæram unde certo scit, verum esse quod clare & distincte percipit, propterea quod clare & distincte percipit id esse verum quod clare & distincte percipit: non aliud utique respondere poterit,

Quintum argumentum.

quam quod id ipsum clare & distincte percipit. Igitur vel clare & distincta Perceptio fidem habebit à se ipsa; atque ita admitteretur circulus: vel clara & distincta Perceptio egebit alia clara & distincta Perceptione à qua fidem habeat; atque ita fiet progressus in infinitum.

Neque Perspicuitas, neque Notitia rerum à rebus ipsis hausta, sunt certa Criteria.

XIV. Quod si neque Lumen naturale, neque clara & distincta Perceptio, certa sunt veritatis Criteria, hoc ipso fidem amittit generalis illa Cartesii Perspicuitas, quam comitem adjunctam esse vult omnibus iis quæ quovis modo cognoscimus, ut pro veris habeantur. Nam si sensus, & mens, & mentis operationes, & claræ ac distinctæ ideæ perceptionesque rerum, & Lumen naturale, fallacia sunt ad veritatem cognoscendam instrumenta, quantumlibet eis Perspicuitatem adjunxeris, haudquaquam certa fient. Ut si caducum parietem dealbaveris, haudquaquam effeceris firmiorem. Notitia vera rerum à rebus ipsis hausta, cum species quædam sit Perspicuitatis, nihilo Perspicuitate ipsa certior haberi potest. Præsertim cum & Notitiam hujus-

modi à rebus ipsis haustam, & Perspicuitatem, velut parum certa veritatis indicia, removenda esse nos Cartesius in ipso Philosophiæ vestibulo monuerit.

XV. Jam si veritatis cognoscendæ *Refelluntur præcepta veri cognoscendi à Cartesio tradita.* artem & rationem ac præcepta à Cartesio in Dissertatione de Methodo tradita persequamur, lubrica quoque apparebunt & incerta; quamvis ea jactet *Arithmetica certitudine non cedere.* Primum enim hoc est, Nihil esse pro vero admittendum, nisi quod certo & evidenter verum esse cognoscitur. In quo manifesta est petitio principii; perinde enim illud est, ut si dicat, ad verum certo cognoscendum, verum esse certo cognoscendum. Deinde, quî tandem certus esse potero me aliquid distincte percepisse? nec enim difficultate id carere fatetur ipse Cartesius. Præterea, unde scit id esse verum, quod certo & evidenter ei videtur esse verum? multa enim doctrinæ ejus capita, quæ certo & evidenter ipsi videntur esse vera, mihi certo & evidenter videntur esse falsa. Utra tandem ex his perceptionibus certum erit veritatis Criterium? Se-

cundo præcepto propositam quæstionem jubet in tot partes dividi, quot postulat quæsitæ rei investigatio: in quo petitur iterum principium. Nam ut scias quamnam divisionem postulet res quæsitæ, rem quæsitam debes cognoscere. Igitur ad cognoscendam rem quæsitam, divisio partium instituenda est: ad instituendam autem partium divisionem, res quæsitæ cognoscenda est. Nec utilius est præceptum tertium, quo à simplicissimis rebus ad compositas mentem progredi jubet, & à facilioribus ad difficiliore velut per gradus ascendere. Nulla enim res est adeo simplex, cujus cognitio ex infinitis rebus non pendeat; nulla cognitu adeo facilis, quam noscere te certo scire possis; nulla in qua cognoscenda non summa sit semper & ineluctabilis difficultas. Quarta lex singulas quæstionis partes tam attente perlustrandas esse definit, ut certi simus nihil esse prætermisum. Atqui ut certus sim in divisione & perlustratione partium nihil esse à me prætermisum, totum deo cognoscere: rursus ut totum cognoscam, partes mihi cognoscendæ sunt. Atque ita recidimus in mo-

dum *ἀγανθλον*, qui ad veritatis cognitionem inutilis est & ineptus. Nec infitiri tamen velim, in his regulis inesse aliquid utilitatis & commodi ad communem studiorum & vitæ usum. Nam quis eas in vulgarium disciplinarum tractatione, quis in reconditioribus doctrinis, velut in Geometrica & Arithmetica non adhibet? quis in quotidiana vitæ consuetudine, si modo vecors plane non sit & hebes, rem ignotam pro vera habet? quis pedaneus iudex quæstionis perplexæ & intricatæ nodos omnes, non sigillatim, sed simul & una opera tentet dissolvere? quis magister de trivio discipulum docet verba tota legere, antequam facili simplicium literarum cognitione eum imbuerit? quis eum puerili hac doctrina informans, partetantum elementorum cognita, voces integras recte lecturum spondeat? Pervagata hæc est & tunicatæ plebis solo trita via. At ea iri ad certam veritatem, illud vero pernegamus.

XVI. Nec prætermittendus ille Cartesii & Cartesianorum mos est, cum ad conciliandam dogmatis suis fidem, mentem jubent, non anteceptis solum

Inanis est, quam ad percipiendum verum adhiberi volunt Cartesiani, Attentio.

exui opinionibus, sed a sensuum etiam abduci consortio, totamque silentibus plane affectionibus (juxta usitatam ipsis loquendi formulam) in paradoxa sua defigi. Id si fiat, futurum asseverant, ut ideas nostras clare & distincte intueamur, ac veritatem certissime percipiamus; nec à se dissensurum quempiam, nisi qui componere nesciat animum, & attentione careat. Atque id tanti apud eos est, tanti apud nos esse volunt, ut unico hoc argumento sæpe defendant opiniones suas, & adversarios confutent: adeo ut Attentionem, velut certum Criterii Criterium obtrudant. Perspicuam quippe & distinctam Perceptionem, certam esse aiunt veritatis normam; certam vero claræ hujus & distinctæ Perceptionis normam esse Attentionem: quisquis enim fuerit attentus, res clare & distincte percepturum; quisquis vero res clare & distincte perceperit, fore compotem veritatis. Nempe hætenus arcanum illud orbis Philosophicus ignoraverat; ut res animo percipiatur, animum ad eam esse attendendum. Nempe nos ideo veritas hætenus fugerat, quod cum eam anquirere-

nus, animo vago & omisso alias re-
geremus. Quoad extitit tandem Car-
tesius, qui nos de revocando animo &
intendendo commoneret. Facimus ve-
ro, ac libenter, & Philosophiam ejus
acri & attento animo exploramus. At-
que hujus diligentiae is demum nobis
fructus constat, quod eam exploden-
dam judicamus; ipsos vero Cartesianos
ad Attentionem, quam prædicant, ex-
citandos; futurum quippe, ut si studio
nostro par studium & curam adhibeant
in philosophando, doctrinae suae labes
continuo perspiciant; aliudque esse in-
telligent, visa inania sibi fingere, & pe-
regrinantis animi erroribus obsequi,
aliud mentem attendere; & Philoso-
phum denique vel maxime id decere,
*Non plus sapere, quam oportet, sed sa-
pere ad sobrietatem,* & animo extra me-
tas rationis exspatianti moderari, ne
forte nimia attentio in somnia erum-
pat & deliria.

Rom. 12. 3.

XVII. Ac mirabile profecto est, ex-
titisse Philosophum, qui ad vitandos
errores, & attingendam veritatem tam
hæsitans fuerit, tam circumspectans,
tamque dubitans in exorsu; tam con-

*Cartesius du-
bitans in exor-
su Philoso-
phiae suae, con-
fidens in pro-
gressu.*

fidens, tamque audax in progressu: ut qui palam addubitaverat quid esset, an omnino esset, & pro falso habere nos voluerat duo tribus addita efficere quinque; mox idem à communi hominum opinione abhorrentes sententias pro imperio, & nullo argumento allato admitti jubeat; tantæque sit levitatis & inconstantia, ut qui principiis Mathematicis detraxerat fidem, statim probabilitati veritatem inesse pronuntiet. Sic enim ab eo traditum est, pluribus argumentis probabilibus vim inesse certissimi argumenti. Quod pronuntiatum, etsi in usum vitæ admittendum est, omnino tamen est à Philosophia rejiciendum, tanquam errorum omnium fons & seminarium. Nam si in omni probabilitate inest incerti aliquid; in multis probabilibus argumentis plurimum inerit incerti. In quocunque autem argumento incerti inest aliquid, certissimum id esse omnino non potest. Eo quoque progressus est, ut non mentis solum Perceptioni claræ & distinctæ, sed recordationi etiam Perceptionis hujus fidem sine cunctatione adjungendam scisceret; solenni hoc

tantum argumento & jam confutato ductus, Deum, si res secus esset, fore deceptorem. Nam quid memoria fallacius? quam sæpe promissam decoquit fidem? quam multa clare & distincte percipere nobis visi sumus in pueritia, quæ postquam adolescentes facti sumus, recordabamur à nobis pueris clare & distincte fuisse percepta, quæque subinde falsa esse cognovimus? Denique eidem obsecutus argumento audet asseverare, quæcunque in somnis menti nostræ clara esse videntur, ea omnino esse vera. At brumali nocte secundum quietem mihi clare videbar in horto rosas decerpere: in horto itaque nocte brumali rosas decerpsi. Nec mirum sane qui objectis sibi dormienti somniis tribuit fidem, eundem somniis à se expectato & vigilante confictis fidem à nobis tribui velle. Atque hæc quanquam ita sint, tantam tamen opinionum suarum fiduciam sumsit Cartesius, ut nihil à se pro vero admisum jactet, quod non certius & clarius sit Epicherematis Geometrarum; suas opiniones adeo evidentes esse ac certas, ut omnes disputandi causas deinceps

ceps sint sublaturæ, si modo recte intelligantur; & res denique naturales non alias habere posse ortus sui causas, quam quæ à se propositæ sint. Quamquam postremum hoc nonnisi titubanter, admonita scilicet morfu veritatis conscientia, asseverare ausus est.

*Quam ejus
confidentiam
Cartesiani su-
perarunt.*

XVIII. Atque hæc demum Cartesii confidentia in tam effrænem tamque præcipitem temeritatem Cartesianos impulit, ut ex hoc grege grandiloqui nonnulli scribere non erubuerint, quidquid cognoscunt, verissimum id esse; & quidquid habent in mente, id omne extare extra mentem: quod & Cartesio ipsi alicubi excidit. Id autem est hujusmodi, ut jam nesciam quid sit desipere, si hoc desipere non est. Et præclare sane nobiscum ageretur, si intra insaniam & deliria se continuissent: verum non Rationis solum, sed Fidei quoque leges sæpissime ab iis esse violatas deinceps ostendemus.



CAPUT TERTIUM.

Expenditur Cartesii sententia de mente humana.

I. *Certissima dogmata de mente humana, deque Dei existentia, incertis rationibus confirmare conatus est Cartesius: II. etsi ob veritatis asserenda studium laudandus est. III. Exponitur Cartesii sententia de mente humana: IV. qua & refellitur. V. Etiam si diversa haberi possint idea rei cogitantis, & rei corporeae, non hinc tamen efficitur res esse diversas. VI. Falsum est, prius, certius, & clarius cognosci mentem quam corpus. VII. Falsum est, totam hominis naturam in eo positam esse, quod cogitat. VIII. Falsum est, animum sentire res externas, non corpus. IX. Falsum est, esse aliquid in intellectu, quod non fuerit in sensu. X. Falsum est, in Conario precipuam esse sedem animi.*

I. **E**T SI sufficere hæc poterant ad convellendam Cartesianam Phi- *Certissima dogmata de mente huma-*

na deque Dei
exillentia in-
certis rationi-
bus confirmare
conatus est
Cartesius.

118 *Censura Philosophiæ*

losofiam, propterea que fusius à me tractata sunt, dignum tamen est connexa quoque his capitibus membra perlustrare, ut omnibus appareat simili vitio totum doctrinæ hujus corpus laborare. Id autem fiet à me, non continuata per omnes partes inquisitione & studio; sed strictim & leviter per quæstiones quasdam, quæ factionis hujus plausum imprimis meritæ sunt. Primæ ordine, & dignitate præcipuæ occurrunt eæ, quæ sunt de mente humana, & de Deo, Deique, ut vocant, *existentia*. In quibus adeo sibi placuit Cartesius, ut quæ super his à se excogitata sunt, certissimas esse demonstrationes, ac Geometricis ipsis certiores, gloriose ac magnifice non semel prædicaverit; summis vero ac reverenter ab ejus sectatoribus, sic tanquam Pythiæ responsa, excepta sint. Quibustamen nihil esse futilius, nihil incertius candidis Lectoribus approbaturum me confido. Adeo ut si exploratissima non esset, uti sane est, Dogmatum illorum notitia, merito verendum esset ne apud incautos homines, vanis adeo probationibus à tanto viro allatis deterritos, in dubium

vocaretur; quod & aliis argumentis longe certioribus, & sanctissimæ Fidei decretis, verum esse scimus.

I I. Nihilominus tamen, etsi eum sua opinio palam frustrata est, magna ei est tribuenda laus, ob studiose navatam in certissimis alioqui dogmatis asserendis & comprobandis operam, & ob accommodatas utcunque in his argumentis, utinam æque in cæteris, ad Religionis Christianæ veritatem Philosophiæ suæ rationes. Hæ cujuscumque sint inquiramus; ac illæ primum quæ ad mentem pertinent humanam.

Etsi ob veritatis asserendæ studium laudandus est.

III. Postquam hanc argumentationem commentus est Cartesius, *Ego cogito, ergo sum*, Archimedis punctum reperisse sibi visus est, unde terram loco dimovere posset. Hinc enim agnitorum se speravit, & quæ esset natura mentis humanæ, & quid à corpore differat. Nam cum finxisset primum falsa esse, quæcunque antea habuisset pro certis; & postmodum animadvertisset se cogitare, ac proinde se esse, ulterius philosophando progressus est; & jam sciens se esse, scire præterea voluit, quid esset. Quod cum quæreret, perstitit in

Exponitur Cartesii sententia de mente humana,

proposito omnia habendi pro falsis. Perrexit itaque fingere nullum esse corpus, vel suum, vel alienum; nec ullum corporis motum, aut situm, aut figuram, aut reliqua ad corpus pertinentia; neque ullum omnino esse mundum, aut aliud quippiam. Quæ cum fingeret, deprehendit se, etiamsi cætera non essent, non posse tamen non esse; quippe qui hæc fingendo cogitaret, ac cogitando plane esset: contra vero, cum fingeret vera esse omnia hæc quæ mox falsa esse finxerat, corpus nempe suum, totamque adeo rerum universitatem, si tamen cogitare desineret, causam nullam esse, cur cæteris illis extantibus, se extare crederet. Atque his animadvertis, collegit demum se, hoc est mentem suam, mentisque suæ naturam, à rebus corporeis & externis nullo modo pendere, nec quicquam habere cum iis cognitionis; utpote quæ sine iis esse posset; ac proinde se esse tantum rem cogitantem, suamque naturam in cogitatione solum esse positam, nulla alia re indigentem ut cogitet, non corpore, non loco, non motu, non porrectione, sive, ut cum Cartesio loquar, *extensione*.
Hinc

Hinc etiam intellexit, prius, facilius, ac certius à se perceptam esse mentis suæ naturam, quam naturam corporis : de corpore enim nondum se habere explorati quicquam; mentem vero suam sibi certo jam esse perspectam. Nec priorem solum & certiolem, sed clario-rem quoque esse hanc mentis suæ noti- tiam ex eo collegit, quod cum nullæ sint nihili qualitates, ubicunque depre- henduntur qualitates aliquæ, illic ne- cesse sit inveniri substantiam; atque eam hoc clarius cognosci, quo plures in ea qualitates percipiuntur; plures au- tem in animo suo qualitates se percipe- re, quam in alia re qualibet; cum ex rei alterius cujuscunque notitia habeatur notitia mentis; at etiamsi nulla res ex- taret alia, mentis suæ notitiam habere se posse, res quippe cognosci non posse sine mente, mentem vero sine rebus aliis cognosci posse.

IV. Nunc fingite vobis coram hic *quæ refellitur.* adesse Epicuri de grege porcum ali- quem, aut alium quempiam ex veteri- bus iis Philosophis, qui animos esse corpora, & cum corporibus interire tallo censuerunt. Sic ille Cartesianam

argumentationem excipiet. Quæret primum, dum cogitat, quid sit id quod cogitat; quid sit id per quod cogitat; quid sit ipsa cogitatio. Ac reperiet id quod cogitat, esse hominem, hominem vero esse corpus animatum, sentiens, ratione utens; ubicunque est corpus hujusmodi, illic hominem esse; ubi non est, illinc hominem abesse; quamdiu corpus illud sponte movetur & vivit, tamdiu vivere hominem hunc; statim atque vivere desinit illud corpus, illico & hominem hunc emori. Cum autem animadvertat hominem ad omnia vitæ munia obeunda uti corpore; corpore stare, sedere, ambulare, flere, ridere, loqui; corpore nutrirî; corpore sentire; corpore vigilare, dormire, somniare; corpore denique imaginari; inde generatim concludit hominem ad cogitandum corpore uti, & cogitationem esse effectiõnem, vel corporis, vel per corpus editam: cum præsertim male affecto & vitiato corpore debilitari rationis usum sæpe expertus sit; vigere contra, sano ac valente corpore. Nec jam, quæritur, quodnam sit principium effectiõnum illarum, an vis aliqua inter-

na, distincta à corpore, an temperatio corporis ipsius, ex æquabili partium quibus constat convenientia & consensu efflorescens. Effectiões nunc corporis persequimur, non causas effectiõnum. Contra vero insurgit Cartesius, & ante omnia finxisse se ait falsa esse quæ pro veris antea habuimus, nec ullum omnino extare corpus, nec ullum esse mundum; nullam ergo jam esse habendam rationem corporis: at quamvis homini corpus detrahamus, cogitationem detrahi non posse; atque hinc effici hominem non posse non esse rem cogitantem, etiamsi possit non esse res corporea. Sed respondet Epicureus accipere se conditionem, & se fingere cum Cartesio nullum extare corpus: verum si nullum extet corpus, nec ullam fore cogitationem, nec rem ullam quæ cogitet. At, inquiet Cartesius, qui fingit nullum extare corpus, tamen cogitat. Cogitat, inquiet Epicureus, quia etiamsiingat nullum extare corpus, extat tamen corpus aliquod, nam sine corpore non potest cogitare. Haudquam autem quærimus quid, sit, sed quid sequatur ex hoc figmento, nullum

extare corpus. Falso autem uno posito; falsa alia consequi necesse est. Si fingas nullum esse corpus, sequetur nihil esse quod cogitet; nec cogitabit Cartesius, si corpore careat. Sin verum erit, esse aliquid quod cogitet, necesse erit extare corpus aliquod. Fingit igitur pugnantia Cartesius, cum fingit nullum esse corpus; fingit enim per corpus, & sine corpore fingere nihil potest. Idem igitur peccat ac si diceret, se ratione cognoscere hominem ratione carere: nam qui ratione novit aliquid, ratione pollet. Ita si cogitatio nulla in homine esse potest sine corpore, fingere non potest se corpore carere sine corpore.

Etiam si diverse haberi possint idea rei cogitantis, & res corporea, non hinc tamen efficitur res esse diversas.

V. Instat vero Epicureo Cartesius, nec jam disputare se ait, sitne ipse revera aliud quippiam ac res cogitans, puta an sit res corporea; sibi id in præsentia satis esse, quod certum habeat se esse rem cogitantem: quod si præterea sit res corporea, tamen rem illam cogitantem, sive mentem, plane diversam esse à re illa corporea, sive mente; quippe quarum diversas penitus ac distinctas ideas habeat: res autem eas esse distinctas, quarum diversæ habentur

ideæ. At id negabit Epicureus noster, & hoc utetur exemplo: Si aliquem, inquiet, loquentem audiarn, recte colligere potero, id quod audio rem esse loquentem; nulla interim ratione habita cæterarum rerum quæ rei illi loquenti adjunctæ sunt, & per quas fit locutio; puta, linguæ, dentium, & corporis totius, ac animi etiam. Quamvis autem distinctas ideas habere possim, & rei loquentis, quatenus loquens est, & corporis per quod fit locutio, quatenus corpus est, non effici tamen rem loquentem aliud esse quam corpus. Rursum contra pertendit Cartesius, res eas quas intelligo, tales fieri posse à Deo, quales à me intelliguntur; Deum itaque res eas separare & distinguere posse, quas animo distinguo & separo; quæcunque autem dividi possunt, quæcunque tandem vi, sive divina, sive humana dividantur, esse diversas; ac rem proinde cogitantem, quæ mens est, diversam esse à corpore. Responsio in promptu est: minime nunc quæri quid fieri possit, sed quid sit; an Cartesius cogitans, sive id quod cogitat in Cartesio, aliud sit ac corpus ipsum Carte-

sui, & corpore careat. Ait vero Epicureus, id quod cogitat in Cartesio, esse corpus ipsum Cartesii; & cogitationem Cartesii esse actionem corporis Cartesii; pugnare autem hæc secum, actionem corporis esse sine corpore; quippe si sit sine corpore, non fore actionem corporis; res autem secum pugnantes, seque mutuo tollentes simul esse non posse.

*Falsum est,
prius, certius,
& clarius co-
gnosci mentem
quam corpus.*

VI. Ex his facile jam existimatur, verene superioribus subjunxerit Cartesius, prius à se, certius, & clarius cognosci mentem suam quam corpus. Nam cum per cogitationem ad hanc notitiam pervenerit, cogitatio autem sit actio mentis per corpus edita; prius, certius, & clarius cognoscitur corpus per quod edita est actio, quam mens à qua edita est. Quemadmodum si quis lapide ab aliquo sit ictus, prius, certius, & clarius cognoscet lapidem per quem ictus est, quam fundam aut manum à qua lapis missus est. Æquius certe pateremur, si dixisset, prius nos, certius, ac clarius cognoscere cogitationem nostram, quam corpus: nam cum cogitatio sit actio mentis, ut dixi, per corpus

edita, prius percipitur actio hæc quæ editur in nobis, quam id per quod editur; ut lapidis actio, seu ictus, prius percipitur quam lapis; prius vero lapis, quam brachium à quo missus est. Itaque quamvis prius & clarius percipiatur à nobis cogitatio quam corpus, non idcirco prius & clarius percipitur à nobis res cogitans quam corpus: cum res cogitans non aliter percipiatur à nobis quam per cogitationem, quæ per corpus in nobis editur; prius autem percipiatur id per quod cogitatio in nobis editur, quam id à quo editur. Captiosum vero illud est quod objicitur, prius nosci instrumentum quo fit opus, quam opus ipsum; prius calamum, quam scripturam; prius scalprum, quam statuam; ac proinde animum quo corpus noscitur, quam corpus. Ante habeat scalprum artifex necesse est, quam statuam faciat: statua vero quid sit, certius & clarius novit, quam quid sit scalprum; cum ad faciendam statuam quam noverat, quamque habebat in animo, scalprum deinde comparaverit; cumque aliud fortasse instrumentum excogitare ad id potuerit. Prius est igitur scal-

prum, quam statua; at prius noscitur statua, etiamsi nondum facta sit, quam scalprum. Similiter ut homo mentem intendat ad corporis cognitionem, prius mentem habeat necesse est, quam cognitionem corporis; at necesse non est, ut prius habeat cognitionem mentis, quam corporis. Imo, plane ignorare potest quid sit mens, quid sit cogitatio, cum non ignoret quid sit corpus: ut artifex ille dum facit statuam, certam habet ac claram ejus notitiam, materiæ nempe qua constat, dimensionum ejus omnium, omniumque ad eam pertinentium; cum ignorare penitus possit quid sit mens quæ operis impressam in se effigiem habet; quæ vis brachia, quæ manus, quæ digitos ad opus concinnandum regat. Nunc si argumentum hoc regeramus in Cartesium, tum quoque clarissime ejus apparebit futilitas. Nam si ex eo quod per animum noscitur corpus, sequitur prius & certius nosci animum quam corpus, quæro ab adversario, quo instrumento animum cognoscit homo, respondebit haud dubie cognoscere per animum; nec enim tam aperte sibi con-

tradictet, ut affirmet cognosci animum per corpus. Quod si prius & certius cognoscitur id, per quod cognoscitur aliud quippiam, quam id ipsum quod cognoscitur, sequitur prius & certius cognosci animum quam animum: quod absurdum est. Inde sane cuditur argumentum, unde non video quomodo expedire se queat Cartesius. Nam si Meditationibus suis certam instituit viam ad animi notitiam, animumque certo novit, novit utique per animum. Prius autem quam sciat se animum certo nosse, scire debet ea se certo nosse quæ novit per animum. At prius quam sciat ea se certo nosse quæ novit per animum, scire debet animum aptum & utile esse instrumentum ad verum certo cognoscendum. Rursum priusquam id sciat, noscere debet naturam animi. Ergo ad cognoscendam animi naturam, natura animi noscenda est; atque ita petitur principium, & in idem recurritur. Liquet ergo quam cassâ sit & inanis hæc Cartesii opinio, quæ summis etiam Philosophi hujus admiratoribus quibusdam tantæ vanitatis plena visa est, ut abjecta penitus ab iis & deserta sit.

Falsum est totam hominis naturam in eo positam esse, quod cogitat.

Origenian. lib. 2. cap. 2. quæst. 6. §. 16.

VII. Nec leve doctrinæ ejusdem vitium est, quod totum hominem mente sola constare decernit; corpus vero ad ejusdem naturam minime pertinere: quod delirium à Pythagora ortum, in Platoniorum & Stoicorum manavit Scholas, & nonnullorum quoque e recentioribus animos infecit. At non alium quam hærescos titulum opinioni huic imponit Tertullianus, & nos eam olim in Origene non segniter castigavimus. Quæramus nunc quibus eam instaurare & defendere argumentis ausus sit Cartesius. Fingo, inquit, me corpore carere; at fingere non possum me non esse: quia dum fingo, cogito; dum cogito, sum. Contra, si cogitare destinam, etiamsi corpus meum extet, nulla mihi causa erit cur credam me esse. Cum itaque fingere possim me esse sine corpore, non possum vero fingere me esse sine cogitatione; quotiescunque autem clare & distincte res animo disjungo, diversas eas esse necesse sit, sequitur esse meum non pendere à corpore, sed à cogitatione, meque à corpore diversum esse aliquid, rem nempe quamdam, cujus tota natura in eo posita sit

ut cogitet. Dialectici, vestram fidem ! Latentem illic ambiguitatem, cui tota nititur argumentatio, mecum agnoscite. Demus Cartesio quod postulat : fingat se corpore carere : fingere vero non possit se non esse ; quippe qui cogitet, dum fingit ; & sit, dum cogitat. Quid tum ? erit quidem, etiamsi non habeat corpus, sed non erit id quod nunc est, homo videlicet, corpore concretus & animo : at cum corpore carebit, jam homo non erit. Ergo cum ait se esse, dum cogitat & corpore caret, inest ambiguum in voce *esse* ; est enim, sed non homo. Habeat ergo Cartesius distinctas quantum volet & diversas mentis suæ ac corporis ideas, efficiatque mentem esse posse sine corpore, corpus sine mente ; at mentem sine corpore, hominem esse numquam efficiet.

VIII. Doctrinam præterea suam de animorum nostrorum natura hoc Paradoxo cumulat Cartesius, sentire animum, non corpus : cujus hanc habet rationem, quod cum in ardua aliqua contemplatione defixus animus est, vel *enrôlé*, abreptus, torpet corpus sine sensu, & ad res extrinsecus objectas vel

*Falsum est
animum sentire
res extrinsecas,
non corpus.*

admotas stupet. Animum autem sentire ait, non quatenus per sensuum exteriorum instrumenta diffusus est, sed quatenus cerebro conjunctus; eo quippe læso sensus tolli, cum corpus tamen animatum sit. At nobis ad hæc exploranda, licet ex parvis magna cognoscere. Cum animus noster in attenta rei alicujus cogitatione versatur, sapissime fit ut alio divisis mentibus, alio auribus & oculis, etiamsi audiamus, videamus, frigeamus, æstuemus, non animadvertamus tamen nos videre, frigere, æstuarè; quæ statim percipimus omnia, postquam à cogitatione animum revocavimus. Certum tamen est tum incogitantibus nobis pulsari aures nostras, res externas depingi in oculis, audire corpus, videre, frigere, æstuarè, quippe quod ad hæc sentienda rite dispositum sit. Itaque si clarius aliqua lux de repente incurrat in oculos, aut gravior edatur sonus, aut glacies corpori vel ignis admoveatur, affecto vehementius sensu convertetur ad eum illico animus. Nam cum ad res duas diversas eodem tempore attentus esse non possit, ad eam se adjungit, à qua

validius afficitur. Idem ex eo quoque apparet, quod identidem experimur, si quando ad aures nostras verba aliquot proferat quispiam, vel cantiunculam sæpius occinat, dum animum alio attentum habemus, statimque sileat, cum mentem ad res auditas revocamus. Sæpe enim fit ut ad prolata verba accurate respondere, vel cantilenam memoriter recitare possimus : quod utique non fieret, nisi utrumque sensu ita percepissemus, ut sensui adhuc insidere viderentur. Clarissimum id quoque est in dormientibus, qui quamvis sensibus omnibus videantur orbat, levi tamen murmure vel pulicis morsiuicula, vel acus punctione, etiam dum gratissimis somniis delusus est animus, excitantur. Unde intelligas tum sentire corpus, etiamsi animus alio abstractus sit. Idem de sublimiori contemplatione aut *insolent* censendum est : quo longius enim cogitando abscellit animus, eo minus corpus quæ per sensus patitur potest advertere. Nam tum collectis spiritibus ita oppletur cerebrum, ex eorumque agitatione percellitur, iisque conjungendis & disjungendis occupatur ; ut

reliquis exequendis muneribus, nervorumque motibus percipiendis par esse non possit. Ad ea tamen acriori sensuum impulsione sæpe retrahitur. Siminus, velut morbo aliquo obferatas esse cerebri fores, & interclusum ad id com meatum putare debemus. Quæ cum ita sint, cognitu facile est, corpus sentire, non animum : nam si abstractus animus sensu corporis revocatur, sentire corpus necesse est, priusquam id animus intelligat. Imo vero, dum incogitantibus nobis res videmus, corpus sentire manifestum est, animum vero non sentire. Cum vero liber & vacuus animus, exceptam in sensus instrumento impressionem percipit, tunc sentit quidem pars illa corporis, animus vero cognoscit sentire partem hanc, deque hac impressione & sensus affectione arbitrium facit. Nec aliud sibi velle visus est Augustinus, cum dixit non corpus sentire, sed animam per corpus, quo velut nuntio utitur ad formandum in seipsa quod extrinsecus nuntiatur. Frigere digitum, pedem comprimi agnoscit. animus; ipse non friget, neque comprimitur : sentire quippe, corporis est ;

animi vero, corpori tribuere facultatem sentiendi, & impressiones in eo factas, sensuumve affectiones cognoscere. Contra vero, etiamsi multa videre ideantur Phrenetici & dormientes, uæ non vident, non hinc concludas idere animum, corpus non videre: non enim in iis tum fit visio, sed opinio tantum visionis. Quamobrem cum vera sit visio, dum abstracto animo corpus videt; contra nulla fiat visio, dum animus videt corpore non vidente, perspicuum est corpus sentire, non animum.

I X. Vexatissimam sententiam de ideis inanis etiam ex Platonica Philosophia partim sublegit Cartesius, ita tamen interpolavit, ut alia videri possit. Diversa esto, ut voles, æque certe falsam esse ostendam. Statuit hic triplex esse a nobis idearum genus; ut suprà jam dixi, quarum aliæ adventitiæ sint, cuiusmodi est idea Solis, quam ex concepto Sole in se habet unusquisque; aliæ factitiæ, cuiusmodi est idea Solis, qualem rationibus suis inveniunt Astrologi; aliæ demum nobis ingenitæ, quas naturales appellat, cuiusmodi sunt ideæ Dei, mentis, naturarum, quæ es-

Falsum est esse aliquid in intellectu, quod non fuerit in sensu.
Cartesius Medit. 3. & Epist. Tom. 2. Epist. 54.

Cartesius
Epist. Tom. 1.
Epist. 59.

sentiæ vocantur, formarum Geometricarum, axiomatum quibus utuntur Mathematici, aliarumque rerum consimilium. Has ideas naturales nonnunquam conceptis verbis ait nihil aliud esse quam facultatem ipsam cogitandi, quam mens nostra pollet, & quam in Scholis actum primum cogitandi appellare solent: continuo tamen subjicit ideas illas esse formas cogitationum; cogitationes vero ipsas, sive, ut vulgo loquuntur, actum secundum cogitandi, à facultate cogitandi proficisci. Atque hæc sane pugnant: nam si cogitatio oritur à facultate cogitandi, differre necesse est cogitationem à facultate cogitandi, ut id quod effectum est à causa. Deinde si idea est forma cogitationis, cum forma sit aliud ac id cujus est forma, ut anima hominis aliud est ac homo, idea profecto aliud est ac cogitatio. Tria igitur in eo ipso agnoscit Cartesius, quod unum idemque esse dixerat; facultatem scilicet cogitandi, cogitationem, & ideam. At idem tamen ubi differit de idea Dei, quam menti impressam gerimus, hanc à mente nostra nec effectam esse, nec effingi potuisse con-

Cartesius
Princip.
Philos. Part.
1. cap. 15, 16,
28.

endit; verum à Deo ipso esse in mente nostra consignatam & impressam, quemadmodum & ideas axiomaticum illorum, quæ habentur immutabilia & æterna. At multo etiam magis discrepant ista à superioribus: nam si ideæ sunt facultas ipsa cogitandi, idea Dei est facultas cogitandi de Deo; & ideæ rerum cæterarum omnium sunt facultas cogitandi de rebus iis cæteris: facultas autem illa cogitandi ad quascunque res cogitandas adhibeatur, una tamen & eadem facultas est: ut facultas pingendi, sive ad pingendam arborem adhibeatur, sive domum, eadem facultas est. Unde manifeste concluditur ideam Dei, ac reliquas ideas, quas naturales & innatas appellat, non differre ab ideis adventitiis, aut factitiis; ac idcirco cum hæ à nobis efficiantur sint, & illas quoque. Deinde cum scribit alio loco Cartesius ideas illas æternas, puta axiomata illa Geometrica, in animis nostris consignari à Deo, uti leges à rege in animis eorum qui parent ipsius imperio, aliud quid esse fatetur ideas ac facultatem cogitandi. Gratificemur tamen Cartesio, sicque sententiam ejus

Cartesius
Epist. Tom. 2.
Epist. 104.

commode interpretemur, ideam innatam, puta Dei, esse facultatem menti nostræ ingeneratam certo quodam modo cogitandi; quo modo quotiescunque cogitabit mens, ideam Dei in mente exituram. Verum ne sic quidem se extricabit: nam quid discrepabit idea ingenerata ab idea adventitia, aut factitia? idea enim Alexandri, quæ factitia est, poterit pari jure dici facultas menti ingenerata certo quodam modo cogitandi; quo modo quotiescunque cogitabit, extabit in ea idea Alexandri. Vacillat ergo tota hæc Cartesii doctrina. Is præterea ut probet subsidio sensuum non egere animum ad ideas effingendas, hoc utitur argumento: nihil aliud à rebus externis ad animum sensuum ope & interposito pervenire, quam motus quosdam corporeos, quos ne animus quidem tales percipit, quales sunt in sensibus; proptereaque ideas motuum & figurarum, & multo magis etiam doloris, colorum, sonorum, aliarumque rerum similium, in nobis esse ingeneratas, & animum sibi eas exhibere, quotiescunque excitatur per motus illos corporeos, quorum simile ni-

Cartesius
Epist. Tom. 1.
Epist. 99.

hil habent ideæ; unde colligit, cum ideæ rerum extrinsecus objectarum nobis sint innatæ, non à rebus externis ortæ, potiori jure idem de notionibus communibus, sive axiomatis esse dicendum, quæ neque sunt in rebus externis, nec per motus corporeos, sensuumve nuntium ad animum venisse possunt: res quippe externas, ac motus quoque illos, & sensus, res esse singulares; axiomata vero esse universalia nullam affinitatem cum motibus & sensibus habentia. Fateamur nos quidem ideas rerum externarum fingi ab animo, postquam de iis fingendis admonitus est motu quodam corporeo & nuntio sensuum à rebus externis impulsorum: ac motus illos corporeos dicimus plagam sive notam imprimere in cerebro; quam plagam in cerebro deprehendens animus proxime illi conjunctus, hoc velut admonitu, hanc, illamve ideam concipit ac confingit, cum prius non esset; minime vero eam sibi exhibet & recognoscit, quasi prius esset. Neque ullam porro concipere & confingere potest, nisi plagam hujusmodi in cerebro perceperit. Universales porro ideæ exce-

ptæ sunt ex singularibus, cum animus in rebus multis idem quippiam animadvertens, excerpit illud è multis in quibus fuerat dispersum, & in unum colligit, atque inde ideam universalem conflatur. Velut in Petro & Johanne, aliisque hominibus singulis deprehendens eos esse animalia ratione prædita, jam neque Petrum, neque Johannem, neque ullum singularem hominem spectans, educit illud & componit in unum quod multiplex fuerat, ac generalem illam & universalem conflatur & confingit ideam, sibi commendat, omnem hominem esse animal rationale.

*Falsum est in
Conario præci-
pua esse se-
dem animi.*

X. Ulterius etiam conjiciendo progressus est Cartesius, & partem corporis in qua præcipuam sibi sedem delegit humanus animus deprehendisse se jactavit. Hanc esse vult particulam illam de genere glandularum, quæ Conarium à figura appellatur, quæque subjecta est projecturis illis duabus cerebri, quas γλῆνῃ Veteres dixerunt. Causas cur id opinetur, has affert; ad percipiendas res externas duplicia nos à natura habere instrumenta, duos oculos, duas aures, duas manus; cogitationes vero

ostreas, simplices esse atque unas; necessarium esse itaque, ut pars aliqua sit nobis simplex atque una, quæ duplices rerum externarum impressiones à sensuum instrumentis exceptas recolligat & in unum conjungat, antequam ad animum perveniant; ne res externæ singulares & simplices ab eo tanquam geminatae & duplices percipiantur; in cerebro autem, ad quod sensuum pertinent instrumenta, & rerum externarum imagines appellant, nullam aliam hujusmodi reperiri partem, quam Conarium istud; quod neque duplex est, ut reliquæ partes cerebri; nec tot mutationibus, morbisve obnoxium; & medium hujus obtinet; & inter ventriculos cerebri ita situm est, utceptorum in iis spirituum animalium cursus temperare, & ab iis ultro citroque comitantibus vicissim moveri possit, ut pote ex tenuissimis suspensum arteriis. Magna enimvero apud Cartesianos commenti hujus admirabilitas olim fuit, quasi abstrusum illud ac reconditum corporis & spiritus vinculum unus industria sua patefecisset. At plerosque credulitatis suæ tandem puduit; non

nulli ne nunc quidem resipiscunt. Nos quam nauci nihilique sit hæc opinio paucis ostendemus. Negamus primum necessarium esse, ut in nobis sit pars aliqua simplex & unica, quæ duplices rerum imagines conjungat, ne geminentur in animo earum perceptiones. Quemadmodum enim si tympana duo ejusdem soni, eodem tempore, æquali ictu pulsantur, etiamsi sint soni duo, sic tamen afficiuntur aures nostræ, quasi unus sit sonus: ita etiamsi in sensuum instrumentis externæ rei impressio geminetur, quoniam tamen duæ res omnino congruentes, eodem tempore, eodemque modo referuntur ad cerebrum, perinde fit ac si simplex prorsus foret impressio. Jam quod ait partes cerebri reliquas esse duplices, solam hanc unam & singularem, ridiculum est: annon enim quartus cerebri ventriculus, quem Nobilem vocant, unus est? annon tertius, proptereaque in eo collocatus ab Herophilo animi principatus? annon una est glans illa, cui Pituitariæ nomen fecerunt? annon unus Fornix basis? unum Infundibulum? unum Septum lucidum? unum *μεσοφρον*.

hoc est Medium superciliorum, in quo
μενικὸν mentis posuit Strato? una ra-
lix Medullæ spinalis, qua nempe in-
amos abire incipit? una Cerebelli Epi-
physis vermiformis? annon Cerebel-
lum quoque unicum est? annon Cere-
brum? annon Caput ipsum, quod to-
tum esse animi sedem voluerunt De-
mocritus & Plato? Respondet Carte-
sius, hæc nomine tantum una esse, re-
ipsa duplicia vel multiplicia potius.
Quasi tertius ventriculus, quasi quar-
tus, duplex aut multiplex dici possit.
Quasi Conarium duplex aut multiplex
dici non possit. Annon enim bifariam,
multifariamque scindi potest? annon
utraq; pars suis est instructa fibris?
annon geminus ejus nervus est? annon
multi sinus, quibus collectos humores
in modum spongiæ continet? Jam quod
ait Cartesius, perpaucis esse illud mu-
tationibus, morbisve obnoxium, fal-
sum hoc est: ita enim flaccescit in ca-
daveribus, teste ipso Cartesio, vix ut
deprehendi possit; & simul atque aëri
expositum est, concidit & detumescit;
humore nimirum, quem sinubus suis
continet, vel in annexa vasa profuen-

te, vel per vicini aëris appulsum exarescente. Hinc efficitur, ut in vivis etiam corporibus, prout affecta sunt vel calore, vel frigore; vel morbo, vel sanitate; vel ebrietate & satietate, vel siti & fame; vel humorum abundantia, vel siccitate, sæpissime mutari id necesse sit. Itaque in eo repertas esse aliquando arenulas, atque etiam calculos testificantur Medicorum filii. Ineptum vero est, & à recentiorum Anatomicorum inventis ac doctrina prorsus alienum, & à Galeno ipso jam olim confutatum, quod subjungit Cartesius, temperari à Conariomotus spirituum animalium in cerebri ventriculis curricula sua exercentium. Fuit hæc veterum opinio, conceptacula illa cerebri, spirituum animalium esse officinas: verum subtilioribus Anatomices experimentis cognitum est, destinata ea esse excipiendis cerebri excrementis, quæ illic collecta devoluuntur in Infundibulum, Pituitariamque glandulam, & in Processus mamillares, & os Ethmoides. Inde adeo humore sæpe plena, semper certe obducta & madefacta reperiuntur. Conarii vero ipsius non alium esse volunt

*Galen. de usu
part. libr. 8.
cap. 14.*

volunt usum, quam reliquatum corporis glandularum, excernendi videlicet humores superfluos: excernit enim humores crurum superiorum Spinalis medullæ, ut Warthono placet; vel serum sanguinis proximis Plexus choroidis vasis inclusi, ut Willisio; diligenti utrique inspectori naturæ. Cum ergo Conarium, & sero quod in cavernis suis continet, & perpetuo pituitæ appulsu, quæ in cerebri ventriculos influit, semper humectum sit & madens, extingui necesse foret illud animi rationisque lumen, quod ex sublimi hac arce in totum hominem emicare fingit Cartesius; & obruerentur animales illi spiritus, quos alioqui tam copiosos quænam illuc vasa, qui canales inferre possint, minime apparet.



CAPUT QUARTUM.

Expenditur Cartesii sententia de
existentia Dei.

I. Exponitur Cartesii sententia de
existentia Dei. II. Exploratur Cartesii
opinio de idea rei infinita & summe per-
fecta, qua in nobis est. III. Idea rei
infinita & summe perfecta, qua in nobis
est, finita est & imperfecta. IV. Falsum
est finitum cognosci ex infinito, non hoc
ex illo. V. Idea rei infinita & summe
perfecta, qua in nobis est, neque clara
est, neque distincta. VI. Idea rei infini-
ta & summe perfecta, qua in nobis est;
aliunde proficisci potest, quam à re infi-
nita & summe perfecta. VII. Realitas
objectiva, qua est in idea rei infinita &
summe perfecta, tota est à mente nostra.
VIII. Ex idea rei infinita & summe
perfecta, qua in nobis est, non necessario
sequitur rem illam infinitam & summe
perfectam extra mentem nostram extare.
IX. Ex idea rei infinita & summe per-
fecta, qua in me & aliis est, colligi non
potest existentia Dei; nec proinde ex

*illa qua in Cartesio est. X. Per vitiosum
ratiocinationis circulum existentiam Dei
probat Cartesius. XI. Expugnatis argu-
mentis, quibus existentiam Dei demon-
strare conatus est Cartesius, ruit ipso fa-
tente, omnis ejus Philosophia, & fene-
stra erroribus aperta est.*

I. **S**Uo nunc ordine flagitat censuram
nostram Cartesii argumentatio,
vel ludificatio potius, de *existentia* Dei.
Ea est hujusmodi. Nemo, inquit, ho-
mo est, qui si mentem suam excutere,
& mentis notiones explicare aut possit,
aut velit, in ea non deprehendat splen-
didam & insignem ideam sibi ingeni-
tam rei cujusdam infinitæ, æternæ, im-
mensæ, omnipotentis, omnia scientis,
& summe perfectæ, quam Deum ap-
pellamus. Idea porro hæc, cum om-
nem in se præstantiam, excellentiam-
que contineat, nec desit illi quidquam
ad summam perfectionem, non potuit
à rebus externis per sensuum nuntium
ad nos pervenire, ut pote rerum illa-
rum, quæ fluxæ sunt, mutabiles, &
caducæ, dissimillima. Nec eam item in
nobis ipsi confinximus: quæ enim ho-

*Exponitur
Cartesii sen-
tentia de exi-
stentia Dei.*

munculus imbecillus, infirmus, mortalis, sensibus obtusis, ingenio hebeti præditus, opus edat longe se nobilius, & excellentius, cujusmodi hæc idea est? Quærendus igitur alius est ideæ hujus effector, qui tantæ sit potentiæ, ut tam eximiis dotibus, infinitate, æternitate, immensitate, omnique excellentia instructum hoc opus edere potuerit. Cum autem consentiant omnes, quantumcunque præstantiæ insit in opere, tantumdem vel plus etiam inesse debere in opifice; alioqui præstantiam hanc & eximias dotes nullam causam habituras cur extent, quod Philosophus nemo dixerit, sequitur ideæ hujus opificem infinitum esse, omnipotentem & summe perfectum. Præterea cum res illa, cujus ideam in mente habeo, infinita sit & summe perfecta, nihil illi deesse potest, quod ad summam perfectionem & absolutionem desideretur. Nihil autem plus requiritur ad summam præstantiam & perfectionem, quam existere. Res igitur illa, Deus videlicet, existit: ac necessario quidem; quippe cum tam necessarium sit id existere, quod summe perfectum est,

quam necessarium est, figuræ ejus quæ tribus constet angulis, tres angulos æquales esse duobus rectis; nec facilius sit rem infinitam & summe perfectam, quæque non existat, cogitare, quam montis ideam habere in animo sine idea vallis. His argumentis ut vis addatur, in hanc formam compingit ea & contrahit Cartesiana Schola: Ideam rei infinitæ & summe perfectæ in mente habeo: idea autem illa non aliunde proficisci potest, quam à re infinita itidem & summe perfecta: res igitur infinita & summe perfecta existit. Hæc autem Deus est: Deus igitur existit. Deinde: Quidquid pertinere ad rem, cujus ideam in mente habeo, clare & distincte percipio, id ad rem illam revera pertinet: *existentiam* autem ad rem infinitam & summe perfectam, cujus ideam in mente habeo, clare & distincte pertinere percipio: ergo ad rem infinitam & summe perfectam, Deum scilicet, cujus ideam in mente habeo, pertinet *existentia*.

II. Magna vero hic inest concertatio de ideæ hujus natura: hinc enim tota pendet argumentatio. Nam si alterius

*Exploratur
Cartesii opi-
nio de idea rei
infinitæ &*

Summe perfectæ, quæ in nobis est.

non est naturæ ac reliquæ ideæ quæ in nobis sunt, frustra ad summe perfectam & infinitam causam recurritur. Ambigua est autem in ideæ nomine significatio: nam vel notatur actio mentis quæ cogitamus; vel id ipsum quod menti nostræ objectum est, & de quo cogitamus. Constat autem ideam rei infinitæ & summe perfectæ, quæ in nobis est, priore modo sumtam, finitum quid esse & imperfectum; cum perfectior esse non possit mente ipsa unde orta est, quæ imperfecta ipsa est & finita: quatenus autem significat imaginem rei infinitæ & summe perfectæ, quæ menti nostræ objecta est, & de qua cogitamus, tantam ejus esse dignitatem & præstantiam vult Cartesius, ut non modo mentis nostræ perfectionem longe superet, sed à Deo solo oriri potuerit. Quamvis enim infinitum animo comprehendere non possimus, ut pote qui finiti sumus, at id posse certe nos percipere docet: cumque in infinito duo spectanda sint, & res ipsa quæ infinita est, & infinitio quæ inest in re illa, infinitionem hanc percipere nos *negative* (liceat enim voces de Scholis depromtas usur-

pate) hoc est, nullos in ea terminos à nobis deprehendi; at rem ipsam percipere nos *positive*, licet non *adequate* & perfecte. Quemadmodum autem trianguli ideam habere possumus, etiamsi quæcunque de eo sciri possunt non sciamus: ita etiamsi totam infiniti immensitatem animo perfecte comprehensam non habeamus, habere nos tamen ideam claram & distinctam infiniti; totumque ipsum, licet non omnino, neque omni ex parte, percipere. Ut cum mare è litore prospicimus, etsi totius maris amplitudinem non videmus, at mare tamen ipsum vere videmus.

III. Quæ cum ita differit Cartesius, plane suo se gladio jugulat. Nam si infinitio rei infinitæ percipi non potest nisi *negative*; & infinitum ipsum etiamsi *positive* percipiatur, percipi tamen non potest *adequate* ac perfecte; certe rei infinitæ & infinitionis idea finita est. Quid enim est aliud, rem percipere *negative*, quam percipere quid non sit, sive, ut loquitur Dionysius, aliique Theologi, *cognoscere per excessum & remotionem*. Infinitionem igitur si non aliter percipi posse quam *negative* fate-

Idea rei infinitæ & summe perfectæ, quæ in nobis est, finita est & imperfecta.

Dionys. De divin. nomin. libr. 1. c. 1.

tur Cartesius, fateatur quoque necesse est sciri quidem posse quid non sit infinitio, sciri vero non posse quid sit; ac proinde ideam infinitionis quæ in nobis est, esse ideam, non ejus quod est infinitio, sed ejus quod non est. Id autem quod non est infinitio, est finitum: unde sequitur, ideam infinitionis; quæ in nobis est, esse finitam. Jam ex eo quod ait rem infinitam percipi *positive*, etsi non perfecte & *adequate*; hoc est ideam rei infinitæ quæ in nobis est, *positive* exhibere nobis rem infinitam, etiamsi quidquid in re infinita est, *adequate* nobis non exhibeat, sequitur ideæ huic aliquid ad perfectionem & absolutionem deesse. Cui autem deest aliquid, id finitum est: unde manifeste colligitur, ideam rei infinitæ, quæ in nobis est, esse finitam. Nec juvat Cartesium similitudo trianguli. Triangulus enim finita res est, ut Sol, homo, arbor; atque idcirco ejus ideam habere possum: at cum proprietates trianguli sint infinitæ, quemadmodum & Solis, & hominis, & arboris, earum ideam habere non possum; nam infiniti ad mentem meam, quæ finita est, nulla

potest esse convenientia nec proportio. Itaque neque rei infinitæ, ob id ipsum quod infinita est, neque proprietatum rei infinitæ ideam habere possum: nam finitæ tantum ideæ apud me esse possunt: quæ autem idea finita est, rei infinitæ & summe perfectæ idea esse non potest. Ideæ enim, juxta Cartesium, sunt imagines rerum; imago autem finita, imago rei infinitæ esse non potest. Rem præclare illustrat & confirmat exemplum ipsum maris à Cartesio propositum. Si quis enim tractum aliquem maris è litore prospiciat, is mare quidem videre vulgo dicitur, at improprie, parte pro toto usurpata: re autem ipsa non mare, sed tantum particulam maris videt, ex qua maris universi vastitatem cognoscere nequaquam possit. Ita visio particulæ maris, & quæ ex ea nascitur idea, ad ideam maris universi collata, talis esse videbitur, qualis est pars ad totum; manca scilicet, mutilata, & imperfecta. Quoniam autem aliqua est particulæ maris ad totum mare proportio, ideam particulæ maris ita animo amplificare possum, ut ideam aliquam universitati totius maris æqualem.

aliquando tandem in me possim effingere: at finiti ad infinitum cum nulla sit omnino proportio, quantumcunque animo contendam ad amplificandam ideam quæ finita sit, numquam per eam rei infinitæ notitiam in me exprimam: animo tantum remove potero fines à re finita, eamque magis ac magis extendere; ita ut ad quantamlibet amplitudinem amplitudo alia, & ad hanc porro alia adjiciatur; quoad artimus deficiens in conatu, consistat tandem; non finem quidem ideæ illi imponens, sed agnoscens novis semper accessionibus locum in ea patere. Ergo non aliter percipit infinitum, quam cum rem percipit sine carere.

Falsum est finitum cognosci ex infinito, non hoc ex illo.

IV. Quamobrem sibi ipse repugnat Cartesius, cum ait prius se percipere infinitum, quam finitum; perfectum, quam imperfectum; Deum, quam se ipsum; nec aliter percipere se finitum & imperfectum, quam cum comparatur ad infinitum & perfectum. Nam notionum omnium primam hanc esse, *Ego cogito, ergo sum*, magno dubitationum apparatu docuit. Finita est autem hæc notio. Deinde cum fateatur

infinitionem rei infinitæ; sive id per quod res infinita est, cognosci tantum *negative*; necesse est ideam rei hujus, finitam quidem esse *positive*; at finibus ab ea per mentis actionem remotis, id quod est finitum *positive*, fieri infinitum *negative*; quod tantumdem est ac si dicam, ideam rei hujus quæ finita est, spectari ut non finitam, non vero percipi ut infinitam. Quemadmodum si viam spectem, per quam Lutetia ad regiones exteras itur versus orientem, etsi infinitam non esse scio, nullum tamen ei animo finem constituo; quocirca illam specto, non ut infinitam, sed tantum ut non finitam, sive, ut loquitur Cartesius, *indefinitam*. Cum igitur *negativa* infinities, quam idea affingimus, oriatur ex detractioe finium quibus continebatur hæc idea, plane perspicuum est, non ex infinito percipi finitum; sed contra, remotis finibus ex eo quod finitum est percipi infinitum. Atque in idipsum quod fugiebat incidit Cartesius, cum subjunxit, ad percipiendam rem infinitam & summe perfectam, sufficere ut intelligatur eam à nobis comprehendere non posse, & quæcun-

que perfectione aliqua & præstantia prædita esse scimus, aliaque hujusmodi innumera quæ nescimus, in re illa inesse. In quo aperte faterur se agnoscere rem illam, cujus ideam in mente habet, infinitam esse & summe perfectam, comparando eam cum rebus finitis aliqua perfectione præditis; quarum rerum perfectione in unum collecta, aliarumque rerum complurium quas ignoramus perfectione adjecta, exurgit in nobis idea quædam; infinita quidem *negative*, at positive finita. Futilis quoque est & captiosa alia argumentatio, qua Paradoxi hujus novitatem defendit. Id, inquit, quo à finito differt infinitum, *reale* est aliquid & *positivum*: (voces ejus refero.) Id autem quo finitum differt ab infinito, nempe limitatio, est aliquid *negativum*; defectus scilicet *entis*. Acquiri autem non potest notitia ejus quod est, per id quod non est; cum e contrario per id quod est cognoscatur id quod non est. Unde efficitur cognosci finitum per infinitum, non hoc per illud. Fateor id quo infinitum differt à finito, *reale* quid esse & *positivum*, si ad ejus natu-

tam attendatur: sin id referatur ad nostram cognitionem, cum infinitum mens humana percipere non possit nisi *negative*, id quo infinitum à finito differre percipimus, *negativum* tantum est, non *positivum*. Nego vero limitationem merum esse defectum, seu meram negationem; est enim mixtum quid ex *positivo*, re nempe ipsa finita; & *negativo*, iis nempe omnibus quæ adjici possunt ad rem finitam, neque tamen adjiciuntur; sed ita tamen mixtum, ut in idea limitationis hujus, multo plus *positivi* insit, quam *negativi*. Velut cum circulum ambitu suo finitum specto, idea circumscriptionis seu limitationis circuli, quam mente informo, non tam constat ex negatione ulterioris *extensionis* quam ex circuli intra ambitus sui fines conclusi notione. Finis enim rei est res ipsa quatenus ulterius non extenditur. Similiter cum ternarii numeri circumscriptionem seu limitationem specto, non tam attendo ad infinitas unitates quæ adjici possunt, quam ad tres illas quibus solis constat hic numerus. Huc accedit quod finis seu limitatio rei efficitur, non solum ex eo

quod res illa caret partibus aliis quæ ad eam adjici poterant, nec adjectæ sunt, sed ex eo etiam quod retinet partes suas, quæ detrahi poterant, nec detractæ sunt. Ternarius enim numerus tribus unitatibus constat, & definitus est; non solum quod aliæ unitates adjectæ non sunt, sed etiam quod retinet tres illas unitates ex quibus constat. Unde perspicuum est limitationem non mere esse *negativam*, sed & *positivam*. His expositis facile solvitur argumenti Cartesiani compages. Ait ille non cognosci id quod est, per id quod non est; nec proinde infinitum per limitationem, sed hanc per illam; atque idcirco nec infinitum per finitum. Verum si res in se spectentur, tam est quod finitum est, quam quod infinitum: sin ad cognitionis nostræ modum exigantur, uti exigendæ sunt, nam id nunc agitur, finitum cognoscimus *positive*, infinitum vero *negative* tantum, & in limitationis idea longe plus *positivi* inest quam *negativi*. Quamobrem cum, fatente Cartesio, cognoscatur *negativum* ex *positivo*, non hoc ex illo, omnino dicendum est, ex *infinito*, uti à nobis percipi-

tur, neutiquam cognosci finitum. Clarius quoque alibi Paradoxum hoc suum, seque adeo Cartesius prodidit, cum conceptis verbis falsus est, sufficere ad exprimendam in nobis ideam infiniti, rem percipere finibus carentem: *Cartes. Epist.*
 quod cum ipsi deinde objectum esset, *19. & 16.*
 in manifesta repugnantia deprehensus, *Tom. 2. p.*
 non satis candide eam excusare conatus est. Quamvis ergo satis demonstratum sit, finitam esse & imperfectam ideam rei infinitæ & summe perfectæ, quæ in nobis est, addendum tamen est hoc quoque; cum idea Dei aliud sit ac Deus ipse, si idea Dei est infinita & summe perfecta, sequitur esse aliquid infinitum & summe perfectum præter Deum: quidquid autem infinitum est & summe perfectum, Deus est: igitur præter Deum alter Deus est. Quæ ne fateri cogantur Cartesiani, ideam rei infinitæ & summe perfectæ, quam habent, non quidem infinitam & summe perfectam esse aiunt, sed tantum claram & distinctam.

V. Sed si idea rei infinitæ & summe perfectæ, quæ in nobis est, imperfecta est & finita, certe neque clara esse

Idea rei infinitæ & summe perfectæ, quæ in nobis

est, neque
clara est, ne-
que distincta.

160 *Censura Philosophia*

potest, neque distincta. Nam cum *ideæ* sint imagines rerum, ut dixi; imago illa rei summe perfectæ & infinitæ, quæ in nobis est, cum imperfecta sit, similis esse non potest sui exemplaris, quod summe perfectum est; item cum finita sit, similis esse non potest infiniti illius archetypi: nam quid perfecti dissimilius quam imperfectum? quid infiniti, quam finitum? Jam si idea aliqua dissimilis est rei cujus est idea, clara quidem & distincta, si solam in se spectes, esse potest; at si contendas cum exemplari ad quod expressa est, neque clara esse potest neque distincta. Nam si imago Socratis, non valde quidem similis sit ipsius Socratis, sed scire tamen & eleganter depicta sit, claram utique & distinctam sui notitiam & specimen spectantibus dabit hæc pictura; at si eam ad Socratem referas, neque claram, neque distinctam Socratis notitiam dabit. Similiter si quis maris tractum aliquem è litore prospicit, vel ad montis alicujus latissime patentis radices jaccens, manu eum contingat (juvat enim, uti exemplis ipsis Cartesii) claram quidem & distinctam tractus hujus maris

quem videt, vel particulæ montis quam contingit, ideam mente hauriet; obscuram autem & confusam maris, montisve universi. Pari ergo ratione ex imagine infiniti, quæ infiniti sit dissimilis, & id perfecte & accurate non referat, claram quidem & distinctam notitiam percipiam ejus rei quæ in mente mea informabitur, finitæ videlicet: at nihil id ad infinitum. Deinde ut imaginem infiniti claram & distinctam in me esse sciam, prius infinitum ipsum clare mihi & distincte noscendum est. Nam quâ de imagine Socratis arbitrium certo facere possim, qui Socratem nusquam vidi? Cum autem infiniti notitiam nullam habeam, neque vero habere possim, de ejus imagine certi nihil possum statuere. Quapropter valde abstrusa, & ab hominum mentibus longe semota, non priscis solum Philosophis, sed gentibus etiam omnibus semper visa est cognitio Dei. Quod & sacrorum Oraculorum testificatione sæpius declaratum est. *Posuit tenebras latibulum suum*, Psalm 139. 12. inquit Psalter de Deo. Et iterum, *Nubes & caligo in circuitu ejus*. Isaias quoque, *Vere tu es Deus absconditus*. Item Isa. 45. 15.

1. Tim. 6. 16.

Paulus, *Lucem habitat inaccessibilem, quem nullus hominum vidit, sed nec videre potest.*

Idea rei infinitæ & summe perfectæ, quæ in nobis est, aliunde proficisci potest, quam à re infinita & summe perfecta.

VI. Explicata & soluta propositione Cartesiani argumenti, ruit ipsa sponte sua ejusdem assumptio, qua statuit ideam rei infinitæ & summe perfectæ quæ in nobis est, non aliunde proficisci posse, quam à re infinita & summe perfecta. Nam si idea hæc rei infinitæ & summe perfectæ, finita ipsa est & imperfecta, aliunde sane proficisci potest, quam à re infinita & summe perfecta; neque necesse est, ut majoris dignationis, majorisque præstantiæ ei assignetur causa, quam rebus cæteris, quæ finitæ itidem sunt & imperfectæ. Et vero si id quod tam sæpe à nobis flagitat & exigit Cartesius, præstitisset ipse, & attenta circumspectione animi sui notiones explorasset, tum facile deprehendisset, aliam esse posse originem, aliasque causas ideæ hujus Dei, quæ in nobis est, quam quas ipse commentus est. Nam ex confusa nostri, aliarumque rerum cognitione, quæ inest in nobis, Dei ideam κατὰ μεταβασιν, hoc est, per transi-
tionem, ut loquitur Tullius, & simi-

itudinem informari & exprimi manifestum est. Puta, ex eo quod sumus mortales, moriendi necessitatem mente à Deo removemus; ex eo quod sumus corporèi, molem corporis à Deo detrahimus; ex eo quod erroribus, quod perturbationibus animi, quod vitiis sumus obnoxii, horum omnium expertem facimus Deum. Jam si quid boni in nobis, aliisve rebus esse intelligimus, pulchritudinem, robur, intelligentiam, scientiam, virtutem, felicitatem, hæc magis magisque animo amplificamus, & præter id quod potuimus cogitando confingere, longe plura superesse putamus. Quam informationem, quoniam finitus est & angustus noster animus, longe citra infinitatem consistere necesse est, & valde obscuram esse ac confusam. Ergone, inquires, nullam habemus Dei notitiam? habemus vero, & manifestam quidem; at non ex idea Dei haustam, sed ratiocinando collectam, & ex gentium omnium consensu, & ex præclaro mundi ornatu & ordine, & ex rerum, uti vocant, *existentia*, earumdemque motu, aliisque argumentis, quæ & à veteribus Philosophis, & à

sanctis Ecclesiæ Patribus feliciter sunt usurpata. Nam de ea, quam per Fidem accepimus, Dei cognitione, nunc quidem non agimus. Porro qualiacunque sint hæc argumenta quæ dixi, Deum quidem esse nobis persuadere possunt; at quid sit, quæque ejus natura sit, propter angustiam & caliginem mentis nostræ, nos edocere non possunt.

Realitas ob-
jectiva. quæ
est in idea rei
infinitæ &
summe perfe-
ctæ, tota est à
mente nostra.

VII. Ex his intelligitur *realitatem* illam *objectivam* Cartesii, quæ est in idea rei infinitæ & summe perfectæ, totam esse à mente nostra, neque ulla sui parte ab ea re proxime pendere, quam menti nostræ exhibet. Hæc ut clarissima fiant, & omnis commenti hujus fucus eluatur, pressius agamus cum Cartesio, & decantaræ hujus *realitatis objectivæ*, unde tam speciosa educuntur miracula, vim, naturamque explicemus. Animo informem mundum alterum ab hoc nostro plane diversum: *realitas objectiva* mundi illius nihil aliud est, quam *realitas* mundi illius, quatenus menti meæ objectus est; qui sive extet, sive non extet, cum in mente mea non sit, nec in mentem meam quicquam immittat, quidquid sit illud quod

menti meæ objectum est, nihil omnino ad alterum hunc mundum pertinere liquet, & solius mentis meæ fœtum esse, ad arbitrium meum ita se componentis, taliaque sibi fingentis. At certe, inquit Cartesius, *realitas objectiva* commentitii illius mundi menti obversantis, non est plane nihil. Fateor id sane; nam cum de altero hoc mundo cogito, aliud est in mente mea, quam cum de Chimæra cogito. Nihilum autem non differt à nihilo; & idcirco hæc cum differant, sunt aliquid. Quid ergo ea esse dicendum? idem nempe ac figuras ceræ impressas; modos videlicet. At modi isti non sunt omnino nihil: nam quamvis cera in cubum ducta, eadem cera sit ac ducta in globum, aliter tamen modificata est; & cum inter se discrepent modificationes istæ, utique sunt aliquid. Similiter mens de altero mundo cogitans, aliter modificata est, quam cum de Chimæra cogitat, neque negari potest modificationes istas esse aliquid. Hinc sequitur *realitatem objectivam* ideæ alicujus, nihil esse aliud quam *realitatem* modificationis, quæ in mente est, dum hanc ideam sibi objectam

habet. Quo nomine *realitatis* si id significatur, modificationem istam esse rem aliquam distinctam à nihilo, eam admittimus; si significatur esse substantiam, negamus in modificatione hac *realitatem* ullam inesse. Quamobrem modificationi huic tantum *realitatis* concedimus, quantum satis est ut non sit omnino nihil: at *realitatem* hanc *realitate* substantiæ longe tenuiorem & exiliorem esse apparet; neque ad eam modificationi ulli mentis nostræ conciliandam necesse esse, ut infinita summeque perfecta causa proxima requiratur.

Ex idea rei infinitæ, & summe perfectæ, quæ in nobis est, non necessario sequitur rem illam infinitam & summe perfectam exera mentem nostram ex-
tare.

VIII. Expugnato priore hoc Cartesii argumento, expedita est posterioris confutatio, cui præfixa est ista propositio: Quidquid pertinere ad rem, cuius ideam in mente habeo, clare & distincte percipio, id ad rem illam revera pertinet. Hoc præcise negari potest, Cartesio præsertim, qui de rebus omnibus dubitare nos jubet: pendet enim ab eo decreto, quo in perspicuitate ponendum esse Criterium statuitur, quodque à nobis supra profligatum est. Et exemplo præterea falsitatem effati hu-

jus comprobabimus. Ad duas lineas in eadem area plana jacentes, & quo longius producantur, eo propius ad se mutuo accedentes, quarum ideam in mente habeo, pertinere clare & distincte percipio, ut concurrant aliquando: nusquam tamen Hyperbole, ejusque Asymptotus, quantumlibet productæ, concurrent; etiamsi magis, magisque altera ad alteram producendo accedat. Quod ab Apollonio Pergæo demonstratum est. Verum nolim hic litem movere Cartesio; & pronuntiatum hoc liberaliter admitto. Subjungit ille, clare se & distincte percipere *existentiam* pertinere ad rem infinitam & summe perfectam. In eo vertitur cardo alterius hujus argumenti, ac propterea diligenter expendendum est. Duplex est rerum genus; earum quæ pendent à mente, neque extra mentem sunt ullibi, planeque sunt commentitiæ; & earum quæ reipsa sunt, atque etiam nemine de iis cogitante vere sunt in rerum natura. In Scholis priores illæ barbære dicuntur *dari* tantum à *parte intellectus*; posteriores hæc *dari à parte rei*. Extant utraq; sed diverso modo, earumque *exi-*

Apollon. Con-
nic. libr. 2.
Prop. 1. & 14.

stentia naturam earum sequitur : nam quæ sunt tantum à *parte intellectus*, existunt tantum à *parte intellectus* ; quæ sunt à *parte rei*, existunt à *parte rei*. Itaque rei infinitæ & summe perfectæ *existentia* sequitur naturam rei hujus : quæ si sit tantum à *parte intellectus*, non aliam obtinebit *existentiam* quam à *parte intellectus*. Sin vero sit à *parte rei*, quæ in eam conveniet *existentia*, erit à *parte rei*. Hæc argumentum Cartesii plane perimunt ; quod & clarius fiet, si in simplicio rem istam formam illud redigas. Quod summe perfectum est, necessario existit : res illa infinita & summe perfecta, cujus ideam in mente habeo, summe perfecta est : res igitur illa infinita & summe perfecta, cujus ideam in mente habeo, necessario existit. Propositioni adhibetur distinctio : Quod summe perfectum est, necessario existit, eo modo quo est. Si re ipsa est, re ipsa necessario existit. Si est tantum in intellectu, in intellectu tantum necessario existit. Opposita quoque distinctione excipitur assumptio : Res illa infinita & summe perfecta, cujus ideam in mente habeo, summe perfecta

fecta est, videlicet à *parte intellectus*: nam totum hoc de quo contenditur, idea solum est, ex cujus natura probare conatur Cartesius, Deum existere à *parte rei*. Liquet itaque sensus conclusionis: Res illa infinita & summe perfecta, cujus ideam in mente habeo, necessario existit à *parte intellectus*, sed non à *parte rei*. His ambagibus extricatis, jam ipse se prodit nodus difficultatis, qui totus latet in complexione duarum partium Propositionis; quarum prior est, *Quod summe perfectum est*; altera, *necessario existit*. Atqui pars illa prior propositionis propositionem alteram occulte involvit, hanc nempe, *Aliquid est summe perfectum*: & connexio illa, est, furtim hic usurpat significationem hanc, *existit à parte rei*; adeo ut is insit sensus in latebris propositionis hujus, *Aliquid existit à parte rei, quod est summe perfectum*. Sumit id itaque Cartesius, quod controversum est; nam cum ait, *Quod summe perfectum est, necessario existit*; tantumdem hoc est, ac si diceret, *Aliquid existit à parte rei quod est summe perfectum, atque id necessario existit à par-*

te rei. In quo ponit pro confesso, quod quæritur, ac manifeste petit principium. Hæc ut eludant Cartesiani, ac probent in magistri sui argumentatione non sumi ut concessam *existentiam* rei infinitæ & summe perfectæ, in exemplum proponere solent hunc syllogismum: Quidquid clare & distincte cognosco in idea rei alicujus contineri, id rei illi adscribendum est: atqui in idea trianguli clare & distincte cognosco tres angulos contineri: tres igitur anguli adscribendi sunt triangulo. Si quis, inquiunt, ad id respondeat tres angulos adscribendos esse triangulo, modo adscribendi sint triangulo, inepte respondeat: nec enim sumitur hic ut concessum, quod vi ipsius argumenti obtinetur. Idem porro peccare aiunt, qui sic solvunt argumentum istud, Quidquid clare & distincte cognosco in idea rei alicujus contineri, id rei illi adscribendum est: atqui in idea rei infinitæ & summe perfectæ, clare & distincte cognosco *existentiam* contineri: ergo *existentia* adscribenda est rei infinitæ & summe perfectæ. Aiunt, inquam, frustra responderi *existentiam*

adhibendam esse rei infinitæ & summe perfectæ, modo existat; nec enim se sumere ut concessum, quod obtinent vi argumenti. Verum hic quoque nobis officias prætendunt; nam inter Syllogismi utriusque assumptiones magna intercedit differentia: in priore quippe assumptione, quæ talis est, *In idea trianguli clare & distincte cognosco tres angulos contineri*, triangulo id tribuitur, sine quo triangulus esse non potest, quodque naturam ejus constituit; omnino enim pertinet ad naturam trianguli, tres habere angulos. At in altera assumptione, quæ talis est, *In idea rei infinitæ & summe perfectæ clare & distincte cognosco existentiam contineri*, id tribuitur rei infinitæ & summe perfectæ, quod cujusmodi sit, & an ad ejus naturam pertineat, non certo constat; nunc enim id ipsum inter nos quaeritur, an ad rei infinitæ & summe perfectæ, cujus ideam in mente habeo, naturam pertineat *existentia*, & cujusmodi *existentia*: atque id cum in quaestione positum sit, sumitur omnino quaesitum pro concessio. Quamvis ergo dem, me non posse animo informare ideam

rei infinitæ & summe perfectæ, nisi existentis; ut neque ideam montis sine idea vallis; non propterea concessero rem infinitam & summe perfectam existere, ut neque hunc montem vallemve, quorum ideas in mente habeo. Nec ullum latet hic sophisma, ut frustra caussatur Cartesius, qui id ita conatur dissolvere; ex eo quidem quod idea montis in me non possit esse sine idea vallis, non sequi montem illum vallemve existere; at ex eo quod animo informare non possim ideam rei infinitæ & summe perfectæ, nisi existentis, necessario sequi rem infinitam & summe perfectam existere. In quo adhibet ipse Sophisma ad responsionem hanc infringendam: nam ex eo quod animo informare non possim rem infinitam & summe perfectam, nisi existentem, sequitur existere quidem illam, at in animo tantum meo, non re ipsa; & *existentiam*, quam idea illa includit, cogitatione ab ea separari non posse. Quapropter quotiescunque exoritur in animo meo idea rei infinitæ & summe perfectæ, exoriri quoque necesse est ideam *existentiam*, alterius ideæ comitem individuum, &

cum de una cogitat, cogitare quoque de altera; at cum de re infinita & summe perfecta, ejusque *existentia* cogitat, nihil necesse est rem infinitam & summe perfectam, ejusque *existentiam* extra cogitationem extare. Sive id libet Scholæ locutionibus explicare: Rem infinitam & summe perfectam, cujus ideam in mente habeo, sive quæ est à *parte intellectus*, necessario comitatur *existentia à parte intellectus*; minime vero eam comitari necesse est *existentiam à parte rei*. Urgent rursus Cartesiani, & aiunt, Rem infinitam & summe perfectam esse *ens* ipsum $\alpha\tau\iota\varsigma\chi\eta\nu$, *ens* generale, *ens* infinitum; id cum sit simplicissimum, simplicissimam quoque esse ejus ideam; quæ cum *existentiam* necessario contineat, sequi *ens* ex se, suaque natura existere; repugnare quippe *ens* non existere. Pergunt ambiguitatis latebras quærere; *ens* enim illud generale, notio mentis quædam generalis est, ex singularium *entium* notionibus collecta; ut animal, notio mentis est ex singulis animalium notionibus conflata; atque *ens* illud generatim sumtum, ex æquo pertinet

ad res quæ non aliter existunt, quam in mente, & ad eas quæ extra mentem reipsa existunt; & quatenus pertinet ad rem infinitam & summe perfectam; quæ in mente mea est, reipsa non existit. Ergo si ad vocem illam *entis* adhibeatur solennis nostra distinctio, ad eam impacta omnis hæc ratiocinatio dissiliet. Talis illa est: Res infinita & summe perfecta est *ens* ejusdem naturæ ac res ipsa infinita & summe perfecta; *ens* nempe quod extra mentem meam reipsa non existit; non vero est *ens* reipsa extra mentem meam existens.

Ex idea rei infinitæ & summe perfectæ, quæ in me & aliis est, colligi non potest existentia Dei, ac proinde nec ex illa, quæ in Cartesio est.

IX. Sed ut certius idea hæc Cartesianæ rei infinitæ & summe perfectæ cognoscatur, suisque momentis æstimetur, aio me æquo jure cum Cartesio acturum, si ex idea rei hujus, quæ non in me solum, qui exilis sum ingenii, sed & in maximis fere ætatum omnium Philosophis fuit, judicium faciam de idea Cartesii. Atqui neque ego, neque veteres illi Magistri, ideam ullam in nobis deprehendimus, in qua tantum præstantiæ, dignitatis, & perfectionis insit, ut non humanæ opis, sed solius

potentiæ Dei opus esse dicenda: sit Si enim infinitatem & summam perfectionem in ea agnovissent Philosophi, qui Dei naturam diligenter & anxie scrutati sunt; tantamque præstantiam, ut ab humana mente orta esse non posset, unum illum esse, corpore carentem, nulla præditum figura, infinitum, æternum, summe perfectum esse magno consensu omnes haud dubie collegissent, uti factum à Cartesio est. At contra, vel multiplicem confinxerunt Deum, vel corporeum, vel globosum, vel animale, vel certis circumscriptum finibus, vel morti obnoxium, nec proinde summe perfectum: vel Deum omnino esse penitus negaverunt. Ad me vero quod attinet, cum ideam Dei quæ in me est attente considero, speciem quamdam deprehendo rei maxima præstantia & excellentia præditæ; ac tanta, quantam in nulla alia specie unquam deprehendisse me memini: & quamvis rerum omnium mihi videatur longe perfectissima, agnosco tamen quidquid illud perfectionis est, quod in idea hac percipio, longe infra immensam & infinitam Dei præstantiam

& perfectionem esse positum; & quantumcunque vires animi contendam, futurum numquam ut cogitatione tantam assequi excellentiam & complecti possim: quippe ex contagione rerum corporearum, quas sensibus usurpare soleo, semper allitum iri imperfectum quippiam & finitum ad ideam Dei quam in me conor exprimere: at quamvis veram Dei notitiam ab idea hac, quæ finita & imperfecta est, habere non possim, habere me tamen à ratione. Quamobrem longe verius, digniusque de Deo & cogitat & loquitur, qui nihil eorum esse dicit quæ cogitari possunt, quam qui Deum id esse quod cogitat, confidenter pronuntiare audet. Cum igitur idea Dei, quæ in me & aliis est, sit hujusmodi, ejus consimilem esse Cartesii ideam arbitrari possum & debeo; ac propterea nihil omnino opus esse, cur Deus ad eam informandam auctor asciscatur. Quod si solum se sapere, reliquos homines stolidos esse dicat Cartesius, ridebimus: quis enim fanaticus, aut furiosus, pari responsione deliramenta sua non approbet? Certe cum ab eo esset aliquando per lite-

ras quæsitum, unde sibi ideam comparasset hujusmodi, quam viri ingenio pollentes, quantalibet cura & attentione adhibita in se non reperirent, respondere ausus est, ideam hanc perinde ut in se, sic in aliis quoque inesse; verum ab iis non agnosci. At rursus ab eo quæsitum oportuit, cur viri illi, & ingeniosi, & diligentes, & ab eo admoniti, ideæ hujus tam splendidæ & illustri, in animis suis versantis essent inscii, solus ipse conscius esset. Nam quid ad id respondisset consentaneum rationi, aut simile veri? Quanto credibilius est, vanis ipsum imaginibus delusum censuisse ea se videre, quæ non videret; quam reliquos omnes ea non videre, quæ obtutibus eorum paterent?

X. Insignem denique & plane jocularem in argumentationis hujus Cartesianæ commissura *δ'αλληλίσμων*, sive ut loqui solent in Scholis, petitionem principii, & circulum supra jam à me notatum nunc iterum Lector animadvertat. Decernit ille nullam habere nos posse rei cujuslibet certam scientiam, priusquam Deum noverimus. Hinc effi-

*Per vitiosum
ratiocinationis
circulum exi-
stentiam Dei
probat Carte-
sius.*

citur, notitiam omnem quæ prævertitur in nobis notitiam Dei, esse incertam. Hoc si sit, ideæ omnes, notiones omnes; item propositiones, assumptiones, conclusiones, quibus ad comparandam Dei notitiam usus est Cartesius, incertæ sunt. Vel si totam hanc pompam demonstrationis, etiamsi constet ex omnibus ratiocinationis partibus, ratiocinationem tamen non esse, sed simplicem tantum, ut vocant, visionem & conscientiam, ridicule affirmantibus Cartesianis stolide credamus, conscientia tamen hæc, sive visio, incerta est. Quod si totum illud, quidquid tandem sit, incertum est; incertum quoque est quodcunque inde colligitur. Colligitur autem *existentia* Dei. Attamen ex hac cognitione Dei, tanquam certissima, & certissimis à se argumentis demonstrata colligit superiora hæc omnia certa esse, & quascunque prius habuerat causas dubitandi, posito hoc principio, penitus esse sublatas. Quamobrem manifestò in se recurrit. Deus existit, inquit, quia vera est idea Dei quæ in me est: vera est idea Dei quæ in me est, quia

Deus existit. Quo quid fingi potest magis ἀσυνλογόν ?

XI. Cæterum cum ex hac una Dei notitia omnem suam Philosophiam duxerit Cartesius, ideæque omnes suas, cogitationes, argumentationes, quantumvis claræ sint & distinctæ, dubias fore & inexploratas fassus sit, nisi sua *existentia* Dei probatione nitantur; vitiosam autem eam esse ac vanam à nobis liquido sit ostensum, solvitur splendidus ille omnis & operosus Cartesianæ Philosophiæ contextus. Videat igitur magnum illud veritatis columen, quid ex idea rei infinitæ & summe perfectæ in causæ suæ utilitatem possit depromere; cum & finitam esse ideam hanc, & imperfectam, & obscuram, & confusam, & minimum *realitatis* gradum obtinere, & ad probandam *existentiam* Dei plane inutilem, luculenter sit comprobatum. Videat etiam, satisne prudenter, satisque verecunde à se actum sit, cum jactavit passim & magnifice gloriatus est, certioribus argumentis ostendisse se Deum existere, quam ullum Epicherema Geometricum à Mathematicis sit demonstratum; atque

H vj

*Expugnatis
argumentis,
quibus exist-
entiam Dei
demonstrare
conatus est
Cartesius,
ruit, ipso fa-
tente, omnis
ejus Philoso-
phia, & fe-
nestra errori-
bus aperta est.*

una hac via quam aperuit, ad certam tantæ rei cognitionem perveniri; à qua via si qui deinceps discedere ausint, pro impiis jam inde esse habendos.

C A P U T Q U I N T U M.

Expenditur Cartesii sententia de corpore & vacuo.

I. *Exponitur Cartesii sententia de corpore & vacuo; II. & refellitur. III. In maximos errores Cartesium impigit ignoratio duplicis extensionis; quarum alia, quæ corporum est, positiva est; alia, quæ nihili est, est negativa. IV. Focularis error Cartesii de corporum duritie. V. Parum candide agit Cartesius, cum mundum esse ait indefinitum.*

*Exponitur
Cartesii sen-
tentia de cor-
pore & vacuo:*

I. **A**LIAM nunc attingamus quæ-
stionem, quæ est de corpore &
vacuo: & primum quemadmodum eam
persequatur Cartesius videamus. Ma-
teriæ, sive corporis universe spectati
naturam in eo vult esse positam, quod
sit extensum in longum, latum, & pro-

fundum; quippe id primum in corpore cognosci & esse; in nulla enim alia re ad corpus pertinente naturam ejus sitam dici posse; non in duritie, non in pondere, non in colore, calore, frigore, aliisque hujusmodi: nam quod spectat ad duritiem, cognosci illam ex manuum nostrarum tactione; quod si ergo, cum manus nostra movetur in aliquam partem, corpora omnia ex illa parte recedant, duritiem illorum perceptum non iri à manu nostra; nec idcirco tamen corpora hæc corpoream naturam amissura, etiamsi nullum nobis exhibeant duritiei sensum: item corpora quæ duritie pollent præ cæteris, licet comminuantur in pulverem, vel etiam liquefiant, haud minus tamen futura corpora: de pondere quoque idem esse judicandum; ignem enim, qui levis est, esse tamen corpus; uti & aërem, etiamsi colore careat; aquam, etiamsi calore; ignem, etiamsi frigore; solam esse extensionem, qua detracta, detrahatur corpus; qua addita, corpus augeatur; quantitatem seu extensionem, à corpore, sive re extensa intellectu solum, non re distingui &

differre : imo , si quis ea conetur mente disjungere , confusam tantum rei corporæ , tanquam corpore carentis , ideam hunc habiturum ; claram contra & distinctam extensionis , tanquam corporis ; quæ propterea perperam *accidens* appelletur : similiter spatium sive locum internum , qui repletur à corpore , corpus ipsum re ipsa esse , sed intellectu solum distingui ; extensionem enim illam in longum , latum & profundum , qua constat spatium , hanc ipsam esse qua constat corpus ; id solum interesse , quod in corpore spectetur extensio , ut singularis & individua ; in spatio , ut generalis , ita ut mutari possit extensio quæ spatium implet , corpus nempe ipsum ; nec mutetur tamen extensio illa in qua erat corpus : cum igitur genus & species re non differant ab individuo , sed tantum intellectu , extensionem spatii , non re , sed intellectu differre ab extensione corporis : quæ cum ita sint , clarissime apparere nihil esse posse in rerum natura omni corpore plane vacuum ; nam cum natura corporis in extensione posita sit , ubicunque inest extensio , necessario illic inesse

corpus; alioqui, si extensio illa non sit corpus, eam fore nihil, atque ita nihil fore extensum; id autem fieri non posse, cum nihili nulla sit extensio, nullæ qualitates, proprietates nullæ: unam hanc esse ex anteceptis à pueritia falsis opinionibus, quod nullam rem impedire credimus, quominus vas aliquod ita vacefieri saltem à Deo possit, ut nulum in eo corpus maneat; nam si vacefiat, latera vasis illico coitura; quippe sublato ex vase omni corpore, sublatum iri extensionem, futurumque nihil inter vasis latera; quæ si non coëant, possitque vas manere cavum, uti erat, cum necessaria sit inter ejus capacitatem, & extensionem illam generalem conjunctio, mansuram quoque extensionem; atque hac manente, mansurum quoque corpus; nihiloque magis percipi posse montem sine valle, quam capacitatem vasis, laterumque distantiam sine extensione, & extensionem hanc sine corpore; alioquin nihili fore extensionem, & distantiam illam futuram nihil, quæ secum manifesto pugnent; atque hunc errorem cum aliis temere nos à pueritia præsumsisse, id à

Deo fieri posse; quod longe secus est: hinc sequi porro, mundum nullos habere amplitudinis suæ fines; nam si qui essent, ultra eos futurum vacuum, quod esse omnino non potest; nec idcirco tamen causam se habere, cur mundum dicat esse infinitum, quod de solo Deo dicendum sit; sed tantum *indefinitum*; ad id enim satis esse, quod probari vel percipi non possit ullis eum limitibus contineri; neque se negare tamen habere eum posse limites aliquos, quos percipere nequeat; sequi etiam, alios mundos esse non posse præter hunc, qui jam extat; nec enim spatium ullum esse vacuum, in quo siti esse possint: item sequi, mundum hunc numquam esse desitutum, nisi eo desinente novum illico mundum condatur Deus, ne minima quidem interposita mora, ne vacuum oriatur; nec ullum futurum fuisse spatium, si nihil unquam Deus creasset: sequi denique, idem prorsus significari vocabulis, spatii, extensionis, distantiae, corporis, & materiae.

& refellitur.

II. Adversus ea multa fuisse, & non infeliciter disputata sunt à Philosophis. Horum præcipua sunt isthæc; falso cen-

fere Cartesium, id primum in corpore & cognosci & esse, quod sit extensum; prius enim esse, habere partes à partibus secretas & divisas, quam esse extensum: confundi præterea ab eo extensionem cum re extensa; quæ si distinguantur, uti par est, & uti factum nonnunquam ab eo est, inventum iri in re extensa, aliquid, in quo extensio recipiatur, eique suppositum sit: quinetiam cum corpus omne sit in aliquo loco seu spatio, si spatium omne corpus est, necesse esse corpus omne esse in corpore, quod absurdum est; nec infitiri posse Cartesium omne corpus necessario desiderare spatium sive locum in quo sit, eoque carere haudquaquam posse; quippe qui decreverit mundum alium, præter eum qui nunc extat, idcirco creari non posse, quod nullum supersit spatium, locus nullus, in quo locari possit: cum autem spatium sive locus, in quem diversa corpora possint ordine succedere, sit immobile, nec mutetur cum corporibus, spatium sive locum differre à corpore, sive re locata; vel si locus, in quo corpus est, dicatur mutari cum corpore, corpus non

mutare locum, cum movetur, hoc est, e loco in locum transfertur; quo quid ineptius fingi potest? Ad hæc, quod ait, corpus duritie, mollitudine, calore, frigore, levitate, pondere, aliisque hujusmodi carere posse, extensione carere non posse, idem valere hoc ac si dicas, ceram figura quadrata, globosa, tereri, levi, angulata carere posse; ut autem hac, illave figura carere potest cera, neque tamen omni figura carere potest, ita corpus hac, illave qualitate carere posse, nec tamen posse omni omnino qualitate carere; quemadmodum corpus carere potest hac illave extensione, pedali puta, vel dodranti, vel quadranti; omni omnino extensione carere non potest. Istis graviora sunt hæc, quod augustissimum Eucharistiæ Sacramentum doctrina ista funditus labefactat; nam si corpus non est, quod caret triplici extensione, illic corpus Christi non est, ubi extensionem illam non obtinet. Id tam apertum, tamque liquidum est, ut quidquid contra commenti sint Cartesiani, vel comminiscuntur posthac, nauci non esse æquorum æstimatorum judicio definitum sit.

Jam si nullus alius mundus præter hunc nostrum esse potest, valde utique imminuitur & attondetur potentia Dei, cui non solum mundi alterius, sed vel minimi corporis creandi facultas eripitur. Hoc si efficere non potest Deus, nec efficere potest, ut ullum corpus ab alio corpore penetraretur; quod & aperte negavit Cartesius. Id autem plerisque sacræ Fidei decretis repugnat. Imo, dicendum quoque Cartesio est, ne orbem quidem hunc ex nihilo Deum creasse; nec eum destruere, & in nihilum solvere posse; hoc enim si fuisset, foretve, spatium in quo est, vacuum fuisse ante, & post futurum: quod repugnare Cartesius autumat. Quæ si admittuntur, admittendum quoque est, materiam esse æqualem Deo, nec ab eo pendere: quam impietatem ab Anaxagora, Pythagoreis, Platonis, & Stoicis ortam hauserunt præci Hæretici, Marcionistæ, Valentiniani, & Manichæi. Et mirabile sane est, adeo in angustum cogi potentiam Dei ab eo, qui efficere hunc posse decrevit, ut bis bina non sint quatuor, & res eadem simul sit & non sit.

In maximos
errores Carte-
sium impegit
ignoratio du-
plicis exten-
sionis; qua-
rum alia, qua
corporum est,
positiva est;
alia, qua ni-
hili est, est
negativa.

III: Abnormia hæc vitia doctrinæ istius fere jam deprehensa sunt. Nunc id novi addam, tot monstra peperisse, non falsam modo & absurdam, sed plane puerilem Cartesii hallucinationem, quum colligit illic necessario inesse corpus, ubicunque est longitudo, latitudo, & altitudo, ex eo quod vacuum, sive nihilum, esse non possit longum, latum, & profundum, nec ulla esse possit, nihili extensio; manifestam enim repugnantiam hoc continere; quippe nihili nullas esse proprietates, nullas qualitates. En vero insuperabilis ille obex, cui Deum ipsum cedere necesse sit. Advertisset vero Cartesius duplicis esse generis qualitates, sive proprietates, *positivas* alias, alias *negativas*; nihili proprietates *positivas* nullas esse, *negativas* multas. Annon enim nobis dicere licet, nihilum immutabile esse, immobile esse, infectum, incorruptum, æternum esse? nihilum nihilo simile esse? nihilum differre à rebus creatis? nihilum esse contrarium enti? ex nihilo orbem à Deo esse creatum? cæteraque quæ elegantissimo Poëmatio tribuit Nihilo Passeratius, vir amœnissi-

mi ingenii? Atqui hæc immutabilitas, hæc immobilitas, cæteraque quæ nihilo per hujusmodi locutiones tribuuntur, meæ sunt negationes, nempe mutabilitatis, mobilitatis, generationis, corruptionis, finis, discrepantiæ à nihilo, similitudinis cum rebus creatis, convenientiæ cum *ente*, *existentia* rei ullius ante mundi creationem. Similiter cum fingimus in nihilum à Deo redigi vinum quod continetur vase aliquo, nullo alio admissio corpore in vini locum, dicendum est vacuum manere spatium, quod à vino occupabatur, ejusdemque id fore amplitudinis & extensionis, ac prius erat vinum, meritoque vacuo huic spatio extensionem tribuimus, at *negativam*; nam cum dicam spatium illud inane, quod intra vas est, esse pedis unius quadrati, perinde erit ut si dicerem in spatio illo pedali nullum esse corpus; & pedalis hæc extensio vacui, sive nihili, erit negatio corporis in spatio pedali. Huc non impegit Plato, Philosophus Cartesii valde dissimilis; non enim inane dixit esse, sed quasi esse. Videtis quam exigui pulveris jactu, maximi motus

animorum quiescant. Dignumne vero erat Philosopho, tantas res, quantas ex hoc capite fluere ostendimus, voculæ unius ambiguitate decidere?

Focularis error Cartesii de corporum duritie.

IV. Quam frivola est autem argumentatio illa Cartesii, qua probare conatus est naturam corporis non esse in duritie positam? Cum manus nostræ, inquit, moventur in aliquam partem, si ab ea parte corpora omnia eadem celeritate recederent, qua manus nostræ moventur, duritiem nullam sentiremus; nec idcirco tamen corpora ita recedentia corporum naturam amitterent. Quo argumento probare quoque possim, mala Tantalo impendentia, sua via non fuisse, quod cum recederent simul atque ea hic ore captaret, suavitatem eorum degustare non posset. Brevius dixisset, si manus in sinu contineamus, neutiquam sensuras duritiem corporum, ac propterea corporis naturam ex duritie non pendere. Bisariam spectatur durities, vel quatenus opponitur mollitudini, vel quatenus significatur ea, quæ à veteribus dicta est *ἀσπυρία*. Ea autem vis est à natura corporibus insita, qua nullum aliud corpus admit-

tunt intra se, suamque molem ac spatium tuentur; adeo ut ubi corpus est aliquod, illic aliud corpus esse naturaliter non possit. Id autem nihil aliud est, quam quod in scholis appellatur, *Impenetrabilitas*. Audiverat Cartesius priscos quosdam Philosophos naturam corporis posuisse in hac ἀπνυμία, quam sententiam obtritutum se confusus est egregio illo quod attulimus argumento; in quo primum id peccat, quod geminam hanc, quam dixi, duritiem non distinguit; deinde, quod ex manuum nostrarum contactu æstimandam eam censet. Ad utramlibet autem duritiem referatur contactus ille, falsissimum id esse liquet: nam tegmen ferreum equo & equiti fugienti impositum, durum esse non desinit, etiamsi cum cursu attingere, & manu contingere frustra contendam. At si in mundo sint hominum manus, si non sint, corpora omnia, etiamsi mollia, aqua, ær, ignis, suam duritiem siue ἀπνυμίαν semper retinent; & aurum, siue solidum, siue fusum, æque tamen impenetrabile est. Præclare itaque veteres illi, qui in ἀπνυμία constituebant naturam

Plutarch.
De Placit.
Philos. Libr.
1, c. 12.

corporis, corpus ita definiebant, ὅγως αὐτῆς οὐκ ἐστὶν ἐν αὐτῇ. *Moles renitens, quantum in se est.* Nempe duritiem, sive αὐτῆς internam ac naturaliter corporibus insitam, ex natura suapte, non ex aliarum rerum comparatione æstimari volebant. Quod nec diffitetur Cartesius, cum Henrico Moro corpus esse definienti rem sensilem, respondit hac finitione proprietatem aliquam corporis explicari; non naturam integram, quæ extare potest, etiamsi nulli sint homines, nec ab humanis sensibus pender.

Cartes. Epist.
Tom. 1. Epist.
67.

Parum candidè agit Cartesius, cum mundum esse ait indefinitum.

V. Mundum autem cum indefinitum esse dixit, latebram sibi paravit in dictionis hujus obscuritate, ad quam confugeret, cum urgeretur à Theologis, quos in se concitatum iri præsentiebat. Id vero esse vult indefinitum, quod finitum, necne sit, ignoratur; unde efficitur vocabulo hoc significasse Cartesium, cujusmodi res sit, si ad nostram notitiam referatur; non cujusmodi suapte natura sit. Quod si indefinitum illud est, quod ignoratur sitne finitum, an infinitum; ignoratur utique, an mundus finitus sit, an infinitus; ac propterea

pterea ignoratur quoque, pluribus mundis locus supersit, necne. Temere itaque affirmavit Cartesius, quod ignorabat, cum plures mundos esse non posse dixit. Porro nihil indefinitum est suapte natura: quidquid enim est, vel finitum est, vel infinitum: si finitum, corruere omnem suam doctrinam de corpore & vacuo, cæterisque rebus naturalibus fatetur Cartesius; si infinitum, frustra effugium quærit in indefinito, & convictus tenetur errorum omnium, quos ex perversis illis principiis oriri ostendimus. Quid quod & ex iis manifeste sequitur mundum esse infinitum? nam quid aliud est infinitum, quam quod fine caret, nec ullis clauditur limitibus? Optime & vere Thomas Aquinas, *In rebus materialibus aliquid dicitur infinitum, per privationem formalis terminationis*. At mundum nullos amplitudinis suæ fines habere palam asseverat Cartesius; & si negaret, secum ipse pugnaret; quippe si corporum & materiæ fines sint aliqui, ultra fines illos nulla materia est, nullum corpus; proptereaque spatium illic vacuum est & merum nihil, & plu-

Thom. Summ.
Part. 1. Quest.
86. art. 2. ad
1.

194 *Censura Philosophiæ*
res in eo mundi locari possunt; quæ
fieri non posse contendit.

C A P U T S E X T U M.

Expenditur Cartesii sententia de
ortu mundi hujus aspectabilis.

I. *Exponitur Cartesii sententia de ortu
trium elementorum, ex quibus mundum
hunc aspectabilem conflatum esse docuit:
II. & refellitur.*

*Exponitur
Cartesii sen-
tentia de ortu
trium elemen-
torum, ex qui-
bus mundum
hunc aspecta-
bilem consti-
tum esse do-
cuit:*

I. **P**Rostratis his commentis, reli-
quarum Physices Cartesianæ par-
tium, quæ his incumbunt, ruinam
sequi necesse est; ac egregium præser-
tim hoc inventum, quo mundi hujus
aspectabilis ortum descripsit, ex ma-
teria videlicet, ab initio partibus mi-
nutis & æqualibus conflata, quarum
unaquæque circa centrum suum sigil-
latim, plures vero conjunctim circa
communia quædam centra in morem
vorticum volverentur. Ex harum par-
ticularum ita commotarum conflictu &
attritu decisa fuisse vult ramenta quæ-

dam; atque has particulas castigatis
angulis omnibus, omnique extantia
decussa, tornata fuisse in globulos;
abrafæ vero præsegmina cum agitari-
entur celerrime, & ad explenda globu-
lorum intervalla assidue comminueren-
tur, summam adeptæ esse tenuitatem,
ac continuato subinde motu tenuiora
magis, magisque esse facta, neque ul-
lum esse molituræ hujus ac trituræ mo-
dum; nec globulos quidem ipsos in
perpetua hac agitatione adversus mu-
tuos incursus molem suam integrita-
temque tueri, sed comminui in dies;
cæterum cum non eadem esset rament-
orum omnium sive micarum (uti
atomi Epicuræ appellantur à Seneca)
ex globulis cadentium subtilitas, cras-
siora simul connexa & implicata varias
moles concinnasse; tribus porro his
elementis omnem aspectabilis hujus
mundi ortum contineri; ex decussis
enim particulis, quas materiam subti-
lem, sive primum elementum appellat,
Solem ac stellas extitisse; cælum ex
globulis, quos secundum vocat ele-
mentum; ex crassiorum primi elementi
partium complexione, quo tertium

constat elementum, terram, Planetas, & Cometas prodiisse. Hæc, inquam, miracula, non differentis Philosophi, sed somniantis; non docentis, sed optantis, unice incumbunt Cartesiano decreto de plenitudine rerum, quæ nullam admittat vacuitatem. Nam si spatium ullum posset esse vacuum, nihil attineret confingere immensam illam primi elementi tenuitatem ad explenda intervalla globulorum, perpetuamque illam trituram, nullis unquam, neque tenuitatis, neque temporis finibus terminandam. Atque hanc se habuisse causam istorum comminiscendi fatetur Cartesius, quod vacuum esse quidquam repugnet.

& refellitur.

II. Verum cum vanum esse demonstraverim argumentum, quo impulsus asseveravit Cartesius nihil esse posse vacuum, frivolam quoque esse consecutarium est, & absonam, quam inde commentus est, rerum progeneracionem. Sed & aliis insuper, ac gravissimis laborat incommodis imaginarius ille trium elementorum ortus. Taceo vulgatum illud, cui numquam satis solide occursum est à Cartesianis, quod

ex perpetua corpusculorum concursione, & ramentorum decussu, augeri in dies necesse sit primum elementum, minui vero tandemque deleti secundum. Quibus par quippiam in suprema rerum conflagratione eventurum docebant Stoici; futurum videlicet, ut Sol Lunam, cæteraque astra, sibi similia efficiat, in seque convertat. Nam quod respondet Cartesius, ex primo elemento gigni tertium, atque ita auctum primi elementi coërceri, minime id quidem secundi interitum sistit: nisi rursus ex primo & tertio renasci dicat secundum; quod nec dixisse tamen usquam Cartesium reperio; & si dicere audeat ullus Cartesianorum, risum tollent coronæ Philosophorum; perinde enim id erit, ut si ex scobe dicat scobinam fieri. Deinde cum negaverit Cartesius coagulationem ramentorum primi elementi, unde oritur tertium, vel ullum denique corpus, assequi posse soliditatem globulorum secundi elementi, manifestum est tertium elementum in secundi naturam non posse traduci. Quod longe minus dici potest de primo elemento: cum ex continua tritura tam

*Cartes. Princip. Part. 2.
§. 113. Part.
4. §. 8.*

subtile, tamque fluidum evaserit, & in dies evadere pergat, ut longe desciscat a soliditate secundi; etsi quid in eo firmum, solidamque sit, statim transeat in tertium. Taceo & mirificam illam subtilitatem primi elementi, quod ad singulos corporum motus friari necesse est in partes infinitas, ut ad omnes corporum anfractus, angustias, & flexus celeriter fragmenta sua accommodet: quod est hujusmodi ut à mente nostra percipi non posse fateatur Cartesius, sed pro certo tamen haberi jubeat, ut pote ex suis principiis aperte deductum: cum potius principia hæc retractare debuisset & revocare in dubium, ut pote ex quibus id sequeretur, quod animo comprehendere non posset: præsertim cum cavendum sæpe sanxisset, ne iis præberetur assensus, quorum clara & distincta non haberetur perceptio. Taceo hæc, inquam: in hoc conquiescam argumento, quod solerter excogitavit acutissimus Anglus, Henricus Morus, quem malleum Cartesianorum merito appelles: ad id enim, velut ad fatalem quemdam scopulum, allisa hæc trium elementorum compages, totius-

que aspectabilis orbis coagmentatio, disturbatur prorsus & concidit. Ponamus, inquit, particulas illas minutas & æquales, quibus primo constituisse universitatem rerum finxit Cartesius, fuisse quadrantalia sive cubos, qui & ad figuram globosam accedunt, & omnem vacuitatem possunt explere; si ex eorum agitatione, decisis undique extantibus angulis fiant globi, fragmentorum illorum omnium copia eam habebit ad globulos omnes rationem, quam decem ad undecim; cum cubus ad globum inscriptum eam habeat rationem quam unum & viginti ad undecim. Jam si temporis progressu & motus continuatione major segminum copia indies ex globulis deliberetur, brevi ita augebitur, ut jam omnem globulorum molem æquet. His positis, si media pars ramentorum sive materiæ subtilis explendis globulorum sive secundi elementi intervallis delegeretur, altera pars supererit, unde Solis globus confletur. Ergo cum globuli, sive secundum elementum, & ex iis decussa ramenta omnem vorticis hujus Solaris, in quo sumus, universitatem ex æquo explcant,

*Henr. Mor.
Enchir. Metaphys. c. 16.*

Sol vero dimidium habeat ramentorum illorum; quartam partem vorticis hujus obtinebit Sol, eamque ad illum habebit rationem, quam unum ad quatuor; ac propterea Solis diametros major erit reliqua parte diametri vorticis. Hoc si sit, Terra, cæterique adeo Planetæ, Solis globo erunt immerfi. Hæc tam firmis nituntur rationibus, ut omnem exceptionis ansam præcidant, & commentitiam hanc trium elementorum, ac universi orbis constructionem, quam non immerito *Fabulam mundi sui* appellat alicubi Cartesius, funditus pessumdent. Scio equidem excogitari posse corpora alterius figuræ, quæ propius accedat ad globosam quam quadrantalem, & omnem vacuitatem possit explere, puta Prisma sexangulum, cujus altitudo sit æqualis diagonali lineæ basis sexangulæ; ac minus propterea ex iis detritum iri ramentorum, ut in globos rotundentur. Vel ita tamen ea prodibit inde materiæ subtilis copia, ut Solem ex ea nasci necesse sit, cujus dimidia Diametros, sive radius superet Solis & Terræ distantiam.

*Cartes. Epist.
Tom. 2. Epist.
203.*

CAPUT SEPTIMUM.

Expenditur Cartesii sententia de
caussa gravitatis corporum
terrestrium.

I. *Exponitur Cartesii sententia de
caussa gravitatis corporum terrestrium &
II. & refellitur.*

I. **N**IHILO felicior fuit Cartesius in assignanda caussa gravitatis corporum terrestrium, quam confert in motum globulorum secundi elementi; qui cum à vortice in quo sunt circumgantur in orbem, motu hoc tendere illos necesse esse ait ad extimum vorticis ambitum secundum lineas rectas; atque idcirco si quæ terrestria corpora occurrant, cum tanta in iis non insit ad fugiendum centrum & extrema petenda propensio, de loco suo decedunt, urgentibus globulis, & ab his ad alta contendentibus retruduntur ad inferiora; atque eo magis, quo plus habent materiae terrestris, minusque co-

*Exponitur
Cartesii sen-
tentia de caus-
sa gravitatis
corporum ter-
restrium.*

lestis. Id ut commodius explicet, utitur exemplo ingentis alicujus vasis aqua pleni; quæ aqua si in orbem vertatur, & minutæ aliquæ injiciantur ligni particulæ, confluent illæ statim ad centrum, & suspensæ in medio aquæ vortice natabunt, uti medium vorticis sui innat terra.

refellitur.

II. Hæc quantumvis belle & ad speciem veritatis composita, fidem tamen non obtinebunt a cordatis Philosophis, si observaverint aquam hanc in vase circumactam, ferri circa axem motus hujus, & injectas in eam particulas ad axem illum tendere, & quidem unamquamque particulam ad id axis punctum, in quo secatur axis ab area plana vertiginis particulæ hujus: non vero tendere ad centrum vasis. Nam si aqua impleatur vas aliquod in cylindri formam excavatum, & aqua in orbem agatur, tum in eam injiciantur particulæ aliquæ lignæ & lapideæ; conspiciuntur illico particulæ lignæ ad supremam axis partem confluere, lapideæ ad infimam; neutræ vero ferri ad centrum cylindri. Nempe singulæ petent centrum areæ planæ in qua moventur; ac

proinde cum in suprema parte aquæ ligna, in inferiore lapides circumagantur, centra utriusque vertiginis in variis erunt axis partibus, in iis nempe punctis, in quibus arcæ vertiginis utriusque axem secabunt. Hinc sequitur, corpora terrestria à globulis materiæ cælestis depressum iri, non versus terræ centrum, sed versus centra vertiginum suarum; nempe unumquodque versus centrum vertiginis globulorum à quibus deprimitur; hoc est, versus punctum illud axis terræ in quo secatur axis ab arcæ vertiginis hujus: unde fiet, ut ea sola corpora terrestria quæ sunt sub Æquinoctiali, cadant in terram ad perpendicularum, sive ad rectos angulos; reliqua vero ferantur quidem ad perpendicularum versus axem terræ, at oblique versus terræ superficiem; & obliquius, quo obliquior erit illis sphaera; & sub Polis denique corpora in terram omnino non cadant. Quæ cum falsa esse experientia testis nos quibus Sphaera obliqua est doceat, & corpora omnia terrestria, in quacunque Sphaeræ positura sita sint, ferantur in terram ad perpendicularum, ac centrum

204 *Censura Philosophia*

propterea terræ manifesto petant, causam gravitatis terræ, quam attulit Cartesius, plane falsam esse dicendum est. Inde adeo Anaximander, & Leucippus Eleates, qui ex hujusmodi vertigine concretam esse terram crediderunt, non globosam illam, sed *κυλινδρικήν*, sive cylindraceam esse dixerunt: terramque ipsam veteres Cylindri figura adumbrarunt, ut à Porphyrio traditum extat. Plura persequeretur; sed facile intelligitur quam promptus ei in minutis & consuetariis fuerit lapsus, qui in præcipuis tam sæpe corrui.

*Porphyr. apud
Euseb. Præp.
libr. 2. c. 7.*



CAPUT OCTAVUM.

Expenditur generatim Cartesiana
Philosophia.

I. *Laus Cartesiana Philosophia.* II. *Cur tantum atque huic placuit.* III. *Notantur Cartesiana Philosophia labe.* 1. *Inconstans est.* 2. *Figmentis nititur.* 3. *Effectibus causas non necessarias, causis effectus non necessarios assignat.* 4. *Officit Fidei.* 5. *Vitiosa utitur ratione philosophandi.* IV. *Cartesii virtutes.* V. *Censorium iudicium de Cartesii scriptionibus.* VI. *Cartesii vitia.* VII. *Insigne hoc Cartesii vitium, quod novitatis nimium fuit studiosus; ac propterea simulate affectavit incertitiam, quam eius assidue vere retinuerunt: VIII. etsi nihil fere attulit novi.* IX. *Laus Aristotelis.* X. *Vulgares sunt Cartesiana Moralis regula. Epilogus.*

I. **N**U N C ergo novitiæ hujus Philosophiæ naturam circumspicimus atque indolem. Fronte quidem

Laus Cartesiana Philosophia.

ipsa eximiam de se spem facit: præclaros habet ad veritatem aditus; radices errorum, anteceptas videlicet opiniones evellit; & velut in purgato ad ædificandum solo, in confessis & omnium assensu comprobatis principiis fundamenta locat. Principia hæc pauca, clara, simplicia. Depromptus dehinc ex iis speciosus ille doctrinæ contextus. Pressa & compacta rerum inter se aptarum & cohærentium commissura. Ad naturæ leges, ad experientiæ magistræ testificationem, ad normam machinalis scientiæ, si factionis hujus patronis credimus, exacta accurate omnia. Magna ubique similitudo veri. Nihil intricatum, nihil obscurum, nihil superfluum. Dilucida passim, & plane philosopha brevitās.

*Cur tantum
ætatī hujus
placuit.*

I I. Quamobrem minime miror disciplinam hanc tantis plaufibus, tanta approbatione vulgo fuisse exceptam; ab iis præsertim, qui olim in Scholis, dum pueri essent, Peripateticis velitationibus utcunque exercitati, at reliquæ omnis priscæ Philosophiæ, veterumque sectarum plane inscii, delectati sunt hac novitate doctrinæ, non senti-

eosæ, non hispidæ, non perplexæ: & quam Aristotelica parum sibi perspecta probabiliorem & similiorem veri judicabant, cæteris quoque disciplinis, quas Aristotelica etiam putabant esse inferiores, anteponere non dubitarunt. Postquam enim Arabes, florentibus olim rebus suis, cum extincta per orbem prope jacerent bonarum literarum studia, aliquos Aristotelis codices nacti, in suam converterunt linguam, & ut omnis Philosophiæ ignari adhuc erant, traditam his libris doctrinam avidè arripuerunt, & per totum porro Occidentem disseminarunt; ita primum nostris hominibus placita est Peripatetica hæc doctrina, ut non alia deinceps imbui se passi sint ad hanc ætatem. Sed lapsu demum temporis, uti fit, sectæ hujus tricas pertæsi, ad eamque quasi nauseantes, quæ primæ in hoc fastidio objectæ sunt ipsis offæ Cartesii, tam jucunde ipsis sapere visæ sunt, ut iis sese ingurgitaverint largiter, omnemque aliam ingenii passionem respuerint. Hos alii, nihil nisi alienis oculis spectare soliti, pecudum ritu secuti sunt. Quidam acutiores, ac parum

candidi, partium studio ducti, Cartesianos se professi sunt; non quod doctrinam hanc probarent, sed quod eam probare videri, conducibile sibi putarent. At sagacioribus viris, & longo Philosophiæ usu subactis, & animum ab assensionum temeritate cohibentibus, non minores sectæ hujus quam cæterarum, ac fortasse majores etiam labes deprehensæ sunt, totaque vacillare ac infirmis niti radicibus visa est.

*Notantur Cartesianæ Philosophiæ abes.
n. Inconstans
et.*

III. 1. Agnovistis enim neutiquam obsecutum esse Cartesium positis à se philosophandi legibus, & à tradito in exorsu dubitandi præcepto statim discessisse, plurimaque admisisse, non dubitatione solum, sed repudiatione etiam digna. Quasi cunctatione hac præmuniret confidentiam suam; ac discipulos suos de cæterorum Philosophorum opinionibus dubitare, soli sibi sine dubitatione assentiri vellet. Ex hac porro principiorum inconstantia magnam doctrinæ totius mutabilitatem consequi necesse fuit. Quædam enim probabilia juxta positam ab eo dubitandi legem rejecta videas: quædam valde incerta, quasi pro imperio dictata

& sancita. Plurima hujusmodi audistis ex me, & jam ab aliis notata sunt. Atque hoc sane primum doctrinæ hujus vitium est.

2. Alterum hoc, quod ex male perspecta mentis humanæ natura, figmentis ejus solidi aliquid subesse censuit, iisque tanquam certissimo instrumento usus est ad solvendas difficillimas Philosophiæ quæstiones; ut si quis ex motu nubium cursus cœli astrorumque metari velit. Hinc factum ut aberraret, cum in multis aliis, tum maxime in inquisitione Criterii (qua norma qui caret, frustra is aspirat ad cognitionem veritatis) & in demonstranda *existentia* Dei, unde opinionibus suis plerisque fidem facere conatus est. Atque universam hanc Philosophiam labes hæc pervagatur; ut si fanaticam dicas, non valde alieno eam nomine signes.

3. Minime vero probare possum, quod causas naturales investigans, in iis acquiescit, unde res oriri potuisse fingit; cum has solum admittere debuerit, unde res necessario ortæ sunt. Nam si vel aliam causam habere potest hic effectus, vel alium effectum ha-

Figmentis utitur.

Effectibus causas non necessarias, causas effectus non necessarios assignas.

men esse satis probavimus, non inde^I sequeretur mundum ex his principiis natum esse. Imo vero, ex causis plane diversis nasci potuisse non diffitetur Cartesius: nam ex Chao ipso eundem rerum ordinem per leges naturæ deduci posse ait, atque eum qui nunc est; idque olim se suscepisse explicandum. Quam ineptus vero ille sit & ridiculus, qui sedens ad Lutetiæ portam, profiteatur se dicturum unde viatores omnes illuc adventantes sint profecti; & hunc Lugduno, illum Divione dicat esse profectum; quia hic Lugduno, ille Divione proficisci potuit? Ut autem ex aliis causis mundus hic noster nasci potuit, ita ex iisdem causis, quas finxit Cartesius, nasci potuit mundus alter ab hoc nostro plane diversus. Quid veri autem, quid commodi, percipi potest ex huiusmodi commento, in quo incertæ sunt causæ & incerti effectus? At, inquiunt, si minus id certum & utile, at laudabile profecto est, & ab Aristotele, & Epicuro, & aliis probatum & factitatum: præsertim si ad pauca principia & valde simplicia tanta effectuum varietas reducatur, quod a

Cartesio præstitum est. Magnum profecto id videtur, & vulgo placuisse minime miror: verum si attentius spectemus principia Cartesii, quam specie simplicia, tam multiplicia effectui comperiemus. Nam continua illa tritura partium, quæ quantumvis comminutæ magis magisque tenuari, ac propterea novas semper figuras induere possunt, ingens illa primi elementi subtilitas & mobilitas, variæ illæ tertii elementi coagmentationes & moles, tum & corpusculorum terrestrium varietas, feracissima seges est ad quidvis comminiscendum: ut Cartesio tam facile fuerit imaginarium quemcunque mundum inde procudere, quam huncce nostrum. Id autem Aristoteli aut Epicuro nequaquam possis objicere: nam cum hic certas figuras & immutabiles, certumque figurarum numerum individuis suis corpusculis adscripserit; ille vero ad certas formas & definitas retulerit rerum omnium ortum atque statum, certi inde effectus & definiti jure elici potuerunt. Quæsi veris à Cartesio, quæ factum sit, ut Saturni orbem Annulus ingens orbiculato circumjectu, nus-

quam cohærente, amplectatur, causas illico ex immenso suo causarum penu tam inusitati effectus depromet. At causæ illæ erunt hujusmodi, ut ex iis Annulos ita circa reliquos Planetas, ipsamque terram, pari modo, parique jure architectari possis. Scitum vero est Philosophorum, quæ nimia probant, nihil probare. Atqui si ea posuisset principia, ex quibus Saturnum Annulo circumdatum esse collegisset, antequam id pro singulari sua solertia deprehendisset Hugenius, ea demum magnam veri similitudinem præ se ferrent. Tantum autem abest, ut ex principiis suis hunc Annulum cognoverit, ut eum duos esse Planetas cum vulgo crediderit; causasque attulisse se verissimas arbitratus sit, cur imaginarii hi Planetæ circa Saturnum tardissime moverentur. O egregium Philosophum, qui ex iisdem principiis veri atque falsi causas depromit; qui ad omnia abutitur figmentorum suorum licentia, & infinita materiæ mutabilitate & concretionem, ex eaque efficit quodcunque in solum venit; nec tam in confingendis & contexendis rerum causis quid

verum, quam quid causæ suæ sit commodum spectat. Et quod miremur, postquam res Cartesio bellæ visæ sunt procedere, qui origines illas primo commentitias, sicuti erant, haberi iusserat, progressu rerum factus audacior, eas jam pro veris haberi, nec minus iis fidei quam Geometrarum Epicherematis tribui vult, & nullum alium earum explicandi modum posse reperiri.

Officium Fidei.

4. At capitale hoc est, quod à ple-
risque Christianæ Religionis decretis
aliena est hæc Philosophia, etsi ma-
gnum præ se fert studium pietatis. Pro-
positis enim a Deo ad credendum dog-
matis mentem, uti debuit, decrevit esse
submittendam. Verum vir ille mode-
stus atque pius sanctam hanc legem ne-
fariis adstrinxit conditionibus, & opi-
nionum suarum veritatem, cum veri-
tate dogmatum Fidei ausus est com-
ponere, & utraque asseveravit necessa-
rio inter se convenire, tamque certa
esse atque perspicua quæ in Philoso-
phia à se disputata sunt, ut Theologiæ
contraria esse non possint, nisi Theo-
logia rationis lumini repugnet; cum-

que veritas veritati non possit esse adversaria, impium fore quisquis vereatur ne Philosophiæ suæ dogmata a dogmatis Fidei dissentiant. Immanem scilicet impietatem, puram & sanctam Cartesii doctrinam vel levi suspitione violasse. Quasi par sit opinionum ipsius, & decretorum Fidei veritas; tamque hæc ad illa liceat exigere, quam illas ex his spectare: quasi & par sit pietas assentiri utrisque, par impietas dissentire. In quo tam perverse ratiocinatur, tam inepte se amat, tam arroganter de rationis suæ figmentis, tam demisse contra de Fidei decretis sentit, ut idcirco quod opiniones suas certas esse putet, inde sine dubio colligat Fidei non repugnare; cum contra idcirco quod Fidei repugnent, falsas esse colligere debuerit. Ergo cum pleraque rationi adversari docuisset, secumque pugnare, quæ tamen definiat Fides esse verissima; atque his commentis imminutam videret à se Dei potentiam, satis tamen divinæ majestatis integritati consuluisse se ratus est, si diceret Deum ea etiam facere posse, quæ fieri non posse, secumque ipsa pugnare ratio

judicasset; quippe non ex natura sua, sed ex Dei voluntate pugnare. Quanto satius fuisset dicere, cum Fides doceat mundum esse à Deo ex nihilo conditum, verum esse ex nihilo aliquid fieri posse, neque id secum pugnare? Ita rationem, uti decebat, exegisset ad regulam Fidei; non Fidem rationis suæ immoderatione laxisset: ita Dei potentiam, ad ea non pertinentem quæ natura sua pugnant, falsæ suæ rationi nimium obsecutus æquo strictius non accidisset & coarctasset; iis conclusis in numerum rerum natura sua repugnantium, quæ nullo modo repugnant: neque rursus, quasi rationis pravitatem alia pravitate emendaturus, eandem Dei potentiam, præter legitimæ rectæque rationis metas produxisset. Deum enim ea etiam putat posse efficere, quæ rationi adversantur: velut ut bis bina non sint quatuor, & ut tres anguli unius trianguli non sint æquales duobus rectis. Vere enim pieque dici potest mysteria Fidei superare captum humanæ mentis; non item, rationi repugnare. Etsi hoc ipsum dicere visi sunt Patres nonnulli, Ambrosius puta &

& Augustinus : qui si recte intelligantur , hoc tantum sensisse eos videas , Deum res aliquas facere posse præter ordinem vimque naturæ , quæ mens humana non capiat , & miretur. Quo sensu Scriptores sacri dixerunt, *Non* Luc. 1. 17. *esse impossibile apud Deum omne verbum* ; res nempe eas quæ natura non patitur , neque fert humana potentia , juxta istud : *Quæ impossibilia sunt apud* Luc. 12. 27. *homines , possibilia sunt apud Deum*. Minime autem pertinet potentia ista Dei ad eas res , quæ secum ipsæ & cum ratione pugnant. *Nihil unquam* , inquit Cartes. Medit. *Cartesius , à Deo fieri non posse judicavi* ,^{6.} *nisi propter hoc quod illud à me distincte percipi repugnabat*. En certam & inconcussam normam veritatis & Fidei , mentem Cartesii. Nec jam quæro quam belle ista consentiant cum ejusdem sententia de mutabilitate veritatis axiomatum & essentiarum , quam ex Dei arbitrio pendere vult. Nam si Deus efficere potest , ut totum non sit majus sua parte , vel ut bis bina non sint quatuor , hæc utique distincte percipit Cartesius ; vel si ista distincte non percipit , à Deo neutiquam fieri possunt. At longe

*Synod. Later.
sess. 8.*

aliter Lateranensis Synodus: *Cum verum vero minime contradicat, omnem assertionem veritati illuminata Fidei contrariam, omnino falsam definimus.* Ex hoc principio, Verum vero adversari non posse, merito colligit Synodus, falsum esse quidquid ratio Fidei contrarium proferat: contra vero Cartesius colligit ex eodem principio, Fidei contrarium esse non posse quod ratio sua probavit, ut pote quod verum sit. At res ipsa Cartesium coarguit: nam rationi suae morigeratus credidit tam verum esse ex nihilo nihil fieri posse, quam verum est totum esse majus sua parte: quod cum Fidei repugnet, falsum esse jure colligitur, juxta Synodi praescriptum: cum Cartesius contra, propterea quod verum id esse temere credidit, Fidei non repugnare falso quoque crediderit. Nec dictatore suo modestiores fuerunt Cartesiani; qui cum soli legitimum rationis usum ad veri perceptionem reperisse sibi visi sint, nihilo eam Fide inferiore posuerunt. Nam praeter Henricum Regium, quidam quorum libri versantur omnium manibus, eo processerunt audacia, ut

conceptis verbis pronuntiare non dubitaverint, animum *aque submittendum esse Fidei & evidentia*; tam validis argumentis oppugnari posse Fidei Christianæ decreta, & Trinitatis præcipue mysterium, ut salvaratione solvi non possint; Libros sacros, non hujus temporis Theologis, sed Judæis fuisse scriptos: quo quid impium magis dici potest? id enim si admittimus, exolevit omnis sanctorum Voluminum auctoritas, nec jam iis continetur doctrinæ & morum regula, nec ea *scripta sunt ad* 1. Cor. 10. 11. *correctionem nostram, in quos fines seculorum devenerunt*: Passim iidem res Fidei expendunt ad libram rationis, & in causas decretorum Dei inquirunt. Alii ex eodem grege asseverant, quidquid de inferorum suppliciis, ignibus, tenebris Christus ad plebem differuit, figuras fuisse sermonis, ad incutiendum horrorem compositas, & ex iis rebus petitas, quæ valde formidolosæ essent. Temerarios appellant, qui scire volunt, possitne Deus rem quampiam in nihilum redigere; simplices, qui ad Dei providentiam & gratiam res naturales referunt. Nonnulli etiam ex iisdem

congerronibus Cartesii, nihil usi circuitione, aperte dixerunt Fidei decreta, per aliam viam quam per verisimilitudinem ad nos non pervenire. Et fuit in his qui scriberet, ideam materiæ à creatione non pendere, & nihil creari posse. En quo ratio Fidei legibus soluta, suæque cæcitatibus immemor, infelices Philosophos perduxit; ac eos præcipue, qui confidenter & temere rebus assensum suum & asseverationem præstant: longe minus enim ab iis periculum est, qui assensiones prudenter cohiberi volunt. Manavit ex eodem temeritatis fonte, quod alicubi excidit Cartesio, lædi dignitatem Fidei, si confirmandis ejus decretis, quæ *argumentis naturalibus demonstrari* non possint, *probabilia* tantum & *humana* adhibeantur. In quo sibi palam blanditur hominum amator sui: nam quæ ab ipso allata sunt ad probandam *existentiam* Dei, & distinctionem corporis & animæ, pro *demonstrationibus naturalibus* haberi vult, cætera aspernatur. Quasi hæc ipsius argumenta, quæ *naturalia* appellat, certiora sint *probabilibus & humanis argumentis*: quasi valde ini-

certa non sint : quasi non sint manifesto falsa. Porro si *argumentis probabilibus & humanis* læditur Fides, noxia quoque ei est omnis fere rationis suffragatio. Noxiæ ergo sunt similitudines, noxiæ comparationes, noxiæ rationes ad removenda impedimenda Fidei usurpari solitæ, noxia *motiva credibilitatis*, quibus referti sunt Patrum libri, quibus circumsonant Theologorum Scholæ, & suggestâ concionatorum. At Fides, etsi cum iis orbata est, retinet naturam integritatemque suam, magno tamen caret decore & præsidio : ut si a Rege satellites comitatumque remove-
ris, non detraxeris regium jus atque nomen, magnum tamen regiæ majestatis ornamentum subsidiumque abstuleris. Nihilo magis ferri id potest quod dis-
seruit Cartesius super illo præcepto Christi, quo jubemur beneficia male-
factis rependere; causam nempe præ-
cepti illius hanc esse, ut natura homi-
num in vindictam prona, dum in con-
trariam trahitur partem, facilius ad
æquanimitatem, & bonitatem flecta-
tur; quemadmodum incurvum bacil-
lum si quis velit corrigere, in opposi-

Cartes. Epist.
Tom. 1. Epist.
105.

tam partem contorquet. Quasi bonitas illa & beneficentia in maleficos & inimicos, non per se & propter se expectenda sit, sed tantum ne in exigenda vindicta justitiæ modum transgrediamur: cum nobiliorem sanctioremque præcepti causam proposuerit Christus: *Ut sitis filii Patris vestri, qui in cælis est, qui Solem suum oriri facit super bonos & malos, & pluit super justos & injustos.*

Matth. 5. 45.

48.

Luc. 6. 35.

Præterea mentem sensim ad impietatem inclinat machinalis hæc Philosophia, quam propterea erudito opere acute nuper & subtiliter oppugnavit Parkerus. Quamvis enim utilis sit ad explicandas rerum corporearum causas, ac in multis quoque verisimilibus, certis tamen finibus coercenda est. Quod cum facere nesciverint Cartesii pedisequi, eo tandem progressi sunt, ut res etiam materiæ & corporis expertes, velut peccatum & gratiam Dei, ad machinales leges revocare audent: quæ manifesta est & exitialis sinceræ Religionis corruptela. Merito sane Porphyrium castigavit Jamblichus ille, quem Proclus divinum, ducemque

Jamblich.

De myst.

Ægypt. sect.

8. cap. 5.

suum appellat, quod omnia Ægyptiorum placita ad naturæ leges exigeret; cum sublimiores sint causæ, & plura principia rerum, quam naturalia. Nec id leve est, quod fines molitionis rerum Cartesius vetat inquiri: id enim nisi rite fiat, certis Philosophia niti non poterit vestigiis, nec tuta via ad veritatem grassari, sed incerta vagabitur. Ut enim si quis arborem humi afflictam videat, & ex materiario sciat cæsam fuisse ad construendam domum, certius conjiciet quas in partes deinceps secanda sit, quæ ipsi tribuenda figura, quæ politio, quibus instrumentis; quam si ignoret penitus, quo casu sit dejecta, & an lintri vel currui compingendo, an igni destinata sit: ita qui sciet, mundum à Deo ante annos aliquot, ad gloriam ipsius, ex nihilo esse conditum; universum ab eo, & singulas illius partes regi; desitutum aliquando; hominem in eo positum hac fine, ut Deum agnoscat, amet, & tam eximii operis admiratione excitatus, totum se ad ejus cultum convertat; tum sane longe certiora de mundi origine, fabrica, regimine, interitu cognos-

verit; quam si divinæ & humanæ conditionis nescius, nec aliis subsidiis quam ingenii sui tenuitate subnixus, tantarum, tamque abstrusarum rerum principia, usus, & diuturnitatem proprio matte confingat. Hic enim, *cum cognoverit Deum, non sicut Deum glorificat, aut gratias agit, sed evanescit in cogitationibus suis, & obscuratur insipiens cor ejus*; juxta denuntiationem Apostoli. Verissime quippe dictum est à Proclo, *Qui ignorat causam finalem, eum ignorare omnem causam*. Meritoque Anaxagoram reprehendit Plato, quod nimis addictus rimandis naturalibus causis, corporumque affectionibus consectandis, præstantissimas omnium causas, propter quid, & à quo, hoc est, ut Dialectici loquuntur, *finalem, & efficientem*, quæ potiora principia sunt, omiserit. Hæc Plutarchus, à quo præclare admodum atque vere notatum est, cum rerum omnium ortus duæ sint causæ, suprema videlicet, quæ Deus est; proxima, quæ natura; antiquos Theologiæ Græcicæ doctores & Poëtas primam, eamque nobilissimam, agnovisse & celebrasse; postre-

Act. 10. 31.

*Procl in Al-
sibiad 1.*

*Plutarch.
De oracul. de-
fect.*

nam ignorasse : Physicos contra, qui primi in eadem gente fuerunt repertores Philosophiæ, diverso a primis illis instituto in una natura hæsisse, & in corporum moribus, plagis, mutationibus, mixtionibus, & affectionibus, rerum omnium causam posuisse; atque ita imperfectam fuisse utrorumque rationem, cum Physici causam *efficientem* & *finalem* prætermiserint, Theologi *materialem* & *formalem*; unum hunc egregie esse philosophatum, qui & has & illas causas complexus sit. Ea nunc prætereo, quæ supra jam attigi, quod totam hominis naturam in eo posuerit Cartesius quod cogitat; quod per doctrinam ejus de corpore & vacuo violatur sacrosanctum Eucharistiæ Sacramentum; quod tam in arctum cogatur Dei potentia, ut nullum omnino corpus possit, vel creatum redigere in nihilum, vel ex nihilo creare; vel efficere ut corpus aliud ab alio penetretur, & quod materia denique æqualis Deo, sui que juris, ac mundus infinitus esse fingatur.

§. Ac tam absurdis commentis ut fidem quærant factionis hujus partici-

*Vitiosa nititur
ratione philo-
sophandi.*

pes, adversarias sibi sententias, *Præjudiciorum*, hoc est, anteceptorum temere ac sine ratione opinionum titulo infamare solent; tum præsertim cum rationibus carent ipsi & argumentis. *Præjudicium* est, inquit, credere in bestiis inesse facultatem cognoscendi, & aliud quidquam esse eas, quam automata. *Præjudicium* est ab infantia susceptum, credere vas a Deo vaces fieri posse, nullo alio corpore succedente. *Præjudicium* est, credere infantes matrum uteris inclusos nihil cogitare. Ita adversus *Præjudicia* pugnant Paradoxis; quibus non exquisitis rationibus, sed Pythagorico supercilio vim addunt, sæpe & adversarios contumeliis, convitiisque submovent, solos se sapere volunt, solos se mentem abducere a sensibus, & silentium imponere affectibus corporis, solos se attentos esse; qui sibi contradicant, animo esse omisso, vago, alienato; vel carni immer sos obbrutuisse. Quæ cum dixerunt, quasi egregie jam præmunita ad quidvis audendum via, grassantur deinde ad Philosophiam & Theologiam, intruduntque in eas visa sua & somnia.

Et nisi provida magistratuum diligentia tam effræni & projectæ licentiæ ivisset obviam, cœlum terræ miscuissent. Vitiosum & illud est, ac jam inde a præcis adolescentis Philosophiæ temporibus reprehensum, quod relictis scientiæ quam tradunt propriis principiis, aliena arcessunt, καὶ εἰς ἄλλο γένος μεταβαίνουσι. *In aliud genus transeunt.* Sin autem Parmenidi datum est vitio a Platone & Aristotele, quod Physicis tractationibus Metaphysicas adnecteret, & ex illis in has transiret, quanto æquius nuperos istos Sophistas culpabimus, qui Philosophicis quæstionibus solvendis adhibent decreta Theologiæ? qui cum rationis usus est, provocant ad Fidem? & non corporum solum proprietates & effectus repetunt ex rebus corpore carentibus; sed corporeas etiam rationes adiungunt rebus divinis, & ad animæ usque & spiritus divisionem invehunt?

I V. Ad Cartesium vero ipsum quod attinet, longe modestior fuit sequacibus suis, ab hisque vitiis haud paulo alienior; etsi non plane expers. Atque de eo quid sentiam si quis ex me qua-

Cartesii vites.

rat, iterum dicam, magnum fuisse & excellentem virum: quod qui negaverit, carebit is utique vel usu rerum, vel pudore. Fuit enim ad penetrandas res a natura reconditas ingenio acri & perarguto; adjuncta erat eximia vis, quæ nec obrueretur multitudine rerum, nec meditationis continuatione frangeretur; tum & ingens capacitas & amplitudo, quidquid libuisset facile complectens. Eximia ad hæc perspicuitas, cum percipiendis rebus, tum differendis. His instructum præsidii animus ad Mathematicas primum artes magna cum laude, & ad Philosophiæ deinde studia contulit; cujus animadversis vitiis, cum instaurandam suscepisset, repudiatis primum præjudicatis opinionibus, a paucissimis, & simplicissimis, & clarissimis principiis exorsus, universam naturam explicare instituit: quod fuit summo Philosopho dignum. Rationis ordinem tenet & connexionem rerum. In maxima copia brevis est; in summa brevitate & subtilitate dilucidus. Quibus postremis laudibus cum vel veterum, vel recentiorum Philosophorum æquiparat ne-

mo. Quædam ab eo scite & eleganter excogitata, & inventa præclare. Imprimis hoc commendatione dignum, quod a mentis humanæ & Dei cognitione auspicatus, cavit id ubique diligenter, ne Christianæ doctrinæ dignitatem imminuere videretur: quanquam hoc ab eo tamen imprudente & inscio, in multis factum est. Mathematica tractat felicius, in iisque plane regnat: verum illa cum adhiberet ad Philosophiam, uti Philosophiæ pars re ipsa sunt, non Philosophico, uti decuit, more explicavit; sed Philosophiam contra more Mathematico; omniaque propemodum revocavit ad Geometricas leges & Mechanicas.

V. Hinc scriptionum omnium quæ ab eo sunt profectæ, pluris illæ, me judice, faciendæ sunt, quæ propius pertinent ad has disciplinas. Ergo primas in his obtinet, quæ Geometria ab eo inscripta est, secundas Dioptrice. Proximam his ponimus dissertationem De affectionibus; quæ nihil aliud est, quam distincta & machinalis explicatio motuum interiorum corporis. Huic succedunt Principia Philoso-

Censurium judicium de Cartesii scriptionibus.

phiæ, quæ partim ex Mathematicis petita sunt, partim ex Physicis, partim ex Metaphysicis. In Meteorologicis et si plurimum inest salis atque acuminis, quoniam tamen non satis amplum collegerat Cartesius experimentorum instrumentum, peccat sæpenumero, multaque incaute & leviter profert. In dissertatione De methodo, nihil est quod quis valde contemnat; nihil, quod valde miretur. Obvia sunt omnia & petita de medio, si quædam seponas inventa feliciter, quæ Methodi hujus fructus fuisse ait. Meditationes, quæ meræ sunt commentationes Metaphysicæ, postremo loco sunt habendæ. Ex his licet existimare, eâ præcipue animi facultate valuisse Cartesium, qua rerum effinguntur imagines: ingenii, vastilicet & sublimis, at inamœni & austeri, secundas fuisse partes: postremas judicii, quo aliarum facultatum inventa circumspicere & probare, eorumque consequentias videre non potuit.

Cartesii vitia.

V I. Præcipue vero egregii viri conatus nimius sui amor, nimia fiducia frustrata est. Inde adeo opiniones suas

Geometricorum Epicherematum loco haberi vult; atque ita veras esse censer, ut dogmatis Theologicis repugnare non possint; nisi inquit, rationi repugnet ipsa Theologia; eaque sola, quam iniit, via ad mentis humanæ naturam cognoscendam, & demonstrandam Dei *existentiam* iri posse; si qui a se dissentiant, facere ex vecordia & imperitia. Ergo nonnunquam excandescit adversus contradicentes, etiam amicos, & convitiis maledictisque pugnat identidem. Audet is affirmare, sententiis suis receptis, omnes deinceps Theologiæ & Philosophiæ sopitum iri controversias. At proditum est à Cicerone, itidem existimasse veteres Philosophos suis ingeniis perfectam esse Philosophiam, atque idcirco stultitiæ, vel superbiæ accusatos esse ab Aristotele: qui, quod magna facta esset ad superiorum doctrinam accessio, sperabat ipse quoque, brevi absolutum iri Philosophiam; & quod culpaverat in aliis, id ipsum peccare se non sentiebat. Mutato nomine narrari fabulam dicas de Cartesio. Majorem præterea desiderasses in eo Dialectices peritiam; qua levissime imbu-

Cicer. 3 Tusc.
cul.

tum eum, ex modo ratiocinandi quem passim tenet, statim intelligas. Et id in eo vitium ab aliis jam adnotandum est. Desiderasses & candorem in multis. Ita enim est: si opinionum ejus circumspiciamus causas, argumenta, & consequentias, sæpissime eum vel receptis Christianæ Fidei dogmatis, vel temporibus, locis, aut personis, vel propositis jam à se principiis serviisse; nec quid verissimum, sed quid sibi tutum, aut doctrinæ suæ aptum, consentaneumque esset, fuisse secutum apparebit. Exempla de multis pauca seligam: illud imprimis quod proxime attigi. Cum corporis naturam posuisset in extensione atque id officere sensisset Ecclesiæ decreto de sacrosancta Eucharistia; cumque multa præterea jam à me explicata nullo modo fieri posse, secumque pugnare asseverasset, Ex nihilo fieri aliquid, In nihilum aliquid redigi, Novum mundum creari, Vas vace fieri nullo corpore succedente, nec lateribus coëuntibus, Corpus ab alio corpore penetrari; cumque probè intelligeret, ita vulgo de iis quæ secum ex natura sua pugnant existimari, à Deo fieri ea non posse; ut læsæ ma-

jestatis & accisę potentię Dei crimen effugeret, hujusmodi opinionum temeritati alterius hujus effari novitatem prætexuit, Deum mutare naturas rerum & ea etiam facere posse, quę natura sua fieri non possint, secumque pugnent. Cum ex infinitate & innumerabilitate mundorum multa sequi videret Christianę pietati adversaria, egregio hoc commento nos ludificatum iri credidit, si mundum diceret non esse infinitum, sed indefinitum. Cum accepisset Galilęi sententiam de motu terrę Romę fuisse damnatam; & Galilęo tamen ac Copernico prorsus in eo assentiretur, totamque Physicam suam ad id accommodasset, veritus ne sibi parem procellam conscisceret, scriptionem suam de mundo jam affectam & prælo paratam primo premere decrevit, deinde dolo agere cępit, & terrę motum annum, diurnumque retinens, nec quicquam delibans de natura motus, definitionem ipsam mutare, & meditatıs ac simulatis verbis Philosophos universos circumvenire aggressus est. Ergo motum dixit, non esse id quod vulgo creditur, nempe *Actionem quę corpus ali-*

Cartes Prin-
cip. Part 2.
§. 24, 25, 29.

quod ex uno loco in alium migrat ; sed Translationem corporis ex vicinia eorum corporum quæ illud immediate contingunt, & tanquam quiescentia spectantur, in viciniam aliorum. Quæ etsi infinitis laborare vitiis pro sua sagacitate intelligebat, maluit tamen Philosophorum, quam S. R. E. Cardinalium censuram & animadversionem experiri. Quorsum enim spectari vult motum, non ex mutatione veri & interni loci, uti postulat æqua ratio, sed ex mutatione circumjacentium corporum ; nempe ut si crimini sibi datum foret aliquando, quod motum tribuerit terræ, cum eam circa Solem volvi docuit, negare id liquido posset, cum à Solari hoc vortice rapta, viciniam non mutet circumjacentis materiæ vorticis illius, nec ab ea recedat. Quasi vero si aqua in vorticem circumacta in vase secum rapiat innatans ligni frustum, etiamsi id volvatur celerrime, immotum tamen dici possit, quod simul volvatur circumjecta aqua. Imo, etiamsi terra motu diurno circa centrum suum rotetur, ne sic quidem moveri Cartesius fatebitur. Nec ista pu-

retis dubitanter ab eo & modeste esse
proposita; verum sine hæsitazione pro-
nuntiat motum à Tychone terræ vēius
tribui, etiamsi immobilem eam esse de-
cernat; quam à se, etiamsi utrumque
ei motum, & diurnum, & annum
concedat: & quamvis terra, itidem
ut reliqui Planetæ, motus suos habeat,
tamen etiam juxta vulgarem motus de-
finitionem, nullum terræ motum esse,
etiamsi reliqui Planetæ vere moveri di-
cantur. Quid est vero Lectoribus fu-
cum facere, si hoc non est? Quanto
æquius erat, & convenientius Philoso-
pho, candide agere, & motum motum,
quietem quietem appellare, quam po-
sitos à patribus terminos movere, om-
niaque dolo malo pervertere? Porro
quam dissimulandi artem rebus suis ad-
hibuit Cartesius, ejusdem adhibendæ
aliis auctor fuit: velut Henrico Regio,
quem monet per epistolam, ne opinio-
nes suas prodatur in apertum, sed confi-
ctis verbis obtegat. Cum autem rescri-
psisset ad eum Regius, suspicari non-
nullos, non satis simpliciter eum & can-
dide animi sui sensa protulisse, stoma-
chatur quidem, sed de eo parum se

*Cartes. Epist.
Tom. I. Epist.
89, & 98.*

purgat. At sæpius dissimulantiam hanc compositam videas ad ostentationem : ut cum literas suas ex tempore scribere se fingit passim, non meditatæ & per otium compositas describere : cum tamen Clerfelerius, nobis dum viveret quam alienus Philosophicis opinionibus, tam conjunctus voluntate, à quo editæ sunt istæ literæ, palam testificetur in præfatione Tomi primi & tertii, se eas ex codice manu Cartesii ipsius descripto excepisse. Quem codicem ex epistolis jam compositis descriptum ab eo cum fingunt ejus asscclæ, doctoris sui imitantur dolos, nobisque os sublinere conantur; cum frequentes in hoc codice appareant lituræ; cujusmodi ferre sunt eorum, quæ meditando elucubramus, non quæ ex elucubratis describimus. Quid quod & Græcæ licet imperitus esset linguæ, gloriolam tamen peritiæ hujus pueriliter & inconsiderate sibi arrogavit. Nam cum Geometriam suam Gallice scriptam ederet Lugduni Batavorum, & locum quemdam afferret ex Pappo, qui Latine tantum editus extat, *Interpretationem*, inquit, *Latinam proferre satius duxi*,

quam verba ipsa Græca, ne captum ullius fugiant. Cujus flagitii sectatores ejus demum cum puduisset, hæc ab iis in sequentibus editionibus erasa sunt. Adeo nihil aspernabatur, quod ad estimationem suam pertineret. Ut autem alienam laudem captabat studiose, ita plurimi se ipse faciebat, minimeque erat contemtor sui, etsi magnam præ se ferebant modestiæ speciem. Ac tum præcipue erumpebat innatæ superbiæ igniculi, si quando nobiles aliquos nactus erat adversarios; magnos enim tunc sumebat spiritus, eosque præ se valde despiciebat. Velut in iis contentionibus, quas cum excellentibus viris, Fermatio, Robervallio, Gassendo & Regio exercuit. Velut cum de Galilæi doctrina tulit judicium. Velut cum ad magistratus Ultrajectinos scribere non erubuit, meliorem esse se Philosophicarum rerum æstimatorem & judicem, quam totam Ultrajectinam Academiam; quod etiamsi verum fuisset, ita tamen jactare se, hominis fuit intemperanter ostentatoris & gloriosi.

VII. Laudem vero caprat præcipue ex doctrinæ suæ novitate, quidquid ob-

*Insigne hoc
Cartesii vi-
tium, quod*

novitatis ni-
mum fuit stu-
diosus; ac pro-
pterea simula-
te affectavit
inscitiam,
quam ejus as-
sectæ vere re-
tinuerunt:

ganniat, et si nihil fere attulit novi. Hinc Philosophorum aliorum scriptio-
nes parum sibi versatas esse simulat:
quamvis in dissertatione De methodo,
oblitus sui fateatur diligenter tritum
fuisse se ab adolescentia & versatum in
libris veterum, aliisque in quibus re-
conditum inesset aliquid, & à vulgi no-
titia semotum. Atque hoc, etiam ipso
dissimulante, facile perspiciet, quisquis
usum aliquem habuerit veteris Philo-
sophiæ. Futurum autem id cum præsen-
sisset, excusatione usus est in speciem
modesta, revera jactantiæ & dissimula-
tionis plenissima; nullarum sententia-
rum haberi se velle inventorem, id tan-
tum præ se ferre, nullam se idcirco ado-
passe, quod vel ab aliis jam ante pro-
bata fuisset, vel rejecta, sed quod ad-
mittendam esse ratio sibi persuasisset.
Hanc porro inscitiam, non simulate, ut
ipse, sed vere affectatores ejus plerique
retinuerunt. Mirari profecto subit,
exortos esse nuper ex hac factione ali-
quos, qui perversum illiteratorum Epi-
cureorum exemplum secuti, non ele-
gantioribus solum, sed reconditioribus
quoque literis, præterquam si quas cal-

lere sibi visi sunt, bellum palam audent indicere, nosque in agrestem illam & feram barbariem, quæ vix tot seculorum laboribus & studiis expugnata est, vellent retrudere. Nam quæ vox edi potest magis barbara & immanis, quam quæ in eorum libris expressa extat ad æternam ignominiam, exiguum fore damnum, si igni absumatur quidquid uspiam Poëtarum & Philosophorum Ethnicorum est? Inanis ergo est tot ætatum, tot gentium, tot excellentium hominum consensus, apud quos summa Homeri & Virgilii admiratio fuit. Qui tametsi vitiis non caruerunt suis, ut imperfecta sunt humana omnia, multo majoribus tamen ea virtutibus compensant. Pro nihilo ergo jam inde putandum est in fingendo & in excogitando acumen, in narrando elegantia & subtilitas, amœnitas in exornando. Facessant ergo artes omnes quæ pertinent ad humanitatem, ac humanitas quoque ipsa; & quia ad delicias animi & ad lepores bardis isti sunt & stupidi, nos iis carebimus. Delirabant vero tot præstantes ingenio & doctrina viri, ac ipsi quoque Ecclesiæ Patres, à quibus tan-

tus habebatur Platoni honos: desipiebant tot Scholæ, Scholarumque magistri, qui & Aristotelis tenuerunt sententias, & aliis tenendas tradiderunt. Quoad è tenebris prodierunt homines novi, qui emendarent vitam, eriperent errores, & animis hominum lucem inferrent; qui nobilissimos auctores nunquam sibi lectos nobis excuterent de manibus, & ne à limine quidem sibi salutatas disciplinas pessumdarent, ut uni posthac essent magistri recte sentiendi & vivendi; ut quæ somniarunt per otium, silentibus (sic enim passim loqui amant) sensibus, & animi affectionibus, ea pro certa veri norma haberemus; & unica deinceps vigeret Cartesii Philosophia. Linguas Orientis condisci vetant, & Rabbinos lectitari, quæ ad sacrorum Codicum intelligentiam magno esse nesciunt adjumento. Otiosi hominis esse volunt, scrutari naturas animalium; vani etiam ac stolidè arrogantis, de iis disputare animalibus quorum mentio habetur in Libris sacris; quasi partis illius oraculorum Dei supervacanea notitia sit; quasi hominum sit, non jam dico ineruditorum

rum aut semidoctorum, sed non omni doctrinæ genere excultorum, de Bocharti, quem non obscure suggillant, scriptiõibus judicium ferre, viri magni & de re literaria præclare meriti; cujus consuetudine ita me olim cupide frui memini, quasi id tum prospicerem quod re expertus sum, eo amisso parem habiturum me unde discerem neminem. Cognitionem contemnunt Astronomiæ, sine qua neque notitia constare potest temporum, neque navigandi ars, neque agricultura. Inventionem aspernantur & usum specularium vitreorum, quæ res vel propter longinquitatem vel propter exiguitatem obturum nostrum fugientes retrahunt, & oculis subjiciunt: cum Dioptricen tamen diligenter excoluerit dictator illorum Cartesius; cumque per eam & maximæ hominibus partæ sint commoditates, & Physicæ fines, ut ita dicam, amplificati. Culpant Critices studium, quæ nobilissima Grammaticæ pars est, & reliquarum disciplinarum, quæ literarum monumentis consignatæ sunt à Veteribus, velut sepes & munimentum. Grammaticam ipsam respuunt, qua itur ad dis-

ciplinas. Interdici jubent antiquæ & externæ Historiæ notitia, unde opportuna petuntur ad vitam regendam, & administrandam Rempublicam præcepta; ac priscae etiam Geographiæ, sine qua Historiæ cognitio nulla est. Nihil configo, nihil addo de meo. Libri sunt in vulgi manibus, quibus præclara hæc sinceræ doctrinæ capessendæ præcepta & effata continentur. Atque ea egregio hoc firmant argumento, frustra in externis & antiquis cognoscendis eum abuti operam, qui recentia ac domestica penitus perspecta non habeat. Igitur lapides omnes domus suæ ante numerare debuerat Villalpandus, quam de Salomonici Templi forma describenda cogitaret. Universa ergo terra percurrenda prius & dimetienda mihi est, quam ad videndum Solem oculos mentemque convertam. Ad terram vero ipsam obeundam, vel studio peragrandam priusquam me accingam, Lutetiæ fora omnia, angiportus, viæ, & insulæ mihi erunt perlustrandæ. Rursum ineptus ero, si Lutetiam cognoscere velim, me ipsum non noverim. Itaque à me auspi-

canda mihi erit rei cuiusvis cognitio. Quæquam absurda sint, æquorum hominum arbitrium esto. Quinetiam adeo inconsiderate imperitos se & rudes produnt, ut vix alterius quam vulgaris linguæ usum concedant in scribendo; nec aliam probent Latinitatem, quam simplicem, incomptam, & facilem; ne sibi scilicet, cum legent, sæpius recurrendum sit ad interpretem. Jam ergo ludibrium debemus Cartesianis, quod eruditi sumus. Ita conversæ sunt rerum vices, postquam exorta est fax illa vitæ & veri; nunc laudi imperitia est, dedecori eruditio: nunc non scientia inflat, quod dictum est Apostoli, sed inscitia. At Geometriam commendant, at probant Analyticen, at Anatomicen laudant, quippe quarum notitia aliqua tincti sunt. Ita aliena bona despiciunt; dum prædicant & ostentant sua. Ita quod nesciunt, damnare malunt, quam discere. Ita apposite in eos convenit istud sancti Judæ: *Quacunque ignorant, Jud. 10. blasphemant; quacunque autem norunt, in his corrumpuntur.* At quanto æquius erat, rectores illos mentis, emendatores rationis, disciplinam quamque pro

merito æstimare, cum & Geometria, & Analytice vitiis suis laborent, earumque multo maxima pars usum habeat nullum, sed inanem tantum otiosi animi oblectationem; cæterarum vero disciplinarum nulla sit, in qua non & dignitas sua insit & utilitas. Porro ne frustra jactatum à me caussetur quispiam, nihil Cartesium fere attulisse novi, dignum hic intendam ad fontes, unde latifundia sua irrigavit.

*et si nihil fere
attulit novi.*

VIII. Hoc primum à dubitatione sumtrum philosophandi initium, causasque dubitandi, ab Academicis & Scepticis jam antè excogitata esse per-
vulgatum est. Aristoteles ipse vult veritatis investigationem à dubitationibus proficisci. Dubitationem hanc, an simus, proponit & solvit Augustinus. Arcessitum & ab utrisque, Academicis & Scepticis, alterum illud, quod à communi usu vitæ removenda est ista ratio dubitandi, & receptis consuetudinibus est obsequendum. Fundamentum istud doctrinæ suæ, Ego cogito, ergo sum, admonitus à Merfennio Cartesius agnovit esse Augustini, cujus hæc verba sunt :
Mihi, esse me, idque nosse & amare,

*Aristot. Metaph. lib. 1.
6. 1.*

August. De lib. arbitr. lib. 1. c. 3.

August. de

*certissimum est. Nulla in his veris Academicorum argumenta formido, dicentium, Quid si falleris? Si enim fallor, sum: nam qui non est, utique nec falli potest; ac per hoc sum, si fallor. Quo argumento usus quoque est aliis locis. Jam quod in clara & distincta rerum perceptione certam ponit normam veritatis, facit Platonici auctoribus, & Cyrenaicis, & Epicureis, ceterisque Dogmaticis. Ex me jam supra audistis præcepta veri cognoscendi proposita ab eo in dissertatione De methodo, communia esse disciplinarum omnium; Arithmeticae vero præcipue & Geometriae; & certe nova non esse ne ipse quidem inficiatur Cartesius. Primum quidem illorum manifesto petatum est ex Augustini libris contra Academicos. Ex Ethicis Charro-
 nii habuit plurima. Habuit à Francisco Verulamio, quod à Physicis disquisitionibus omnem causarum, quas finales vocant, investigationem decrevit esse sejungendam. Habuit à priscis Academicis & Epicuro, quod diligenter inquiri & exprimi jussit, quæ vocibus significatio & vis subjecta sit. Quæ ad demonstrandam naturam humanæ mentis,*

civit. Dei, lib. 11. c. 26.

F. Bac. Verul. de augment. scient. lib. 3. c. 4.

& *existentiam* Dei attulit, in aliis fundis nata reperimus, & vix quicquam super his novi proferri posse palam ipse declarat: ac merito sane; extant siquidem in libro Augustini de Trinitate probationes illæ: quibus animum à corpore distinctum esse demonstravit: & Cartesio quoque in hac disquisitione præluisse Proclum Diadochum, jure suspicabitur, quisquis Elementa ejus Theologica diligenter evolverit. Nec pauca transtulit ex Claudii Mamerti libro De anima. Celebris vero illa argumentatio, & à Cartesii suffragatoribus tam impense laudata, qua adstruxit *existentiam* Dei, tota est Anselmi, & in Proslogio, & in Apologetico contra Gaunilonem; eandemque & exposuit Thomas Aquinas, & refellit; cujus opera studiose ab eo lectitata fuisse constat. Ut taceam probationem à Platoniceis, Epicureis, & Stoicis ductam ex impressa hominum omnium animis Dei notione. Jam quod addit notionem Dei, quæ nobis insita est, alterius esse generis ac cæterarum rerum notiones, quas animo insertas habemus, idem ab Iamblichio traditum est. In aliis etiam plerisque quæ perti-

*August. de
Trin. lib. 10.
cap. 10.*

*Proclus E-
lem. Theolog.
Prop. 186.*

*Thom. Summ.
Part. 1. Quæst.
2. art. 1. ad. 2.*

*Iamblich. De
myst. Egypt.
sect. 1. c. 3.*

nent ad animum, habuit quos sectarentur: puta Protagoram, & Cyrenaicos, cum dixit nihil certi nos habere de rebus extra nos positis, sed tantum de intimis earum perceptionibus quæ in nobis sunt; quam sententiam secutus Arnobius his exposuit verbis: *Ut quisque est factus ad extrinsecus rei venientis attactum, ita afficitur; qualitatem non accipit ex rerum impulsionibus natam, sed ex sui sensus contagiique natura.* Sectabatur & Platonem, cum dixit mentem nostram res corporis & materiæ expertes primas omnium percipere; item esse in intellectu aliquid quod non fuerit in sensu, innatas videlicet ideas: Socratem, atque Augustinum, cum dixit mentem eandem nostram per se ipsam res illas corpore carentes, seque adeo cognoscere: Stoicos, cum dixit solas nostras cogitationes esse in nostra potestate: Socratem etiam, cum dixit scire neminem, idemne quod sensu percipit, alii quoque percipiant: Platonem item, cum dixit se cum Geometricorum principiorum ac Theorematum veritatem cognoscit, non tam sibi videri ea primum discere, quam jam pridem cognitorum

Arnob. lib. 7.

recordari : Augustinum ac Thomam , cum præter eam memoriam , quæ per instrumenta corporis exercetur , aliam in nobis ponit , quæ tota ad animum pertineat : item Augustinum , sed male ut videtur intellectum , cum dixit animum sentire , non corpus. Quod spirituum animalium velut primum condum esse dixit Conarium , id totum transtulit ex Galeno , à quo & accurate confutatum est. Sed & proposita ab eo commenti hujus ratio , quod nempe necesse sit , ut quæ per varios sensus undique appellant ad animum , in unum aliquid confluant & cogantur , eadem usurpata est à Platonis & Stoicis. Cum auctorem se fert axiomatis hujus , Quidquid potest cogitari , potest esse , facit arroganter & imperite ; fuit enim id unum ex dogmatis Philosophorum illorum Arabum , qui Medabberim , id est Loquentes , vel potius Dialectici , vocabantur , & quorum doctrinam fuse exposuit Maimonides in More nevochim. Atque hoc ipsum effatum eruditissimus ille Magister suffragio suo comprobavit. Jam notiones rerum externarum , quas nuntio sensuum suscipimus ,

*August. de
Gen. ad li-
ter. lib. 12.
cap. 24.*

*Galen. De usu
part. libr. 8
c. 14.*

*More nevoch.
Part. 1. cap.
15 & 72.*

cum modificationes animi esse dicunt Cartesii gregales, eo vocabulo id repræsentant, quod *ἐννοιώσεις* Veteres appellabant. Eosdem secutus est Cartesius, cum voluntates, sive actus voluntatis retulit in censum cogitationum; omnem enim animi sensum nomine voluntatis afficiebant, ut ex Quintiliano cognoscimus: & cum hominem à bestiis sermone præcipue discerni docuit; jam ante enim id docuerant Pythagoras, Plato, Cicero, Quintilianus, Galenus, & alii. Perturbationum causas & effectiones cum motibus membrorum, humorum & spirituum corporis adscripsit, quibus tanquam verticillis & nervis sigillaria quædam & machinæ agitentur, fecit auctore Platone, qui perturbationibus illis, tanquam fanibus & nervis trahi nos & cieri tradidit. Quam Platonis comparisonem usurparunt deinde Horatius & Persius, imprimis vero & crebro Marcus Aurelius. Quid hoc est vero, quod apud Ciceronem legimus, bestias simile quiddam facere perturbationum animi, in perturbationes non incidere, quod hæ eveniant solum ex aspernatione rationis, qua ca-

Plat. lib. 1.
Leg.

Horat. Serms.
lib. 2. Sat. 7.
Persius Sat 5.
M. Aur. lib.
2. §. 2. &
lib. 3. § 16.
& lib. 12. §.
19.
Ciceron. Tus-
cul. lib. 4.

rent bestię ? quid aliud , inquam , suadet hoc nobis , quam bestias mera esse automata ? nam si perturbationibus carent , neque herum diligit canis , neque lupum ovis reformidat : imo , nec cibum appetunt , nec dolorem fugiunt , nec mortem timent ; sed ex coacto cæcæ materiæ motu id facere videntur quod non faciunt. Scribit conceptis verbis Plutarchus credidisse Diogenem brutas animantes , neque intelligere , neque sentire , quod & confutavit Porphyrius. Sciscit Proclus animalia tantum rationalia anima esse prædita ; additque decretum esse à Platone , animam vere esse eam quæ ratione polleat , cæteras simulacra animarum. At nemo doctrinam hanc vel tradidit apertius , vel fusius propugnauit , quam Gometius Pereira , qui in Antoniana sua Margarita , perfractis Lycei , in quo eductus fuerat , repagulis , & ingenii sui libertati obsecutus , novum hoc Hispaniæ paradoxum , aliaque multa proposuit. Venit ex Lyceo pervulgata hæc argumentatio ; quam in Meditationibus suis usurpavit Cartesius , esse se dicens , vel à se , vel ab alio ; non à se , quippe fore se

Plutarch. De Placit. Philosoph. lib. 5. c. 20.

Porphyr. De abst. ab anim. lib. 3.

Procl. in Platon. Philosoph. lib. 2. c. 1.

Deum; ergo ab alio: rursus alium hunc, vel esse à se, vel ab alio; si à se, esse Deum; si ab alio, iterum idem quæri de alio isto, donec ad primum sui auctorem pervenerit, atque hunc esse Deum. In explicanda corporis natura, fraudi ipsi fuit trita Geometrarum definitio. Paradoxum illud, quo doctrinam suam de corporis natura, recepto inter Catholicos dogmati de sancto Eucharistiæ Sacramento adversariam defendere tentavit; Efficere nempe Deum posse, ut res sine natura sua constent, ut sint simul & non sint, ut fiant quamvis fieri non possint; hoc, inquam, Paradoxum sumsit ex quibusdam Augustini, & fortasse etiam Ambrosii, locis male lectis & intellectis; quibus traditur Deum mutare posse naturas rerum, & ea etiam facere, quæ fieri non possunt, & rei cuiusque naturam esse voluntatem Dei. Nec enim illic, cum de naturis rerum ageret Augustinus, significavit rerum *essentias*, quæ immutabiles sunt; nec ea simul esse posse docuit, quæ pugnant inter se, &, ut vulgo loquuntur, *imPLICANT CONTRADICTIONEM*: sed ad naturæ tantum vires attendit, quas voluntati

August. Serm.
147. de temp.
De civit Dei,
lib. 21, c. 8.

252 *Censura Philosophiæ*

*August. De
Symo. Fid. ad
Catechi. men.
Co. l. 29. contr.
Faust. c. 5.*

Dei subiectas esse merito censuit: cum cæteroquin diserte pronuntiet, multa non posse Deum; etsi omnipotens est; & ideo omnipotentem esse, quia ista non potest. In vacuo à rerum natura excludendo, Ionicæ scholæ adhæsit, quæ à Thalete ad Platonem usque in ea fuit hæresi. Aristoteles quoque & Stoici è mundi finibus exterminaverunt vacuum, at extra mundum esse passi sunt. Sed & ex Italica secta extiterunt, qui impugnarent vacuum, Empedocles, Melissus, & Zeno Eleates. Quo argumento usus est Cartesius, ut probaret nihil omni corpore vacuum esse posse, futurum nempe ut Nihil esset extensum, Nihili autem nullas esse posse affectiones, eodem probavit Pyrrho, id quod non est, sive Nihilum, doceri non posse: quippe si Nihilum doceri posset, Nihilo aliquid eventurum, Nihilo autem nihil posse contingere. Cartesiani argumenti prorsus simile est argumentum, quo ad rejiciendum vacuum usus est Gulielmus Episcopus Parisiensis, *Vacuum nempe distantiam facere non posse.* Idem asseveravit ante Cartesium, si vas à Deo ita vacefiat, ut nullum omnino

*Gulielm. Paris.
Episc. Paris. i.
De univers.
Part. 1. c. 14.
¶ 31.*

in eo corpus supersit, futurum ut vasis latera coëant. Dixit Plotinus nihil Deum creare posse, præter id quod creatum est; quod idem placuit & Cartesio, licet ob diversas causas. In loco externo explicando prævit Cartesio Aristoteles. Quidquid de mundi origine traditum ab illo est, totum id prope modum manavit è veteri Philosophia. Nam primum Anaxagoræ est materia illa infinita, in minutas distributa particulas, inter se similes, & mente divina in ordinem adductas. Quam doctrinam persecutus est Anaxagoræ discipulus Euripides. Sciscebant eadem fere Empedocles & Heraclitus. Sciscebant imprimis Democritus & Epicurus, omniaque ex corpusculis angulosis, levibus, uncinatis, & hamatis concreta esse volebant. Posse hæc semper dividi; & ad quantamlibet tenuitatem redigantur, novæ rursus partitioni superesse locum, cum Thalete, Pythagora, & Academicis Aristoteles censuit. Imprimis vero Leucippus Elcates, Democritus, & Epicurus Cartesio præluserunt in mundi hujus aspectabilis explicandis causis: nam præterquam quod indivi-

*Plotin. Enn.
3. l. 5. c. 12.*

dua corpuscula & inane admiserunt, quæ repudiavit Cartesius, cætera prope omnia consentiunt. Primum enim ponunt universitatis rerum, mundorumque infinitatem; quod & Anaximandro, & Anaximeni, & Anaxagoræ, & Metrodoro, & Seleuco, & Archelao, & Xenophani placuit; & Diogeni quoque Apolloniatae, qui & mundos generari credidit; atque etiam Melisso, qui & ab hac infinitate vacuum removit, perinde ut Cartesius. Particulas rotari & circumagi dicunt, & is quem dixi Leucippus, & ejus sectæ: atque ex ea vertigine corpuscula variis modis implicata orbem hunc aspectabilem edidisse; terram in ima subsedisse, ac propterea factam cylindraceam; mundos longis intervallis occidere & oriri: quod & Anaximandro visum est. Astra singula mundos esse, aëre suo & æthere, ac sua etiam terra instructos opinati sunt Heraclitus & Pythagorei. Idem in Orphicis traditum est. Strato quoque Lampiscenus repudiatis illis Democriti corpusculis & inani, mundum naturæ opus esse docuit; & quidquid fit, naturalibus ponderibus & motibus fieri. Varias

mundis figuras, sed globosam præcipue adscripsit Epicurus. Unam & eandem esse mundi totius materiam dixit Anaximander, aliique subinde. Per-
vulgata est apud Sinenses opinio, mundum ex aqua conflatum esse, quæ magna vi agitata in leviores partes, graviorefque discreta abierit: ex illis prodiisse terram, ex his cælum; medias partes naturam suam retinuisse. In varios vortices, sive mundos primam rerum materiam distribuerunt Leucippus, Democritus & Epicurus: unde existimemus meritone in vorticum horum inventionem tantum se jactet Cartesiana Schola. Ac de his quidem manifesta res est apud Diogenem Laërtium & Hesychium Illustrum. Aiebant enim corpuscula ex infinitate simul collecta, *δίνῳ ἀπεργάζεσθαι*; vorticem efficere; *ὅ κατὰ τὴν τῷ μέσου* *ἀντίρρῳσιν ἀεὶ δινεῖσθαι, εἰλεῖσθαι, συσπρέφεισθαι*, renitente medio circumvolvi: ex hac vertigine particularum secessionem & conjunctionem oriri; ex conjunctionibus enasci *globosum acervum*, *σύστημα σπαιροεῖδες*. Infinitum quoque universum posuisse Diogenem Apolloniaten, atque infinitum vacuum, auctores sunt Plu-

Laërt. & Hesych. in Leucippo, Democrit. Epicur.

Plutarch. a.

pud Ensch. tarchus & idem Laërtius; accum move-
P. ap. Evang. retur universum, effecisse vorticem,
lib. 1. c. 8.
D. og. Laërt. in συσροφὴν πειήσας, densiusque illic evasisse,
Diogene A- istic rarius, & ex levioribus partibus
jellon. Solem extitisse: quæ ab Anaximenis do-
 ctrina non valde discrepant, & mera
 sunt Cartesianæ fabulæ femina. Sparsa
 quoque plurima reperies hujusmodi in
 Plutarchi libello De facie in orbe Lu-
 næ: velut universum esse infinitum,
 cumque fine careat, carere & medio,
 plures esse Tellures, quæcumque gra-
 via sunt non ferri in medium mundi,
 nec mundi medium Terram hanc no-
 stram obtinere. Extitit vero inter novi-
 tios Philosophos Jordanus quidam
 Brunus Nolanus, quem Cartesianæ do-
 ctrinæ antesignanum jure dicas: adeo
 accurate omnem propemodum ejus
 compositionem præsignavit in eo libro
 quem De immenso & innumerabilibus
 inscripsit. Nam & universi infinitatem
 & mundorum innumerabilitatem tue-
 tur; & duo esse vult Astrorum genera,
 Soles, & Tellures, hoc est, Stellæ Fixas,
 & Planetas; circa singulos Soles ingens
 esse spatium æthereum in quo Tellures
 volvantur, ut circa hunc nostrum Solem

Terra, Saturnus, Jupiter, cæterique Planetæ; atque ideo quot Soles sunt sive Fixæ, totidem esse mundos, diversis intervallis à terra semotos; Cometas esse de genere Planetarum; Terram nativo igne fœtam esse; mundi hujus igneum elementum esse Solem ipsum; ignem alio modo esse in Sole atque in Astris. Sed ne nimius sim, librum legi velim; qui fecerit, feret operæ pretium, & quam pulchre ei cum Cartesio conveniat cognoscet. Provenerunt post Brunum acuti Philosophi, Gilbertus & Galilæus, qui mundum esse infinitum, ac proinde figura, centroque carere sentirent, etsi non aperte sententiam suam scriptis explicarunt. Nonnulla quoque Cartesianis hæud absimilia prodidit Keplerus, insignis ætatis hujus Mathematicus, à quo multa se didicisse Cartesius profitetur. Is licet Fixis singulis suos non attribuit vortices, in eoque & in mundi infinitate dissentire se à Bruno & Gilberto sæpius affirmat, suum tamen dat Soli vorticem, Cartesianis & Brunianis vorticibus parem, in quo Terra & Planetæ volvantur. Sic enim in Epitome Astronomiæ Copernicane, *Pro manibus* Kepler. Epito-

*the Astronom.
Copern. lib. 4.
Part. 2. c. 3.*

est Soli, inquit, virtus sui corporis lineis rectis in omnem mundi amplitudinem emissa, quæ eo ipso quod est species corporis, una cum corpore Solis rotatur instar rapidissimi Vorticis. Deinde, Corpore Solis converso, virtus etiam ista convertitur. Cumque Sol illa virtute corporis arripuerit Planetam, secum etiam circumducit illum, & cum illo forte etiam omnem auram ætheream circumfusam. Et in eximio opere De motu stellæ Martis, lemmati capitis tricesimi quarti verba hæc inseruit: Species illa virtutis, quæ vehit Planetas per mundi amplitudinem, circumit instar fluminis, seu Vorticis. Tum in ipso capite refellit Fracastorium, quod vetustissimos Ægyptios secutus, futurum censuerit, ut aliqui Planetæ orbitis suis deflexi, novas ineant vias, pristinis relictis; quæ ipsa est origo Cartesiana Cometarum. Id ab Ægyptiis sumserunt Pythagorici & interpolarent, si Theoni horum opinionem referenti credimus. Ad idem redit eorum opinio, qui stellam anno MDLXXII. exortam in signo Cassiopeæ, ex profundis & immensis ætheris spatiis recta versus terræ centrum pro-

*Theon. in Astr.
rat. Progn.*

cessisse & hominibus apparuisse rati sunt, quique à Tychone & Keplero sunt confutati. Quanquam nec multum ab his discrepat Keplerus ipse, advenas esse Cometas statuens, ex vastis cæli regionibus motu recto profectos, qui tum in oculos hominum incurrant, cum rectæ lineæ quam describunt eam tenent partem, quæ terris propior est; tum videri posse desinant, cum institutum iter peragentes recedunt à terris. Cecinisse fertur Empedocles Astra ignem esse, quem in primo rerum diremtu ex se expresserit æther atque eliserit; magnam quoque ignis vim circa centrum terræ esse collectam: atque ab hoc igne terram moveri Parmenides credidit: quæ omnia arripuit Cartesius, atque ad usus suos accommodavit. Ex Luna & Planetis, qui Tellures sunt & habentur à Bruno & Cartesio, Soles effici volebat Cleanthes; Cartesius ex Solibus Tellures. Unde Magneti insita sit ferri attrahendi vis, cum quæterent Platonici, multa attulerunt Cartesianis consentanea: ferrum enim dixerunt, non tam raro esse corpore ac lignum; nec tam solido atque aurum; huic meatus quos-

*Tych. Pro-
gymn. Tom. 1.
pag. 641.
Kepler. De
stell. nov. Scr-
ptar. cap. 21.
22. & de Co-
met. libr. 2.*

dam inesse asperos atque scabros, qui admittant aërem, atque eum in has angustias receptum obstructo deinde exitu retroagi, & versus lapidem reverti, ferrumque secum una rapere. Causam æstus maris ad compressionem ventiteram inter & contravenientem Lunam intercepti retulisse Seleucum Mathematicum auctor est Plutarchus in libro De placitis Philosophorum: quem librum Cartesio accurate lectum & sublectum fuisse multa indicant. Non aliam fulguribus, tonitribus, & fulminibus causam assignavit Cartesius, atque Anaxagoras. Is nubes calore correptas collidi, atque inde fragorem existere docuit. Fuscæ hæc exponentem Socratem Anaxagoræ auditorem inducit Aristophanes in Nubibus: quæ qui legerit, Cartesianum fuisse Socratem putet. Tonitru, inquit, edunt nubes provolutæ; nam cum nimio aquæ pondere gravatæ sunt, in subjectas sibi nubes concidunt, rumpuntur, & fragorem cient: interceptus enim aër, iisque inclusus, eas distendit haud secus quam vesicas, ac demum eas discindens & pertrumpens, exit magno impetu, ignem-

*Plutarch. De
placit. Philos.
libr. 1. cap. 7.*

que concipit. Hæc placuerunt deinde Stoicis. Addit Aristoteles, exhalationem siccam in humida nube coactam vi magna viam sibi facere, & erumpendo sonum edere. Colores nihil aliud esse quam lucem modificatam, & diversis modis reflexam, neque inesse in corporibus, opinio fuit Aristarchi Samii, Democriti, & Epicuri. Quam, ad explicandam visionis naturam, baculi similitudinem adhibuit Cartesius, eadem Stoici utebantur. Quippe ne ab alienis quidem abstinuit manum, cum tractaret Mathematica: in quibus etsi magnus fuit, longe tamen minor fuit, quam prædicat ejus factio. Pauca addidit ad Analysin Vietæ. Quæ primus in hac arteprehendisse ferebatur, furtim ex Harrioto Anglo exceperat. Exceperat Dioptrica ex Rogerio Bacono & Antonio de Dominis; Optica ex Snellio. Nec dubitare licet, quin ex pervulgato usu speculi Parabolici concavi, ad excitandos ignes per radiorum repercussum adhiberi soliti, adductus sit, ut Hyperbolica vitra, quorum ad res oculis objectas, per radiorum refractionem amplificandas mirifica vis

est, ad Telescopia transferret. Quamquam Robervallius, celeberrimus ætatis huius Geometres, Hyperbolen ad usum Telescopiorum ineptam esse censebat. Causa palpitacionis cordis, quam refert Cartesius ad fervorem sanguinis affluentis, & ingenito illic calore ebullientis, & pulsantis repagula venarum dum influit; eadem claudentis, & arteriarum contra ostia reserantis, easque subeuntis dum effluit, & quæ confutata est à Johanne Mayovvio Anglo, tota Aristotelis est. Ait enim conceptis verbis in libro De respiratione, pulsus cordis inde oriri, quod humor ex cibo illuc appulsus per calorem intumescat, & extimam cordis tunicam attollat; humorem quippe hunc in cor prolabi continenter, ex eoque sanguinem gigni, cujus prima origo est in corde. Hæc quantumvis suis paria, plurimum tamen discrepare contendebat

Cartes. Epist. Tom. 1. Epist. 77, 78. Cartesius, cum hunc ei Aristotelis locum indicaret Lovaniensis quidam Medicus, ne gloriam scilicet inventionis & novitatis amitteret. Sed frustra erat: quamvis enim neque ventriculorum, neque valvularum nominatim memi-

nerit Aristoteles, mirabile tamen est in tanta Anatomices imperitia, qualis fuit illis temporibus, & recentiorum experimentis carentem eum, velut acutamen tetigisse. Et sane quid hac extima cordis tunica significatum voluerit, satis obscurum est; nec litem ei movere hoc nomine Cartesius debuit.

IX. Verum solenne hoc est sectæ *Laus Aristotelis.* hujus & præfuli & sequacibus, Aristoteli, non omnis solum eruditionis & ingenii laudem, sed Philosophi quoque titulum, ac pene hominis nomen invidere. Quem tametsi à vero sæpe aberrasse nemo qui frontem habeat negaverit, plura tamen & illustriora certum est contulisse ad Philosophiam, & ampliori omnis doctrinæ & elegantiae supellectile locupletasse humaniores disciplinas, clariorique felicissimi ingenii face mortalibus præluxisse, non dico quam Cartesium, hominem ingenii boni, doctrinæ permediocris, sed quam ullum Philosophorum omnium, quorum constet apud nos memoria. Quæ qui infitari audent, viros esse videmus, vel litterarum plane rudes & impolitos, vel anteceptis opiniononi-

264 *Censura Philosophia*

bus, quas ab aliis tamen repudiari jubent, excæcatos, vel abreptos partium studiis, vel novitati faventes. Quamvis enim parum habeat novitatis disciplina isthæc; hominibus tamen omnis antiquitatis insciis visa nova est. Atque hæc novitatis opinio quantum valuerit in vulgus vel inde scias: si priscis temporibus extitisset Philosophus aliquis Cartesii similis, talemque condidisset disciplinam, qualis Cartesiana est, jam pridem illa exolevisset, uti exoleverunt nobiliores plurimæ. At nunc viget, floretque, quia novitatis speciem præ se fert, & nova creditur ab imperitis. Atqui Philosophicarum rerum dijudicatio animos desiderat adversus novitatis lenocinia munitos; nec attentos solum & acutos, sed æquos etiam & literis non leviter tinctos: & jam satis liquet verius dictum esse à Cartesio, quam credidit ac voluit, Philosophiam suam non esse novam, sed antiquam & vulgarem.

*Vulgares sunt
Cartesiane
Moralis regulae.*

X. Atque hæc hæctenus: nec enim laborandum mihi in eo est, ut regulas ducendæ vitæ, morumque fingendorum, quas ex instituta à se & reperta studio-

rum

rum ratione depromsisse se scribit Cartesius, è prisca Philosophia manasse, & prudentiæ ipsius præcepta esse ostendam. Nam quis nescit patriæ legibus esse obtemperandum, & ex communi usu agendum, & juxta vetus effatum, vivendum esse ut plures, sentiendum ut paucos: quod Scepticos præcipue tenuisse & sanxisse supra dixi? Quis nondum audiverat, extrema omnia esse fugienda, & virtutem esse *medicinam* *Florat. Epist. lib. 1. Epist. 18.* *vitiorum, & utrimque reductum?* Constantia in proposito, & perseverantia in eodem tenore vitæ, qua altera conflata est regula, quam multis suadetur rationibus à Cicerone in libris De officiis? Quam false & eleganter deridetur ab Horatio Tigellius ille Sardus, levis adeo, sibi impar, & mutabilis? Quam decantata à Cyrenaicis & Stoicis tertia regula, quæ seipsum vincendum potius constituit, quam fortunam; cupiditates domandas potius, quam rerum ordinem mutandum? Tralatitia hæc sunt & obvia: nec jam, nisi me meus fallit animus, obscurum est, meritone Philosophiæ reparator à suis dictus, à se etiam creditus sit Cartesius, *Cartes. Prin-*

266 *Censura Philos. Cartesiana.*

cip. Part. 4.
§. 207.

qui nihil fere, nisi veterum dictata re-
coxit. Nos vero non ægre tribuamus
ipsi, quod ad calcem Principiorum ju-
re postulat, ut eorum quæ attulit nihil
admittamus, nisi quod clara ratio per-
suadebit. Hoc si facimus, magnam uti-
que dogmatum ejus partem explode-
mus.

Epilogus.

Sed nunc desino, nec enim expectas,
opinor, à me, GENEROSISSIME
Dux, ut cæteras disciplinæ hujus pro-
pagines persequar & elidam: erutis e-
nim radicibus, accisoque trunco, cor-
ruere cum cacumine ramos necesse est.

FINIS.

Summa Privilegii.

C Autum est diplomate regio, ne quis in
Gallia intra annos decem excudat aut
divendat *Censuram Philosophia Cartesiana*,
præter Joannem Anisson Typographiæ regiæ
Directorem; multa si quis contra fecerit in-
dicta. Parisiis, die 25. Februarii 1689.

Boucoz.

AOA 1462038

